

O LE EKALESIA A IESU KERISO O LE AU PAIA O ASO E GATA AI • TESEMA 2015

O Le Liahona



**O Le Molimau Mulimuli
a Peresitene Packer, i. 10**

**Mo Faiaoga: O Fesili e Sili Atu
Ona Lelei, O le Aoaoina Atu
e Sili Atu Ona Lelei, i. 20**

**O Faaiipoipoga e Faavavau:
O se Feagaiga i totonu
o le Feagaiga, i. 24**

**Faafilemuina o Ou Popolega
e uiga i le Lumanaí, i. 34**




*"E tusa foi le malo
o le lagi ma le tagata
faatau oa ua sailili
penina lelei:*

*"Ua iloa e ia le tasi
penina tautele ona
alu ai lea o ia ua faatau
atu ana mea uma i le
faatau a'i mai."*

Mataio 13:45–46

O Le Liahona, Tesema 2015



10

O SAVALI

4 Savali a le Au Peresitene Sili: la Faaavanoa se Taimi mo le Faapola

Saunia e Peresitene
Thomas S. Monson

7 Savali a Faiaoga Asiasi: O Uiga Paia o Iesu Keriso—E Agaalofa ma Agalelei

TALA FAAALIA

10 O Se Molimau o le Faaola o Iesu Keriso

Saunia e Peresitene Boyd K. Packer
O se Apostolo o le 45 tausaga o loo molimau mai i le Faaola “ma le mautinoa atoatoa.”

I LE FAAVAA

Luma: Ata na tusia e Matthew Reier. I totonu o le faavaa pito i luma: Ata na pueina e Patrizio Martorana/iStock/Thinkstock. I totonu o le faavaa i tua: Ata na pueina e Clebher Tex.

14 O Iosefa Samita ma le Tusi o Faaaliga

Saunia e David A. Edwards
Aisea na taula ai e Iosefa Samita le tusi o Faaaliga “o se tasi o tusi e sili ona manino ua faatagaina e le Atua ia tusia”?

20 O Le Fai Atu o Fesili Sa’o i le Ala Sao

Saunia e Scott H. Knecht
O le fesili sao e mafai ona faia se ese esega tele pe a oo mai i le aoaoina mai ma le aoaoina atu o le talalelei.

24 O Le Feagaiga Fou ma Tumau Faavavau

Saunia e Elder Marcus B. Nash
Mo tagata uma o e ola i tuutuuga o le feagaiga fou ma tumau faavavau, o le taui o le olioli ma le filemu i lenei lalolagi ma le ola e faavavau i le isi olaga.

32 “Sa Ou Faia se Tautinoga i le Atua”

Saunia e Néstor Curbelo
O le tuuto o se tasi tagata i Ekuatoa na faamaonia le avea ma se taimi taula tele i le talafaasolopito o le Ekalesia itina.

34 Ia Filemu

Saunia e Elder D. Todd Christofferson
Faaalu se taimi i lenei vaitau o le Kerisimasi e lagonaina ai le faa-mautinoaga a le Faaola.


MATAGALUEGA

8 Tatou te Talanoa ia Keriso: O Se Meaalofa o le Ola ma le Alofa

Saunia e Brad Allred

38 O Leo o Le Au Paia o Aso e Gata Ai

Saunia e Peresitene Howard W. Hunter



48

44 Toe Foi Vave Mai i le Fale mai La'u Misiona

Saunia e Brittany Romanello Casco
Ou te talitonu i tala a Keriso na faamaloloina e mama'i, ma ou te talitonu o le a Ia faia lea mea e tasi mo au.

48 Talaaga Otooto o Talavou Matutua: O Le Ola Ai o se Molimau i Siamani

Saunia e Justina McCandless
O le malamalamā i le aualā e manatu ai le Tama Faalelagi ia te ia na fesoasoani ia Eseta i ana sootaga ma isi.

Vaai pe mafai ona e mauaina le Liahona o loo natia i le lomiga lenei.
Faailo: O a mea na e aoaoina mai ou matua?



64

50 Pe Faapefea ona Iloa le Uiga Moni o le Kerisimasi

Saunia e Peresitene Dieter F. Uchtdorf
E mafai faapefea ona tatou lagonaina le agaga faafetai mo Keriso ma faafou lo tatou naunautaiga e mulimuli ia te Ia?

51 O Se Meaalofa e Suia ai Olaga i le Faleoloa Taugofie

Saunia e Keanu Williams
O se tali i se tatalo i le Kerisimasi na taitai atu i se aiga e faavavau.

52 O Le Alii Fou

Saunia e Matthew Flitton
Sa na o Mataio moni lava lana korama, ae e lei umi ae ona iloaina o le toatele o ositaulaga pau lava le mea na manaomia o se valaaulia e o mai.

54 Na Latou Iloaina Iosefa

Ia iloa le Perofeta o Iosefa Samita e ala i upu a tagata na iloaina patino o ia.

56 Pe o Oe o se Tagata e Taliaina po o se Tagata Foi?

Toe mafaufau i lau vaaiga i le tauisiaina o poloaiga ma le auauna atu i le Ekalesia.

57 Pepa Lautele o I Ai se Savali: Faaaoga po o le Maumau

58 Fesili ma Tali

Ou te lagona lou le agavaa e avea ma se peresitene o le vasega o Tamaitai Talavou. E mafai faapefea ona avea au ma se taitai e sili atu ona lelei?

60 O Mea sa Ou Aoaoina a o Avea o se Talavou Faatoa Liliu Mai

Saunia e Elder Jörg Klebingat
O le tatalo i taimi uma ma le faaaogaina o le Togiola i aso taitasi e mafai ona fesoasoani ia te oe e lagona le to'a ma le mama i taimi uma.

64 Alualu i Luma o le Tagata Lava la i le Gafa o Lo'u Aiga

Saunia e Raisa Marcondes
E ala i le faia o talafaasolopito o lona aiga, na iloa ai e Raisa sa le na o ia le tagata o le Ekalesia i lona aiga.



68

65 Tusitusiga Paia mo Spencer

Saunia e Elder Marcus B. Nash
Sa le iloa e Spencer pe aisea na le moe lelei ai o ia ina ua o ese ona matua mai lo latou niuu. O le a le mea na sese?

66 O Se Lesona mai i Lo'u Tama

Saunia e Elder David A. Bednar
O le tama o Elder Bednar e le auai i le Ekalesia, ae sa ia aoao atu ia te ia se lesona taua e uiga i le perisitua.

67 Ata o Mau: O Le Tusi a Mamona

68 Po o le Kerisimasi faatasī ai ma le au Córdobas

Saunia e Honney Thalia Cabel Losno
Sa mafai e Marycielo ma lona uso o ona tuuina atu se mea e sili atu nai lo meaalofa i le au Córdobas mo le Kerisimasi.

70 O Le Paso o le Toefuataiga

Saunia e Heidi Poelman
Sa tatau ona tuuina atu e Ana se lauga i le Peraimeri. Ae e faapefea ona mafai ona ia faamalamalamā atu le uiga o le Toefuataiga?

72 Taimi o Tusitusiga Paia: O Le A Toe Afio Mai Iesu Keriso!

Saunia e Erin Sanderson

74 Mo Tamaiti Laiti: O Le Tala i le Soifua Mai o Iesu

O Le Lomiga Faamaonia Faa-Samoa a le Ekalesia
a lesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson,
Henry B. Eyring, Dieter F. Uchtdorf

O Le Korama a Apostolo e Toasefululu:

Russell M. Nelson, Dallin H. Oaks, M. Russell Ballard,
Robert D. Hales, Jeffrey R. Holland, David A. Bednar,
Quentin L. Cook, D. Todd Christofferson, Neil L. Andersen

Faatonu: Joseph W. Sitati

Fautua: Randall K. Bennett, Craig A. Cardon,
Christoffel Golden, Larry R. Lawrence, James B. Martino

Pule Faatonuuli: David T. Warner

Faatonuuli o le Lagolago mo Aiga ma

Tagata o le Ekalesia: Vincent A. Vaughn

Faatonuuli o Mekasini a le Ekalesia: Allan R. Loyborg

Pule o Mea Tau Pisini: Garff Cannon

Pule Faatonutonu: R. Val Johnson

Pule Faatonutonu Lagolago: Ryan Carr

Lagolago o Lomiga: Megan VerHoef

Au Tusitusi ma Faatonutonu: Brittany Beattie, David Dickson, David A. Edwards, Matthew D. Flilton, Lori Fuller, Garrett H. Garff, LaRene Porter Gaunt, Jill Hacking, Charlotte Larcabar, Mindy Anne Leavitt, Michael R. Morris, Sally Johnson Odekirk, Joshua J. Perkey, Jan Pinborough, Richard M. Romney, Paul VanDenBerghe, Marissa Widdison

Pule Faatonuuli Tusiata: J. Scott Knudsen

Faatonuuli Tusiata: Todd R. Peterson

Au Mamunu: Jeanette Andrews, Fay P. Andrus, Mandie M. Bentley, C. Kimball Bott, Tom Child, Nate Gines, Colleen Hinckley, Eric P. Johnsen, Susan Lofgren, Scott M. Mooy, Mark W. Robison, Brad Teare, K. Nicole Walkenhorst

Faatolu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Connie Bowthorpe Bridge, Julie Burdett, Katie Duncan, Bryan W. Gygi, Denise Kirby, Ginny J. Nilson, Gayle Tate Rafferty

Tailolomi: Jeff L. Martin

Faatonuuli Lolomiga: Craig K. Sedgwick

Faatonuuli o le Tufufatuga: Stephen R. Christiansen

Mo le okaina o mekasini, alu i le store.lds.org po o le Faletusi Tutotonu i Pesega. Telefoni 64127. Totogi o le Mekasini: \$0.55 (Samoa) i le kopu. Totogi mo le Tausaga Atoa \$6.60 (Samoa).

Auina atu tusitisiga ma faafesihi i lugu o le initoneti i le liahona.lds.org: pe meli mai i le *Liahona*, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le "tapasa" po o se "faatonuuli") e lomia i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalaotia, Siekielovakia, Tenimaka, Take, Iglis, Esitona, Fiti, Finelani, Farani, Siamani, Eleni, Hanikeri, Initu, Iselani, Initonlesia, Italia, Japani, Kiripati, Korea, Latvia, Litunia, Malakasa, Masela, Monokolia, Nouei, Polani, Potukale, Romania, Rusia, Samoa, Saina (ua faafaofoineira), Silovenia, Sipanioli, Suetena, Swahili, Tagaloka, Tahiti, Tai, Toga, Lukureini, Urutu, ma Viatename. (E eseese lava gagana.)

© 2015 Puletaofia e le Intellectual Reserve, Inc. Ua taofia aiata tatau uma. Lomia le i lunaite Setete o Amerika.

E mafai ona kopu tala ma ata o le *Liahona* mo le toe faaaogaina i lotu po o le aiga ae ia le faia ai ni pisini. E le tatau ona kopu ni tala po o ni ata pe afai o faasa mai i le laina o loo taua ai le e ona lea faatufugaga. Auina atu fesili e uiga i le puletaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada:

December 2015 Vol. 39 No. 12. O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Post Information: Publication Agreement #40017431)

POSTMASTER: Send all UAA to CFS (see DMM 707.4.12.5). NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.

Manatu mo Afiafi Faaleaiga

O lenei lomiga o loo aofia ai tusiga ma gaoioiga e mafai ona faaaoga mo afiafi faaleaiga.
O ni faataitaiga nei se lua.



"Ia Filemu," itulau e 34: Ua valaaulia e Elder Christofferson i tatou e faaalu se taimi i lenei vaitau o le Kerisimasi e saofafai filemu ai ma manatunatu e uiga i le pepe o lesu. Mafaufau e faitau le tusiga faataso o se aiga ma ona valaaulia lea o se agaga o le migao e ala i le faiatua o tusitusiga paia, usuina o viiga, po o le matamata i vitio o le Tusi Paia (e maua i le Biblevideos.org) e uiga i le soifua mai o le Faaola. Ona tuu atu lea o se taimi mo tagata taitoataso e mafaufau ai e uiga i le soifua mai o le Faaola ma lona uiga ia i latou. Atonu e te mafaufau ia i ai ni api talaaga po o ni pepa mo i latou e mananao e faamaumau o latou manatu.

Fai atu i tagata o le aiga e faasoaa mai o latou manatu pe afai latou te mananao ai.

Vito o le Kerisimasi, Mormon.org:

Mafaufau i ni auala e mafai ona faaaoga ai e lou aiga vitio o le Kerisimasi i lenei tau-saga e faasoaa atu ai le talalelei i isi. Atonu e te faia ni meaai mama o le Kerisimasi e faasoaa atu i uo ma tuuina atu ma se kata o loo i ai le tuatusi o le vitio. E mafai foi ona e fuafuaina se faalauiloaga faaleaiga i faasalalauga faaagafesootai ma fai ni simi mo le toatele o tagata e mafai ona e faasoaa atu i ai le vitio. O le isi filifiliga o le valaaulia lea o ni uo e o mai e matamata le vitio faataso ma outou.

I LAU GAGANA

O loo maua le *Liahona* ma isi mea e faaaoga a le Ekalesia i le tele o gagana i le languages.lds.org.

Asiasi i le **Facebook.comliahona.magazine** e sue ai manatu mo afiafi faaleaiga fesoasoani mo lesona o le Aso Sa ma tusiga e mafai ona e faasoaa atu i uo ma aiga (o loo maua i le faaPeretania, faaPotukale, ma le faaSipaniolo).

AUTU I LENEI LOMIGA

E ta'u mai e numera le itulau muamua o le tusiga.

Afio Mai Faalua, 72

Agaalofo, 7

Agalelei, 7, 41, 58

Alofa, 8

Aoao atu, 20

Aoaoina, 20

Auuna atu, 4, 39, 41, 56, 58, 68

Faaipoipoga, 24

Feagaiga, 24

Feagaiga Fou, 14

Filemu, 34

Galuega faafaifeatalai,

32, 44, 48, 51, 52

Galuega faalemalumalu,

42, 43, 58

Iesu Keriso, 4, 10, 24, 34,

50, 60, 72

Kerisimasi, 4, 8, 34, 38, 39, 40, 41, 42, 43, 50, 51, 68, 72, 74, 80

Ola e Faavavau, 24

Perisitura, 66

Samita, Josefa, 14, 54, 70

Suesue i tusitisiga paia, 65

Taitaiga, 58

Talafaasolopito o aiga, 64

Taleni, 57

Tatalo, 41, 42, 60

Taulaga, 8, 32, 39, 40, 43, 56, 60

Toefuataiga, 70

Togiola, 10, 44, 60

Tusi a Mamona, 67

Tuuto, 32

Usiusitai, 24, 56



Saunia e Peresitene
Thomas S. Monson

IA FAAAVANOA SE TAIMI MOLE Faaola

O se isi vaitau o le Kerisimasi ua oo mai i o tatou luga, ma faatasi ai ma le gafoa mai o se tausaga fou. E foliga mai e pei lava o ananafi sa tatou faamanatuina ai le soifua mai o le Faaola ma faia ni tautinoga.

I totonu o a tatou tautinoga mo lenei tausaga, pe na tatou fatutu ni sini ina ia faia se taimi i o tatou olaga ma faaavanoa o tatou loto mo le Faaola? E tusa lava pe o faapefefa ona faamanuiaina i tatou e oo mai i le taimi nei i se tautinoga faapena, ou te mautinoa ua tatou mananao uma lava e faia ia sili atu. O lenei vaitau o le Kerisimasi o le taimi sili lava e suesue ma faafouina ai a tatou taumafaiga.

I o tatou olaga pisi, faatasi ai ma isi lava mea e tele o loo tauva mai mo lo tatou gauai atu, e taua lo tatou faia o se taumafaiga mataalia, ma taumafaiga tuuto i le aumaia o Keriso i o tatou olaga ma i o tatou aiga. Ma e taua tele mo i tatou, e pei o le au Makoi mai Sasae, le tumau ma le mau-maututu i Lona fetu ma “o mai e ifo atu ia te ia.”¹

I le faagasologa o le talafaasolopito, o le savali mai ia Iesu ua tutusa lava. Ia Peteru ma Aneterea i auvai o Kalilaia, sa Ia fetalai atu, “Mulimuli mai ia te au.”² Ia Filipo na oo mai le valaau, “Mulimuli mai ia te au.”³ I le sa Levi sa nofo talia lafoga na oo mai le faatonuga, “Mulimuli mai ia te au.”⁴ Ma ia te oe ma a’u, afai tatou te faalogo, o le a oo mai lena lava valaaulia faamalosiau: “Mulimuli mai ia te au.”⁵

A o tatou mulimuli i Ona tulagaaao i le aso ma a o tatou mulimuli i Ana faataitaiga, o le a tatou maua avanoa e faamanuia ai olaga o isi. Ua valaaulia e Iesu i tatou e tuuina

atu i tatou lava: “Faauta, e manaomia e le Alii le loto ma le mafaufau malie.”⁶

Pe o i ai se tasi e tatau ona e tuuina atu i ai le auaunaga i lenei Kerisimasi? Pe o i ai se tasi o loo faatalitali mai mo lau asiasiga?

I tausaga ua mavae sa ou faia ai se asiasiga o le Kerisimasi i le fale o se tina matua ua oti lana tane. A o ou i ai iina, na tatagi le logo o le faitotoa. I le faitotoa sa tu mai ai se fomai e pisi tele ma le lauiloa. Sa lei valaauliaina o ia; nai lo lena, sa ia lagonaina se uunaiga e asiasi atu i se gasegase o le sa tuuatoatasi.

I lenei vaitau, o loto o i latou o e ua nofofale o loo faatalitali ma moomoo mo se asiasiga i le Kerisimasi. I se tasi Kerisimasi a o asiasi atu i se nofoaga autu mo tagata matutua, sa ou nofonofo ma talanoa ma ni tamaitai matutua e toalima, o le e sili ona matua o i latou sa 101. Sa tauaso o ia, ae sa ia iloaina lo’u leo.

“Epikopo, ua fai si ou tuai mai i lenei tausaga!” o lana tala lea. “Sa ou manatu o le a e le sau.”

Sa ma maua se taimi fiafia faatasi. O se tasi o gasegase, e ui i lea, na vaavaai atu ma le moomoo i fafo o le faamalama ma toe fai mai pea lava pea, “Ou te iloa o le a sau la’u tama i le aso lenei e vaai au.” Sa ou mafaufau pe o le a ia sau, aua sa i ai isi vaitau o le Kerisimasi na te lei asiasi mai lava.

O loo i ai pea le taimi o le tausaga lenei e tuuina atu ai le lima fesoasoani, le loto alofa, ma le agaga naunau—i se isi faaupuga, ia mulimuli i le faataitaiga ua faatulaga e lo tatou Faaola ma auauna atu e pei ona finagalo o Ia ia tatou



auauna atu ai. Ao tatou auauna atu ia te Ia, o le a tatou le misia lo tatou avanoa, e pei ona faia e le pule o le faletalimalo o anamua,⁷ e faavanoa se taimi mo Ia i o tatou olaga ma se avanoa mo Ia i o tatou loto.

Pe mafai ona tatou malamalama i le folafolaga matagofie o loo i ai i le savali a le agelu na tuuina atu i leoleo mamoe sa nonofo i le fanua: “Ou te aumai ia te outou le talalelei e olioli tele. . . . Aua o le aso nei ua fanau ai . . . lo outou Faaola, o le Alii ia o Keriso”⁸

A o tatou faafesuiai ia meaalofa i le Kerisimasi, tau ina ia tatou manatua, talisapaia, ma maua lena meaalofa silsili o meaalofa uma—le meaalofa o lo tatou Faaola ma le Togiola, ina ia tatou maua le ola e faavavau.

“Aua o se a se aoga i se tagata pe a tuu atu se meaalofa i ona luga, ae na te lē taliaina le meaalofa? Faauta, e lē olioli o ia i le mea ua tuu atu ia te ia,

pe olioli foi ia te ia o lē na tuuina mai le meaalofa.”⁹

Tau ina ia tatou mulimuli ia te Ia, auauna atu ia te Ia, faamamalu ia te Ia, ma talia i o tatou olaga Ana meaalofa ia i tatou, ina ia mafai ona tatou, i upu a le Tama o Liae, “siosiomia e faavavau i aao o lona alofa.”¹⁰ ■

FAAMATALAGA

1. Mataio 2:2.
2. Mataio 4:19.
3. Ioane 1:43.
4. Mataio 9:9.
5. Mataupu Faavae ma Feagaiga 38:22.
6. Mataupu Faavae ma Feagaiga 64:34.
7. Tagai Luka 2:7.
8. Luka 2:10–11.
9. Mataupu Faavae ma Feagaiga 88:33.
10. 2 Nifae 1:15.

AOAO ATU MAI LENEI SAVALI

Ua valaauiina i tatou e Peresitene Monson ina “ia faia se taumafaiga mataalia, ma le tuuto atu i le aumaia o Keriso i o tatou olaga ma i o tatou aiga.” Mafaufau e talanoaina faatasi ma i latou e te aoaoina le auala e mafai ona latou faia ai lenei taumafaiga faautauta lelei faaletagata lava ia, ma o se aiga. Atonu e te mafaufau e talosagaina i latou e mafaufau i se tagata patino po o se aiga e mafai ona latou asiasi i ai pe auauna i ai i lenei Kerisimasi. “O loo i ai pea le taimi o le tausaga lenei e tuuina atu ai le lima fesoasoani, le loto alofa, ma le agaga naunau.”



O Auala e Auauna Atu Ai i le Taimi o le Kerisimasi

Efaalu e Peresitene Monson le taimi e asiasi ai i tagata matutua ma i latou i nofoaga autu e tausi ai, aemaise lava i le taimi o le Kerisimasi. Sa ia matauina o loo i ai i latou o e fiafia ona ua latou mauaina ni tagata asiasi, a o isi na o le faamoemoe mo tagata asiasi mai e le o omai lava. O loo i ai tagata o loo faatalitali mo se tagata—atonu o lenei Kerisimasi, o oe e mafai ona avea ma lena tagata.

O se lisi lenei o ni nai auala e mafai ona e fesoasoani ai ia mautinoa e leai se tasi e lagona le tuuatoatasi i lenei Kerisimasi. Ia lagonaina le saoloto e mafaufau ai i nisi auala e mafai ai ona e aapa atu ai i lou nuu i lenei vaitau. "Pe o i ai se tasi o loo faatalitali mai mo lau asiasiga?"

- Ia fai ni kata o le Kerisimasi e auina atu i faifeautalai ma tagata nofofua ma matutua o lau uarota po o le paranesi.
- Volenitia i se faalapotopotoga o le nuu i le lotoifale.
- Tuu atu ni kopi o le Tusi a Mamona o ni meaalofa o le Kerisimasi i au uo ma tuaoi.
- Asiasi i tagata matutua i lau uarota po o le aiga.
- Ia faia ni meaai mama e tuuina atu i ou tuaoi.


Mo nisi manatu i auala e mafai ona e auauna atu ai i lou alalafaga, alu i le [lds.org/topics/humanitarian-service/help](https://www.lds.org/topics/humanitarian-service/help).

TAMAITI

Mulimuli i le Malamalama

Ina ua mavae le soifua mai o lesu, na aumai e le au Makoi ia te la ni meaalofa. Sa latou mulimuli i se fetu fou, e susulu malosi i le lagi ina ia maua o la.

Mulimuli i le ala e maua ai lesu. O a meaalofa e mafai ona e aumaia ia te la?



Ia suesue ma le agaga tatalo lenei savali ma saili ia iloa mea e faasoa atu. O le a mafai faapefea e le malamalama i uiga paia o le Faaola ona faateleina lou faatuatua ia te la ma faamanuiaina ai i latou o loo e tauisia e ala i le faiaoga asiasi? Mo nisi faamatalaga, alu i le reliefsoociety.lds.org.


O Uiga Paia o Iesu Keriso: E Agaalofa ma Agalelei

O se vaega lenei o se faasologa o Savali a Faiaoga Asiasi e faaau tu i uiga paia o le Faaola.

“Tusitusiga paia, o le tigaalofa o lona uiga moni lava o le ‘mafati faatasi.’ O le isi uiga o le faaali atu o le alofatiā, alofaootia, ma le alofa mutimutivale i se isi.”¹

“E tele faataitaiga na tuuina mai e Iesu ia i tatou e faatatau i le agaalofa,” na saunoa ai Peresitene Thomas S. Monson. “O le tagata pipili i le taelega i Petesa; o le fafine ua molia i le mulilua; o le fafine i le vaieli o Iakopo; o le afafine o Iairo; o Lasalo, le tuagane o Maria ma Maret—a o latou taitoatasi na faapei uma lava o lē na manua i le ala i Ieriko. Sa taufai moomia uma e i latou taitoatasi le fesoasoani.

“I le pipili i Petesa, na fetalai atu i ai Iesu, ‘Ina tu ia i luga, ave ia lou moega, ma ia e savali.’ I le fafine agasala na aumai ai le fautuaga, ‘Alu ia oe, aua e te toe agasala.’ Ina ia fesoasoani ia te ia o le na sau e utu



vai, na Ia saunia se vaipuna “e puna i luga i le ola e faavavau.” I le afafine na oti o Iairo na oo mai i ai le polo-aiga, “Funa e, ou te fai atu ia te oe, ia e tulai.” Ia Lasalo i le tuugamau, ‘Ina sau ia i fafo.’

“Sa faaalia e le aunoa e le Faaola le le faatapulaaina o le agaalofa. . . . Ia tatou tatala atu le faitotoa o o tatou loto, ina ia mafai e Ia—o le faataitaiga soifua o le agaalofa moni—ona ulufale mai i ai.”²

Mau Faaopoopo

Salamo 145:8; Sakaria 7:9; 1 Peteru 3:8; Mosaea 15:1, 9; 3 Nifae 17:5–7

Mafaufau I le Mea Lenei

O ai e mafai ona faamanuiaina e ala i lou agaalofa?

Faatuatua, Aiga,
Toomaga



Mai Tusitusiga Paia

“Sa ma tootutuli ai ma lo’u toalua i autafa o la ma tama teine e 17 tausaga le matua ma aioi atu mo lona ola,” le saunoaga a Linda S. Reeves, le fesoasoani lua i le au peresitene aoao o Le Aualofa. “O le tali o le leai, ae . . . na ma iloaina . . . e . . . lagonaina [e le Faaola] le tigaalofa mo i tatou i o tatou faanoanoaga ma tiga.”³

O se tasi o tala ou te fiafia lava i ai mai le soifuaga o le Faaola o le tala ia Lasalo. Ua ta’u mai i le tusi paia e faapea “ua alofa lava lesu ia Maret, . . . o lona uso o [Maria], ma [lo la tuagane] o Lasalo.”⁴ Ina ua mai Lasalo, na auina atu le savali ia lesu, ae e taunu mai o la ua maliu Lasalo. Na tamoe atu Maria ia lesu, faapau i Ona vae, ma tagi. Ina ua silafia e lesu ia Maria ua tagi, “ona tiga tele lea o lona finagalo, ma . . . ua tagi” (Ioane 11:33, 35).

“O la tatou matafaioi lea. E tatau ona tatou lagonaina ma vaai i ai mo i tatou lava ma fesoasoani ai i fanau uma a le Tama Faalelagi ina ia latou lagonaina ma vaai ma iloa na tauaveina e lo tatou Faaola i Ona lava luga e le gata i a tatou agasala uma, ae e faapena foi i o tatou tiga ma o tatou mafatiaga ina ia mafai ai ona la silafia mea tatou te lagonaina ma le ala e faamafanafanaina ai i tatou.”⁵

FAAMATALAGA

- Taiala i Tusitusiga Paia, “Tigaalofa.”
- Thomas S. Monson, “O Le Meaalofa o le Agaalofa,” *Liahona*, Mat. 2007, 4–5, 8.
- Linda S. Reeves, “E Le Faagaloina Lava Oe e le Alii,” *Liahona*, Nov. 2012, 120.
- Linda S. Reeves, “E Le Faagaloina Lava Oe e le Alii,” 118.
- Linda S. Reeves, “E Le Faagaloina Lava Oe e le Alii,” 118.

O SE MEAALOFA O LE OLA MA LE ALOFA

Saunia e Brad Allred

Sa faaalia ia i matou e le meaalofa a lo'u tina le uiga moni o le Kerisimasi.

Le tuagane o lou Tina o Ed sa i ai pea lava se alofa susulu o le olaga. Ae paga lea, sa i ai foi ia te ia se pea o fatugao e le atoatoa. Mo ni nai tausaga, sa tolopo e Ed le le aoga o fatugao e ala i le faamamaina o le toto. O togafitiga sa tiga ma e fai soo. O togafitiga taitasi na tigaina tele ai o ia seja oo i le isi togafitiga e sosoo ai, ma e oo atu i le tautoulu o le 1995, sa foliga mai o ia ua pei lava o se atigi o lona tagata fiafia sa i ai muamua.

Na iu ina tau atu e le fomai ia Ed afai na te le maua vave mai se fatugao fou o le a le toe umi lona ola. E ui e na o le tasi se fatugao e mafai ona ola ai, e lei manao Ed e fesili atu i soo se

tasi ina ia foai mai se tasi o o latou fatugao ona o le tulaga lamatia e ono tulai mai i soo se taotoga. Peitai sa leai se filifiliga. Na sueina nisi o uo mamae ma tagata o aiga ia iloa ai pe tutusa o latou fatugao. E na o le tasi le tagata na tutusa atoatoa: le tuafafine o Ed, o Dottie—lo'u tina.

I le aso 7 o Tesema, o le toatele o uo ma aiga o Ed na aufaatasi i le anapogi ma tatalo mo ia ma Dottie. O fomai tipitipi na faia le taotoga o uso e masaga. E sili atu ona manaia, o se tasi o i laua na foai atu se fatugao mo le isi. Sa uunaia Ed ma lo'u tina ina ua iloina e faapea i taotoga taitasi, o nei fomai e toalua la te faia mea

uma la te mafaia ona la ifo lea o o la ulu ma tuu le taunuuga i aao o le Alii.

I le aso o le taotoga, na aveese ai e le fomai e toatasii se tasi o fatugao o lou tina. A o ia toe suiina o ia, na faapipii ma le faaeteete e lona uso le fatugao na foai mai i totonu o le manava o Ed.

Na faamanuiaina le taotoga, ae tatau ona faatalitali pe taliaina e le tino o Ed le fatugao fou. Sa taofia polotini i lona tino ina ia faaleleia atili ai ona avanoa, o lea sa tatau ai ona faaesea Ed i le vaavaaia ma le faaeteete ina ia puipuia o ia mai ni siama. E tusa lava pe tea o ia i tua, e tatau ona tumau pea le faaesea mai tagata uma sei vagana ai lona aiga patino. I le Po o le Kerisimasi, e ui i lea, na maua e Ed se faatagaga faapitoa e auai i le faamanatuina faaletausaga o le Po o le Kerisimasi a o'u matua matutua.

Ao faia se ufimata, sa savali mai Ed i le faitotoa, ma agai sa'o atu ia Dottie, ma afifi o ia i se opo maoae. A o la feopoai e le tasi le isi, e le'i toe i ai se mata na matutu i le pale. Na mafai ona lagona e tagata uma le alofa lea na susulu mai ia i laua. Na mafatia se tuafafine ina ia mafai ona tuuina atu i lona tuagane le meaalofa o le ola. O se meaalofa o le alofa, o se meaalofa o le taulaga, o se meaalofa e le mafai ona ia saunia mo ia lava.



"Aua ua faapea lava ona alofa mai o le Atua i le lalolagi, ua ia aumai mai ai lona Atalii e toatasii, ina ia le fano se tasi e faatuatua ia te ia, ae ia maua le ola e faavavau.

"Aua e lei auina mai e le Atua lona Atalii i le lalolagi ina ia faasala i le lalolagi a ia faaolaina le lalolagi ia te ia."

Ioane 3:16-17



A o ou vaai atu ia te i laua, ma loimata ua maligi ifo i lalo i ou foliga, na manino ia te au: e mafai ona avea lenei mea e faapei o le feiloai atu i le Faaola faafesagai. Sa ia faia se mea mo i tatou lea e le mafai ona tatou faia mo i tatou lava. Ua na o Ia, e paia, sa mafai ona ia onosaia se osigataulaga sa matuai maoae naua ua mafai ai ona faamalieina le tulafono o le faamasinoga tonu. Ma ua na o Ia, e atoatoa, sa agavaa e togiola mo agasala a tagata uma ina ia mafai ai ona tuuina atu le tulafono o le alofa mutimutivale ia i latou uma o e talia o Ia o lo latou Faaola.

A o ou mafaufau loloto i nei manatu, sa ou toe tautino ia te au lava ia e faia mea uma ou te mafaia e faaali atu ai lo'u agaga faafetai mo le Faaola ma Lana taulaga. O le a ou taumafai e ola ai i lo'u olaga i le avea ai ma se soo ina ia i ai se aso ou te agavaa ai e ulu atu i Lona afioaga, opo mai o Ia, ma faafetai patino atu ia te Ia mo le alofa tele mo au na mafai ai ona faia sea ituaiga o osigataulaga. ■

E alala le tusitala i Iuta, ISA.

FAASOAINA ATU O MEAALOFA

O le a le uiga o le taulaga alofa a le Alii ia te oe?

O ai e mafai ona faamanuiaina i se meaalofa o le alofa o le Faaola?

O ai e mafai ona e faasoa atu i ai le talalelei, ofoina atu i ai se savali o le faamoemoe, pe faasoa atu i ai le olioli o le vaitau?





Saunia e Peresitene
Boyd K. Packer
(1924–2015)

Peresitene o le Korama a
Aposetolo e Toasefululua

O se Molimau o le Faaola o **IESU KERISO**

I le taimi o lona 54 tausaga o se Pulega Aoao ma le lona 45 tausaga o se Aposetolo, o se molimau faapitoa “o le suafa o Keriso i le lalolagi atoa” (MF&F 107:23), na tuuina mai ai e Peresitene Packer lena molimau ma le lotomaualalo. A o lei maliu o ia i le aso 3 Iulai, 2015, na talosagaina e Peresitene Packer le faasoaina atu o nei tusiga mai i lana auaunaga i le Liahona. I le agaga o le vaitau o le Kerisimasi, latou te faamamafa atu ai lona molimau ma le alofa mo le Faaola o Iesu Keriso.

Ou te alofa i le Alii

“Ou te fiafia i le Kerisimasi. O loo i ai se agaga i le taimi o le Kerisimasi. Sa oo ifo i luga o le lalolagi—e le na o tagata o le Eklesia ae i le lalolagi atoa—o se molimau ma se mau o Iesu o le Keriso. . . . I le avea ai ma se auauna a le Alii, o se tasi o le Toasefululua, ou te iloa o Iesu o le Keriso. . . .

“Ou te alofa i le Alii. Ou te fiafia i Lana galuega. Ou te alofa i Le Eklesia a Iesu Keriso o le Au Paia o Aso e Gata Ai ma molimau atu ia te Ia o lo tatou Matai ma o la tatou Uo.”¹

O A'u o se Molimau ia te la

“E i ai nisi o mea e paia tele ma e faigata ona talanoaina. . . .


“Ua le ona o le lilo ae ona o le paia tele; e le tatau ona talanoaina, ae ina ia taukotoina

ma ia puipuia i se tulaga e sili ona loloto ma faaaloalo.

“Ua ou malamalama nei i le uiga o le faamatatalaga a le perofeta o Alema:

“. . . Ua tuuina mai i le toatele ia latou iloa mealilo a le Atua; e ui i lea ua tuuina i latou i lalo o se poloaiga saolele ia latou lē faaali atu ia mea e tau lava e tusa ai ma le vaega o lana afioga na te tuuina mai i le faanauga a tagata e tusa ma le gauai ma le filiga latou te tuu atu ia te ia.

“Ma o lea, o ia o lē e faamaaa lona loto, o ia lava lea na te maua le vaega ititi o le afioga; ae o ia o lē e lē faamaaaina lona loto, o ia lea e tuuina mai i ai le vaega tele o le afioga, seia oo ina tuuina mai ia te ia, ia ona iloa mealilo a le Atua, seia oo ina ia iloaina atoatoo’ (Alema 12:9–10). . . .



"O lenei, ua tatou tau fai mafaufau faatasi lava pe aisea ua tatau ai ona valaauna se tasi e pei o au nei i le tofiga paia o le aposetolo. O loo i ai le tele o tulaga manaomia e le o mafai ona ou maua. O loo ou matuai mafaufau lava ina ia auauna atu e tusa ma le mea o loo manaomia. E pei lava ona sa ou mafaufau i ai, sa na o le tasi lava le mea na ou iloa, o le pogai lea, ona o loo ia te au *lena* molimau.

"Ou te tau atu ia te outou ua ou iloa o Iesu o le Keriso. Ua ou iloa o loo soifua o Ia. Sa fanau o Ia i le vaeluaga o taimi. Sa aoaoina Lana talalelei, sa faaosooosoina, ma sa faasatauroina. Sa toetu o Ia i le aso lona tolu. O ia o le faapopolopolo o le toetutu. Ua ia te Ia se tino o aano ma ivi. Ou te molimau atu ai e tusa ma lenei tulaga. Ua avea au ma se molimau ia te Ia."²

Sa la Talaina le Sala

"Ao lumanaia le Faasatauroga ma tua atu, e toatele tamalii na tuuina atu ma le naunau o latou soifua i faatinoga lē manatu faapito o le lotonuu. Peitai e leai lava se tasi na feagai ma mea sa onosaia e Keriso. Sa i Ona luga le avega o agasala a tagata uma, o tausalaga uma o tagata. Ma totoe ai i se tulaga le mautinoa, le Togiola. E ala i Lona naunautai, sa mafai ai e le alofa mutimutivale ma le faamasinoga tonu ona toe faaleleia, lagolagoina tulafono faavavau, ma faataunu ai le puluvagaina lea semanu e le mafai ona togolaina le tagata pe ana leai.

"O Lana filifiliga na talia ai le sala e avea ma sui o tagata uma, mo le aofaiga atoa o amioleaga uma ma mea pi'opi'o; o le faasaua, ola le mama, o le faapi'opi'o, ma le talapepelo; o tuinanau; o fasioti tagata ma le faataugā ma le matautia—o mea uma na i ai po o mea uma o le a tulai mai i lenei fogaelee. I lona filifilia ai, sa Ia fetaiai ai ma le malosi matautia o lē ua le gata i le tino pe oo foi i ai tiga faaletino. O Ketese-mane Lena!

"Pe na faapefea ona faataunu le Togiola, tatou te le iloa. E leai se tagata ola na matamata a o Liliuese le amioleaga ma lafi i le maasiasi i luma o le

Malamalama o lena tagata e mama atoatoa. E le mafai e le amioleaga uma ona tape lena Malamalama. Ina ua maea ona fai le mea na fai, ua uma ai foi ona totogi le sala. Ua le taulau le aia a le oti ma seoli ia i latou uma o e ua salamo. Ua iu ina saoloto tagata. Ona mafai lea e tagata uma e ola ona filifili e mulimuli i lena Malamalama ma togolaina ai.

"O lenei taulaga e le i'u, 'e faaolaina tagata uma lava i [lenei] Togiola a Keriso, pe a tausia poloaiga ma sauniga o le Talalelei" (Mataupu Faavae o le Faatuatua 1:3).³

O Le Faiaoga Sili

"I le gasologa o au taumafaiga e aoao atu Lana talalelei, ua ou oo ina iloa ai o Ia, o Iesu Keriso, le Alo o le Atua, e Toatasi Na Fanaua e le Tama. Ou te tu ma le migao i Ona luma ma le loloto o le manatu i mea na Ia aoaoina, ma le loloto o le manatu i le ala na Ia aoao ai. E le mafai e soo se tasi o i tatou ona naunau e aoao atu e pei ona Ia aoao atu. E le mafai e soo se tasi o i tatou ona naunau ina ia faapei o Ia. O Ia e le na o se faiaoga; o Ia o le faiaoga sili."⁴

O Upumoni E Sili Atu Ona Taua Le Iloaina

"I le avea ai ma tagata soifua atonu e le mafai ma e moni lava e le mafai ona tatou malamalama atoatoa pe na *faapefea* ona faataunu e le Faaola Lana taulaga togiola. Ae mo le taimi nei e le taua tele le *pe faapefea* e pei o le *aisea* o Lona mafatiaga. Aisea na Ia faia ai mo oe, mo au, mo tagata ola uma? Sa ia faia ona o le alofa i le Atua le Tama ma tagata

uma. ‘E le sili lava le alofa o se tasi i lenei alofa ia tuuina atu e se tasi lona ola e sui a’i ana uo’ (Ioane 15:13).

“I Ketesemane na tuua ai e Keriso Ana Apostolo ia tatalo. Po o le lava le mea na tupu iina, e lava lo tatou malosi e iloa ai! Ae ua tatou iloa lava ua uma ona Ia faia le Togiola. Sa naunau o Ia Na te tauaveina i Ona lava lugia mea sese, ma agasala, ma tausalaga, o masalosaloga ma atuatuvaluga a le lalolagi uma. Na mafatia o Ia mo i tatou ina ia tatou le mafatia. E toatele tagata sa mafatia i pua-puaga ma ua oti i se oti e matautia le tiga. Ae o Ona mafatiaga e sili mamao atu i lo latou uma. . . .

“Na ese lava Ona mafatiaga mai isi mafatiaga uma na muamua pe talu mai foi ona Ia tauaveina i Ona lava lugia

E na o le Toatasi lava i tusi uma o le talafaa-solopito o tagata na matuai leai se agasala, na agavaa mo le tali atu i agasala ma solitulafono a tagata uma ma onosaia le tiga na o mai faatasi ma le tau mo i latou.

o faasalaga uma ua tuuina i le tagata. Vaai faalemafaufau i lena mea! E leai sana aitalafu e totogi. E leai sana mea sese na fai. Peitai, o le tauaofaiga uma o le tausalaga, o le faanoanoa ma le faavauvau, o tiga ma le faamaasia, o mafatiaga uma faalemafaufau, lagona, ma faaletino i le tagata—Na Ia oo i nei mea uma. E na o le Toatasi lava i le talatusia uma o talafaasolopito o le tagata, e matuai aunoa ma se agasala, e agavaa e tali atu mo agasala ma solitulafono a tagata ola uma, ma onosaia le tiga e o faatasi ai mo le totogiina.

“Na Ia ofoina atu Lona soifua ma fetalai, “Ona o A’u o lē ua aveina i o’u luga agasala a le lalolagi’ (Mosaea 26:23). Na faasatauroina o Ia; Na maliu o Ia. Sa le mafai ona latou aveeseina Lona soifua mai ia te Ia. Na finagalo malie lava o Ia e maliu. . . .

“Afafai na e tautevateva pe na e se i se taimi, afai ua e lagona ua faatagataotauaina oe e le fili, e mafai ona e agai i luma ma le faatuatua aua nei e toe fealualua’i solo i le

lalolagi. O loo i ai i latou ua saunia e toe taialaina oe i le filemu ma le saogalemu. O le alofa tunoa o le Atua, e pei ona folafolaina mai i tusitusiga paia, e oo mai ‘pe a uma mea uma e mafai ona tatou i faia’ (2 Nifae 25:23). O le mafai o lenei mea, ia te au, o le upu moni e sili ona aoga le iloaina.

“Ou te folafola atu e mafai ona oo mai le taeao pupula o le faamagaloga. Ona toe oo mai ai lea ‘o le filemu mai le Atua, o loo silisili lava i mea uma e manatu i ai’ (Filipi 4:7) i lou olaga, o se mea e pei o se la oso, ma oe ma Ia ‘e le toe manatua a [outou] agasala’ (Ieremia 31:34). O le a faapefea ona e iloa? O le a e iloa lava! (Tagai Mosaea 4:1–3.)”⁵

O La’u Molimau

“Mai tausaga uma ua ou ola ai ma aoao atu ma auauna atu, ma mai le faitau miliona o maila ua ou faimalaga ai i le salafa o le lalolagi, ma i aafiaga uma ua ou maua, e i ai se upumoni maoae ou te fia faasoatua atu. O lau molimau lea i le Faaola o Iesu Keriso.

“Na tusia e Iosefa Samita ma Sini Rikitone lenei mea ina ua mavae se aafiaga paia:

“Ma o lenei, ina ua mavae le tele o molimau ua tuuina mai e uiga ia te ia, o le molimau mulimuli lenei, i molimau uma, ma te tuu atu e uiga ia te ia: O loo soifua o ia!

“Aua sa ma vaai ia te ia’ (MF&F 76:22–23).

“Oa laua upu o au upu ia.”⁶

“O se faamanuiaga mo au i lou olaga atoa le mafai ona ou tuuina atu la’u molimau faapitoa o Iesu o le Keriso, le Alo o le Atua. Ou te molimau atu i le lotomaualalo uma, ae ma le mautinoa atoatoa, o Ia o le Alo e Toatasi Na Fanaua e le Tama. O Lana Ekalesia Lenei; o loo Ia pulefaamalumalu ai ma taitaia lenei galuega. O Ia o lo tatou Faaola. Ou te iloa o loo soifua o Ia, ma ou te iloa o Ia. Ou te molimau atu ai i nei mea i le suafa o Iesu Keriso, amene.”⁷ ■


FAAMATALAGA

1. “Our Witness of the Lord,” Aoaoga a General Authority, Tes. 5, 1974.
2. “E Molimau Atu i Le Agaga,” *Liahona*, Ian 1972, 10, 11.
3. “O ai Iesu Keriso?” *Liahona*, Mat. 2008, 15.
4. *Mine Errand from the Lord: Filifili mai Lauga ma Tusiga a Boyd K. Packer* (2008), 337.
5. “O Le Taulaga Paia ma le Le Faapitoau a le Faaola,” *Liahona*, Ape. 2015, 37–38; tagai foi “Truths Most Worth Knowing,” Faigalotu a le Church Educational System, Nov. 6, 2011.
6. “O le Molimau,” *Liahona*, Me 2014, 97.
7. Na tusia e Peresitene Packer lenei molimau faaiu ao le’i maliu o ia.

O IOSEFA SAMITA

MA LE TUSI O FAAALIGA

*Na fesoasoani le
Perofeta o Iosefa
Samita e aveese nisi
o mea lilo o loo
siomia ai i le tusi o
Faaaliga ma faaalia
lona talafeagai i o
tatou aso.*





ATA NA TUSIA E CHRISTINA SMITH; IOANE I PATAMO, SAUNIA E MARK STEINER © PROVIDENCE COLLECTION


Saunia e David A. Edwards

Mekasini a le Ekalesia

Na tusia le tusi o Faaaliga i le seneturi muamua T.A., peitai o le tusi mulimuli o le Feagaiga Fou ua taliaina o se kanona (tusitusiga paia faatagaina). Na fesiliglia e nisi o sikola Kerisiano i seneturi mulimuli ane le le mautonu i lona tusitala, tetei i nisi o ana aoaoga faavae (mo se faataitaiga, ana aoaoga e uiga i le Meleniuma po o lana aoaoga faapea o le a faamasinoina tagata e tusa ma a latou galuega), ma na faapea o faamatalaga fesootai ma tala o faaaliga o le Feagaiga Tuai e fou tele ma e matuai ese lava mai isi tusitusiga o le Feagaiga Fou.

Ae o nisi o mea moni e le mafai ona teena na taitai atu ai i le taliaina lautele o le tusi. Mo se faataitaiga, o le toatele o le au tusitala Kerisiano muamua lava na ta'ua le tusi o Faaaliga, ma na faapea e fesootai ia Ioane le Apostolo, ma na faaaogaina soo ma taliaina ona upusii ia latou tusitusiga. O nai isi tusi na taliaina o ni tusitusiga paia e lei mafai ona faapea le faamaoniga.

I le uluai seneturi lona 19, ina ua valaauna e le Atua Iosefa Samita o le Perofeta o le Toefuataiga, o le tusi o Faaaliga sa aofia ai i le lomiga atoa o le Tusi Paia ma sa toatele na faitauina. O le ata o le faaaliga a Ioane na matuā uunaia ai lava ia vaaiga faalema-faufau o tagata ma tulai atu ai i faauigaga eseese e





Ona o Iosefa
Samita, ua tatou
iloa ai na iloa e
Nifae o Ioane le
Talifaaaliga na tofia
ma muai faauuina e
tusia faaaliga o aso
e gata ai o loo ua
maua nei i le tusi o
Faaaliga (tagai i le
1 Nifae 14:19–29).

tele, e pei o loo faaaauau pea ona faia i le
taimi nei.

I le avea ai ma Perofeta o le tisipenisione
o le atoaga o taimi, sa i ai Iosefa Samita i se
tulaga ese e faasusulu atu le malamalamama i
le tusi o Faaaliga ma fesoasoani e faaitiitia
le faigata ona faitau ma malamalamama i ai. Sa
ia faia lenei mea i ni auala se lua: (1) sa ia
faamalamalamama mai ni vaega faapitoa o le
tusi o Faaaliga ma faalauteleina lona anotusi
atoa, ma (2) na ia faafaigofieina.

Faamalamalamama ma Faalautele

O le faataitaiga sili o le tuuina atu o se
faamalamalamaga o le tusi o Faaaliga e
Iosefa Samita o loo i le Mataupu Faavae ma
Feagaiga 77. Na maua ia Mati 1832, o lenei
faaaliga o loo i ai o se fesili-ma-tali e uiga
i fuaiupu faapitoa i le Faaaliga, mataupu e
4–11. Na saunoa mai le Perofeta o lenei faa-
malalamalamaga na faaali atu ia te ia ao ia faia
lana faaliliuga musuia o le Tusi Paia (tagai i
le MF&F 77, folasaga o le vaega).


O fesili e fai lava si tuusa'o, e faaautu lava
le fesili atu, "O le a le uiga o lenei mea?" ma
"Pe o afea o le a tupu ai?" O tali e faapea foi
le tuusa'o, e ui ina e le o i ai atoa faamata-
laga. O tali na sailia ma mauaina e le Pero-
feta o Iosefa Samita ua faamaonia ai nisi o
manatu le faavaea ma fesoasoani ai ia i tatou
e iloa pe faapefea ona fesootai le faaaliga a
Ioane i le galuega o aso e gata ai.

Mo se faataitaiga, e fesoasoani lenei faa-
aliga ia i tatou e iloa ai o faamaufaailoga e
fitu i le tusi na faamatala e Ioane i le mata-
upu e 5 o le Faaaliga ua faatusa i periota
faapitoa e fitu o le talafaasolopito o le lalo-
lagi ma o le lua mulimuli e faatatau i o tatou
aso ma luma atu (tagai i le MF&F 77:6–7),
ua fesoasoani ia i tatou e iloa ai pe aisea na
faaalu ai e le faaaliga a Ioane le tele atu o le

taimi i faamaufaailoga lona ono ma le fitu.
Ona faaaauau lea e le faaliga a Iosefa Samita
le faamalamalamaina pe faapefea ona fesoo-
tai nisi o faatusa i le faamaufaailoga lona ono
(agelu e fa ma auaua e 144,000 na faamau-
ina mai ituaiga o Israelu) i le galuega o le
Toefuataiga ma le faapotpotoina i aso e
gata ai (tagai i le MF&F 77:9–11).

O lenei faaliga na faamatalaina, o le mea
moni, e le na o le pau lea o le saofaga na
faia e le Perofeta o Iosefa Samita i lo tatou
malamalamama i le tusi o Faaaliga mai lana
faaliliuga o le Tusi Paia. A o galue o ia, o nisi
taimi sa musuia o ia e toe faaupuina le tusiga
ia sili atu ona manino,¹ ae sa masani lava foi
ona musuia o ia e faaopoopo pe toe iloilo
le tusiga ina ia mafai ona tusi ni sootaga i
isi mau ina ia latou faamalosia le tasi ma le
isi.² O se vaega o le galuega a Iosefa Samita
i le Tusi Paia, i le taimi lea, e foliga mai na
lalagaina se sootaga i le va o autu tutusa i
tusi o tusitusiga paia ina ia mafai ona tutusa
aoaoga ma valoaga i na tusi, ma o le tusi o
Faaaliga e leai se eseesega.

E le gata i lea, e ala i isi faaaliga ma faalili-
uga, o Iosefa Samita na faalauteleina le tusiga
o le tusi o Faaaliga i le faaalia lea e mulimuli
le tusi i se mamanu o le faasologa o faaaliga
na auilili ona tuuina mai i perofeta eseese i
tupulaga uma. I le Tusi a Mamona ma le Penina
Tau Tele, ua tatou aoao ai o Nifae, le uso o
Iareto, Mose ma Enoka na mauaina uma lava
ni faaaliga faapena e faaalia ai le ala lautele
o le talafaasolopito o tagata, e aofia ai le iuga
o le lalolagi. Ua tatou iloa foi e ui lava o isi
perofeta nei na faaalia i ai le iuga o le lalolagi,
sa faasaina i latou ona faasoaina atu i le lalolagi
aua na muai faauuina Ioane e tusiaina (tagai i le
1 Nifae 14:25–26). O lea la, o le Tusi a Mamona,
na oo mai e ala i le Perofeta o Iosefa Samita,
o loo aoaoina i tatou e tatau ona tatou maua



le faamatalaga a Ioane o mea e tutupu e tau atu i le Afio Mai Faalua o Iesu Keriso ma e aoga mo a tatou suesuega.

Ona o lena malamalama faaopoopo na faaalia mai ia Iosefa Samita, ua sili atu ona mafai ona tatou vaai i le faaaauauina o le autu o le Faaaliga: e faapea “o le a i ai se manumalo mulimuli ane i lenei lalolagi o le Atua i le tiapolo; se manumalo tumau o le lelei i le leaga, o le Au Paia i o latou fili, o le malo o le Atua i malo o tagata ma Satani. . . O le manumalo [o le a] ausia e ala ia Iesu Keriso.”³ E le gata i lea, o Iosefa Samita na faamamafaina mai o le savali o le Faaaliga e totonugalemu ia Iesu Keriso o le taulaiga o lo tatou faamoemoe ma aoaoina i tatou e faapea e ala i le faatuatua ia te Ia ma Lana galuega i aso e gata ai, e mafai ona tatou manumalo ai i le lalolagi.

Faamanino

I se konafesi a le Eklesia i le aso 18 Aperila, 1843, sa saunoa ai le Perofeta o Iosefa Samita, “O le tusi o Faaaliga o se tasi o tusi e sili ona manino ua faatagaina e le Atua ia tusia.”⁴ O lenei faamatalaga atonu na faateia ai lana au faalogologo talu ai e matuai feteenai i a latou lava aafiaga. O lea la le uiga o le saunoaga a le Perofeta?

O SE TASI O UPUSII E FIAFIA I AI IOSEFA SAMITA MAI LE TUSI O FAAALIGA

“O le agaga o le valoaga o le mau lea ia lesu” (Faaaliga 19:10).

O lenei faamatalaga a le agelu ia loane e fai soo e le Perofeta o Iosefa Samita. O se ki lea i le malamalama i le natura o le molimau e faapea foi ma le manaomia o valoaga ma faaaliga i le Eklesia ma i o tatou olaga faaletagata lava ia. Mo se faataitaiga, na saunoa mai Iosefa Samita:

“E le mafai ona oo mai le faaolataga e aunaoa ma faaaliga; e le aoga mo soo se tasi ona auauna atu e aunaoa ma faaaliga. E le o se fai-freau a lesu Keriso se tagata e aunaoa ma le avea ma se Perofeta. E le mafai ona avea se tagata ma se faifeau a lesu Keriso sei vagana ua i ai sana molimau ia lesu; ma o le agaga o valoaga lenei” (*Talafaasolopito o le Eklesia*, 3:389).

A o mautinoa lava le tatalaina e Iosefa Samita o nisi o mea lilo o le tusi o Faaaliga, i lenei lauga e foliga mai ua ia faamoemoe e faamaninoina. Sa ia faia lenei mea i le faaalia lea o le faalilolilo o le ata faatusa o le tusi e le matuai faalilolilo lava e pei ona tatou manatu ai ma o se tusitusiga paia e i ai se ata e le malamalama i ai e le faapea ua i ai se ttau po o se uiga sili atu mo i tatou.


Mo se faataitaiga, i se isi vaega i le lauga, na faaalia ai e Iosefa Samita o se faitauga ma le faaeteete o le tusi o Faaaliga e mafai ona tuuina i ai ni tapulaa i lona faauigaga. Sa ia ta’ua faapea o mataupu muamua e tolou o le tusi e faatatau i aso o Ioane ma “o mea e tusa ona vave ona oo mai” (Faaaliga 1:1) ma o le vaega o totoe o le tusi e nafa ma “mea e tusa ona tutupu amuli” (Faaaliga 4:1), po o le mavae ai o aso o Ioane.⁵ E ala i le faatutuina o ni tuaoi i le faatatauga o le ata i nei vaega o le tusi, o nei faatonuga e faatatau i nei vaitaimi ua faaititia ai le faalilolilo.

E le gata i lea, na aoao mai Iosefa Samita o nisi taimi o se meaola ua na o se meaola. Sa ia faamatala mai ina ua fai mai Ioane sa ia vaaia ia meaola i le lagi (tagai i le Faaaliga 4:6), o mea moni lava sa ia vaaia o . . . meaola i le lagi. Ona faamatalaina lea e le Perofeta faapea o nisi o

O Nisi o Mea Tatou Te Iloa e
UIGA I LE TUSI O FAAALIGA
Ona o JOSEFA SAMITA



Ona o le malamalama faaopoopo ua faaalia mai e ala mai ia Josefa Samita, ua sili atu ai ona mafai ona tatou malamalama i le autu o le Faaaliga i le manumalo o Keriso ma Lana Au Paia i le tiapolo ma le lalolagi.



1

Ua vaai loane i se fifatua ua fatolaloina.

Ua vaai loane i le taua.

Ua vaai loane i le oge.

Ua vaai loane i le oti.

Ua vaai loane i tagata na fasiotia mo Keriso.

LILIUESE

6

FAAALIGA 5–8

MF&F 77:6–7, 12

O faamaufaailoga e fitu e suitulaga i periota o taimi e fitu. O le lua mulimuli e faatatau i o tatou aso ma pe a mavae atu.

7

FAAALIGA 20:5

MF&F 76:81–85

O i latou e le toe tutu mai sia mavae le Meleniuma o i latou ia o le a maufofi i le malo telesitila.

Ina ua uma ona tatalaina le faamaufaailoga lona fitu, o le a toe afio mai Keriso, ma o le a faaumatiaina e amioleaga.

FAAALIGA 7:1–8

MF&F 77:8–11

O agelu e fa ma auauna e 144,000 na faamauinna mai ituaiga o Israelu e faatatau i le galuega o le Toefuataiga ma le faapotopotoina i aso e gata ai.



O le a faamamaina le lalolagi, ma o le a amataina le Meleniuma (tagai i le MF&F 88:89–110).

FAAALIGA 20:2

1 NIFAE 22:26

O le a noatia Satani i le taimi o le Meleniuma “ona o le amiontu o tagata o [Keriso].”

TOETU

TOEFUATAIGA

FAAALIGA 12:4, 7–9

MF&F 29:36–37; 76:25–29

Faaaliga a loane faapuupuu le toe foi i tua i le taua o le muai olaga i le lagia ina ia faamamafa atu le taua faifai pea i le lalolagi i le va o au o le Atua ma Satani.

“O le a mavae atu le lalolagi e peiseai o se afi”

(tagai i le MF&F 43:32–33).

“O au foi o loane na ou iloa le aai paia o Ierusalem fou, ua alu ifo mai le Atua i le lagia” (Faaaliga 21:2). *O lenei mea e mafai ona faatatau i le toe foi mai o le nuu o Enoka* (tagai i le Mose 7:63).

O tusi (i le lalolagi ma i le lagi) ia o le a faaminoina ai tagata i a latou galuega e aofia ai faamaumauga e faatatau i le faaolataga o e ua maliliu.

FAAALIGA 17:5

1 NIFAE 13:6; 14:10

O le vaega ua faailoa
mai e loane o le "Pape-
lonia le aai tele, le tinā o
fafine talitane ma mea
inosisa" o le ekalesia a le
tiapolo. O lenei ekalesia
e aofia ai malosiaga uma
e teteē ia lesu Keriso,
Lana talalelei, ma Lana
Ekalesia, aua ua na o le
lua ekalesia: o le Ekalesia
o le Tamai Mamoe a le
Atua ma le ekalesia a le
tiapolo.



faamatalaga a Ioane o ana faaaliga e moni lava ao isi e faafaatusa.⁶ Sa ia faamatala mai foi se mataupu faavae e faatatau i na faatusa:

"Soo se taimi lava na tuu mai ai e le Atua se ata faatusa, po o se meaola, po o se faatusa o soo se ituaiga, o Ia lava i taimi uma e nafa ma le tuuina mai o se faaaliga po o le faaliliuga o le uiga, i se isi itu tatou te le nafa pe tali atu foi mo lo tatou talitonuga i ai. Aua le fefefe i le faasalaina mo le le iloaina o le uiga o se faaaliga vaaia po o se faatusa, pe afai e lei tuuina mai e le Atua se faaaliga po o se faaliliuga o le mataupu."⁷

O le iloaina o le faaliliuga o le auiliiliga uma o faaaliga vaaia faalilolilo e le o le faatutumumuga lea o a tatou suesuega o tusitusiga paia. E le tutusa mea lilo o le gagana faafaatusa a perofeta ma mea lilo a le Atua, lea e tuu atu i le tagata e "salamo ma faa-aoga le faatuatua, ma fai galuega lelei, ma tatalo pea e le aunoa" (Alema 26:22).

E ala i le faamaninoina o le tusi o Faaliga, na aveese ai e le Perofeta ni mea faalavefau mai mea e sili atu le taua o le talalelei a Iesu Keriso. Ioe, o le faaaliga a Ioane ua tatou maua ai faamatalaga taua e uiga i aso e gata ai: le Liliuese ma le Toefuataiga, le Afio Mai Faalua o Iesu Keriso, Lona manumalo i le tiapolo, Lona nofotupu faameleniuma, ma le Toetu ma Le Faamsinoga Mulimuli. O nei mea e mafai ona fesoasoani ia i tatou ao tatou taumafai e saili le upu moni ma mulimuli i le finagalo o le Alii. Ae afai tatou te taulai tele atu i se faamatalaga patino o se faatusa o loo faamatala mai i lena faaaliga, e mafai ona tatou misia mea e sili ona taua.⁸

A o tatou suesue i le tusi o Faaaliga
ma faaaoga le malamalama matagofie ua

faasusulu i ai e le Perofeta o Iosefa Samita, e mafai ona tatou vaai po o fea tatou te tutu ai i le tulaga lautele o le talafaasolopito o le lalolagi ma le fesootaiga a le Atua ma Ana fanau. O le iloaina o lenei mea, e mafai ai ona tatou vaai i le taua o a tatou molimau patino ia Iesu Keriso ma o le auai atoatoa i Lana galuega i aso e gata ai. Ona mafai lea ona tatou manumalo i le lalolagi ma, faatasi ma Keriso, mautofi i mea uma mai le Tama (tagai i le Faaaliga 3:21; 21:7). ■

FAAMATALAGA

1. Tagai, mo se faataitaiga, Faaaliga 2:1, vaefaaamatalaga *a*; po o le Faaaliga 6:14, vaefaaamatalaga *a*.
 2. Mo se faataitaiga, o le faamatalaina e Iosefa Samita o le Faaaliga 1:7 e faitauina faapea: "Faauta, e afio mai o ia iao ma le sefulu o afe o lana au paia i le malo, ma ua faaoofuina i le mamalu o lona Tama. E iloa atu foi o ia e mata po tagata uma; atoa ma e tuia na tuia o ia, e taufaitagitu foi ituaiga uma o le lalolagi ona o ia." O upu na faaoopoopo e Iosefa Samita (i le faatusilima) e faafesoota lenei fuiapu ma isi aaooga faatusisiga paia e uiga i le Afio Mai Faalua o Keriso—mo se faataitaiga, Mataio 16:27 ("le mamalu o lona Tama") ma Iuta 1:14 ("ma ona au paia e manomano").
 3. Bible Dictionary, "Revelation of John."
 4. *History of the Church*, 5:342.
 5. O le mea moni, e pei ona silafia e Iosefa Samita, o le lima muamua o faamafaailoga e fitu ma mea na tutupu o le taimi ua tuanai, ae o nei mea ua aaoao mai e uiga i le autu o se faamoemoega po o se faaiuga o le talafasolopito or tagata, na faamaeaina i mea na tutupu e tau atu i le afio Mai Faalua—inua leva ona mavae atu aso o Ioane.
 6. I lenei faataitaiga patino, o manu vaefa latou lava ia e moni, e fai mai sui o manu e fa taitasi, a o *faamatalaga* a Ioane o i latou o loo i ai ni vaega faafaaatusa (ni mata ma apaua) fai mai sui o latou uiga nai lo o latou foliga vaavia (tagai i le Faaaliga 4:6–8; MF&F 77:4).
 7. *History of the Church*, 5:343.
 8. Na lagona moni lava e Iosefa Samita le moni o lenei mea e faapitoa lava mo faifeatalai. Sa ia saunoa mai: "E, outou e toeaina o Israaelu, faafolog mai i lo'u leo; ma pe a auina atu outou i le lalolagi e talai atu, tau atu na mea ua auina atu outou e tau atu; talai atu ma alaga leotele atu, 'Ia outou Salamo, ua ua lata mai le malo o le lagi; salamo ma talitonu i le Talalelei.' Folafola atu uluai mataupu faavae, ae tuu ai pea mea lilo latou ia, ina nei lafotuina outou. Aua lava nei fefinuaii i faaaliga vaaia o manu ma mataupu tou te le malamalamai ai" (*Talafasolopito o le Ekalesia*, 5:344).

Saunia e Scott H. Knecht
Seminare ma Inisitituti

O Le Fai Atu Fesili São i le Ala São

*Aoaoina o le
auala e saunia
ai mo le, fatuina,
fesili atu, ma tali
i fesili e mafai ona
faia se eseesega
tele i le auala e
aoao mai ai ma
aoao atu ai le
talalelei.*

Oloo i ai le tele o mea e mafai ona alu i totonus o le fausiaina o se lesona maoae po o se talanoaga maoae o le aiga. O gaoioiga, suesuega filemu, ma le galulue faatasi ma vaega o ni nai meafaigaluega a faiaoga o le talalelei—pe o i latou o i ai ni valaauga aloaia, faiaoga volenitia o le seminare po o le inisitituti, po o matua—atonu e faaaogaina e faaleleia ai a latou aoaoga.

Ae e aofia ai tomai e manaomia e lua pe tolu e tatau ona maua e faiaoga uma o le tomai lea e faaaoga lelei ai fesili: e fatu ai i latou, e fai atu ai, ma e uunaia ai tali anoa. Na saunoa mai Peresitene Henry B. Eyring, le Fesoasoani Muamua i le Au Peresitene Sili, “O le fai atu, ma le taliina o fesili o le totonugalemu lea o aoaoga uma lava ma le aoao atu uma lava.”¹ Ina ia avea ma se fai-aoga mataalia, e matuai taua tele le mauainia o lenei tomai. O ni fautuaga nei e lima mo le faia o lena lava mea.

Saili Tali e Sili Ona Aoga

O le nofo ai i se vasega i le avea ai ma se tagata aoao ma faalogologo i se fesili maoae e faamanatu mai ai ia i tatou le mana o le aoao atu e silisili ona lelei. Ae o le auala

e fatufatu ai ma fai atu ai fesili aoga ua le mautonu lea ma e foliga taufaafefe i le tele o faiaoga. O le mea e lelei ai, o se tomai e mafai ona aoaoina e soo se faiaoga.

A o e fatuina ni fesili, taumafai e fuafua po o a ituaiga tali o le a maua mai i le fesili. O nisi fesili e saili ai se ituaiga faapitoa o tali—se tali e fetaui tonu lava i le fesili na fai. O na fesili e fetaui lelei i se vasega o le matematika (“O le a le eria o lenei sikuea?”) po o se vasega o le saienisi (“O le a le fua e puna ai le vai?”) aua e na o le tasi le tali ua maua ma faamaonia. E aoga foi i le suesueina o le talalelei o se auala e faatulaga ai mea moni e amata ai se talanoaga ae laitiiti se aoga e faa-osophia ai se talanoaga i le vasega. I se tulaga lautele, e ui i lea, o na ituaiga o fesili e faa-aoga soo ona e faigofie ona saunia.

Tatou te fai atu fesili e pei o, “O le a le mea na tatou suesue i ai i le taimi ua tuanai?” po o le “Tau mai ia te au le igoa o le . . .” O nei fesili e masani ona tupu ai le le tali mai o i latou o loo e aoaoina. Latou te manatu latou te iloa le tali ae e le o mautinoa ma ua fefefe e taumafai se mate. E masani ona faamatala lenei filemu e le faiaoga o se faailoga o le faigata tele o le fesili, ae o le mea moni o le



fesili ua maoti tele e maua mai ai se mea e sili atu ona anoa mai tagata o loo aoaoina nai lo o se tali vave.

Ina ia mafai ona faaosofia le talanoaga i le potuaoga, o se fesili e sili atu ona aoga o se fesili e valaaulia ai le eseese o tali magafagafa. Pe a e fai atu lenei ituaiga o fesili, e mafai ona e iloa ai mea o loo mafaufau i ai i latou o loo e fesili i ai e uiga i le mataupu po o mea o loo latou felafolafoai ai i le taimi o la outou talanoaga. Mo se faataitaiga, Moronae mataupu 1 o loo i ai ni fuaiupu se fa, o fuaiupu taitasi ua tumu ini lagona loloto. O le a le mea e tupu pe a e faiatua uma fuaiupu e fa ma i latou o loo e aoaoina ma fesili atu, "O fea o na fuaiupu na mafua ai ona e maua ni lagona e sili ona loloto i lou loto?" Tuu atu ia i latou se minute e amata ai ona talanoa. Talu ai e te le o fesili mo se tali patino, toeiti-iti lava o mea uma lava latou te fai atu e aoga. Na ou faaaogaina lena lava mataupu i le fesili tonu lava lena ma maua ai ni tali ofoofogia na faatupuina ai ni talanoaga loloto.

O ituaiga o fesili na e valaaulia ai mafaufau ma lagona e ese mai fesili e manaomia ai le manatua pe na o se faamatalaga o mea moni. O loo i ai se taimi ma se nofoaga mo le manatua, ae e mafai ona fai atu e le faiaoga le tele o mea e tatau ona manatua, e pei o, "Manatua le taimi mulimuli na

tatou talanoa ai e uiga i le Moronae 1 ma le ala na maua ai i fuaiupu taitasi ni lesona mamana. . . ." I le na o le fai atu o lena mea, o le a faatupu ai manatu, ma o tagata o loo aoaoina o le a sili atu ona feosofi mai ma faaauau le talanoaga. Ae ui i lea, afai ou te fai atu, "O le a le mea na tatou talanoa i ai i le taimi mulimuli?" O le a masani lava ona ou feiloai ma le filemu ma faailo e le iloa le tali.

Fai Atu le Fesili Lona Lua

O se fesili masani e faaaoga e faiaoga o le talalelei o ni suiga o lenei mea: "E faapefea la ona taua le faatuata i lou olaga?" I le taimi muamua e foliga mai o se fesili taua, ae afai e te mafaufau i ai, e na o le tasi lava le tali: "E taua tele." E moni, o le faatuata (ma soo se isi mataupu faavae) e taua tele, ae o lena ituaiga o fesili e masani lava e leai se taunuuga pe a nao ia lava aua e tatau pea ona e fai atu le fesili tulitatao, o se mea e pei o le: "Aisea e taua tele ai?" po o le "E mafai ona e tuuina mai ia i tatou se faataitaiga o se taimi na taua ai i lou olaga?"

O na fesili e mafai ona amata ai se talanoaga i le vasega, o lea e tatau ona fai sao atu ae faamisi le fesili muamua. O le fai atu o le fesili lona lua o le a faasaoina le taimi ma faatumauina ai le faaleleia atili o le talanoaga.

Tusi Au Fesili Muamua

E matuai aoga lava le faia o mea e lua a o e saunia lau lesona. Muamua, tusi le fesili i se pepa. Aua le na o le mafaufau i ai; tusi i lalo. Filifili ma le faaeteete upu ma faiatua i ai mo ni nai taimi ina ia mautinoa ua fai atu e le fesili le mea e te manao e fesili atu ai i se auala manino.

Lona lua, fesili ia te oe lava, o le a le mea o le a fai e i latou o loo ou aoaoina pe a ou fai atua lena fesili? Na i ai taimi sa ou manatu ai na i ai sau fesili lelei lava ua tusia, ona ou faia le leotole, ma a o ou vaai faalemafaufau i la'u vasega, sa ou iloa ai o le a leai se taunuuga lelei. E mafai ona lelei le fesili mo se isi vasega, ae mo la'u lava vasega faapitoa sa ou iloa o le a le manuia, o lea sa ou toe amata ai. Ou te iloa afai e i ai ni au fesili se lua pe tolu ua matuai lelei-on a mafaufauina ma lelei ona tusitusia i lau fuafuaga o le lesona, e mafai ona ou amataina ni talanoaga. O le a masani lava ona mulimuli mai ai isi fesili, ae e tatau ona ou mamanuina lelei ni vaega amata.

E aoga foi lenei auala i le aiga. E foliga mai e tele ni a tatou talanoaga o le talalelei e tupu fua mai i lo'u aiga pe a sologa lelei fesili ma tali, ae na i ai taimi pe a i ai se mea e sili atu ona ogaoga ma tuusao e manaomia ona fai atu i se tamaitiiti faapitoa. I na tulaga sa ou aoaoina afai ou te saunia ai ni fesili faapitoa, ma aoaoina le



tuuina atu, ma galue i ata o taunuuga e ono i ai, na sili atu ona lelei mea uma. O na fesili e lei tusia i luga o pepa; na tusia i lo'u loto, ma e mafai ona ou faaaogaina pe a manaomia.

Aua le Fefe i le Leai o se Tali

Afai na e fatuina se fesili e matuai lelei moni lava, se tasi e afua ai ona mafaufau ma faatagaina ai ni avanoa mo ni tali se tele, ona aua lea le ofo pe afai e manaomia e tagata ni nai sekone e sue ai ni a latou tali. E mafai ona i ai se filemu, ae aua le faateia. Fesili Laualuga—ia e manaomia ai ni tali faapitoa (faataitaiga, “E fia Mataupu Faavae o le Faatuatua o i ai?”)—e vave ona tali mai. Fesili loloto—ia e manaomia ai tali—e masani ona manaomia le taimi e mafaufau ai tagata aoao. I lenei tulaga, o le filemu o lau uo. Ia tuu atu ina ia tupu, ma pe a amata ona o i latou o loo e aoaoina e tali atu ai, o le a e fiafia le ofo i mea latou te fauina.

Fai atu Fesili e uiga i Tusitusiga Paia

Afai e te manao moni lava e faalau-tele lou tomai e fatufatu ai ma fai fesili mataalia, e tatau ona e aoao e fai atu fesili lelei e uiga i tusitusiga paia i lou taimi e suesue ma sauniuni ai.

O se tasi auala o le faitauina o tusi-tusiga paia o le faia lea mo le uunaiga faaletagata lava ia. Tatou te faitau i mataupu ma fuaiupu e olioli ai i le matagofie o loo i ai i totonu, ma ia faagaeetia ai i mataupu faavae ma le upumoni. O se auala e ese, e sili atu ona aoga mo matua po o faiaoga i le sauniaina o lesona, o le faitau i tusi-tusiga paia ma sailia tusitusiga paia i fesili. Ou te faia lenei mea e faaosofia



ai ni manatu a o ou taumafai e filifili le auala sili e fesoasoani ai ia i latou o loo ou aoaoina ia malamalama i tusitusiga paia. O se faataitaiga lenei: Mataupu Faavae ma Feagaiga 18:10 o loo i ai se fuitau lea ua laulioa ma e siitia o tatou agaga, “Ia manatua ua tele lava le taua o agaga i le silafaga a le Atua.” Ou te fiafia i lena mataupu faavae, ae afai pau lava le taua ia te au o le musuia ai, ona le aoga lea i se vasega.

Ae faapefea pe a ou mafaufau loloto i lenei fesili a o ou suesue ma saunia: “O le a la le taua o se agaga? Ou te iloa e ese le taua, ae pe mafai ona tatou tuu i ai se tulaga faataua-inia?” I se tasi po i le aiga o le afiafi sa fai mai ai e se tasi o o'ufafine lena lava fesili, ma na faaosofia ai le tele o talanoaga. O le mea lenei na matou faaiu i ai: O le taua o se agaga o le tau lea o le a totogi e se tasi mo ia, ma o le a le tau na totogi e lo tatou Tama mo o tatou agaga? Na ia totogia i le toto o Lona Alo atoatoa. O le mea lena ua taua tele ai agaga taitasi e le mafai ona faamatalaina. E le mafai ona matou taunuutu i lena faaiuga e aunoa ma le fesili tuusao atu i le tusiga lava ia.

E mafai ona faigofie ona faaaoga lena talanoaga i le laulau ai i isi nofoaga o le aoao atu. Afai e te manao e fai atu ni fesili e sili atu ona lelei i e o loo e aoaoina, fai atu fesili moni e uiga i tusitusiga paia a o e faitau ma suesue ma saunia. Ia tumu i le fialo, ma aua le fefe i le sailiili loloto. O tusitusiga paia e mafai ona tumau pea le moni e tusa lava pe faateleina le suesueina. O le faateleina o lou lelei o le faia o fesili e uiga i tusitusiga paia a o e suesue, o lou lelei foi lena i le faia o na fesili lelei ia i latou o loo e aoaoina.

Faaauau Pea Ona Atiina Ae Lou Tomai o le Aoao Atu

O loo i ai se faiga masani o le vaai i ni faiaoga maoae ma mafaufau na latou fananau mai lava faapena. Latou te foliga mai o loo i ai se meaalofa o le a faigata mo le tele o tagata ona maua. Ioe, o le tomai e aoao atu o se tasi o meaalofa o le Agaga (tagai i le Moronae 10:9–10), o lea la o nisi o tomai ua e vaaia atonu o se meaalofa mai le lagi—ae o se meaalofa e tatala ia i latou uma o e saili atu i ai. O le mea lea o mea e fai e faiaoga maoae o loo avanoa foi ia te oe e ala i le suesue ma le faataitai. O le aoao e fai atu ni fesili aoga o se matuai tomai lava. A o e saili ma le agaga tatalo le tomai e faia ai lena mea, o le a e iloa ai e taua tele le fatuina o fesili ia e faaosofia ai i latou o loo e aoaoina e mafaufau, ma o le a faateleina ai lou tomai e faia lena lava mea e tasi. ■

E alala le tusitala i Kalefonia, ISA.

FAAMATALAGA

1. Henry B. Eyring, “The Lord Will Multiply the Harvest” (lauga o le faasalalauga i le satelite i faiaoga o Church Educational System, Feb. 6, 1998), 5–6.



O se vaega o LANA
fuafuaga, na faatuina ai e le Tama
le feagaiga fou ma tumau faavavau ina ia
mafai ai e Ona atalii ma afafine ona toe
foi atu i Lona afioaga ma maua
ai le ola e faavavau.





Saunia e Elder
Marcus B. Nash
O Le Fitugafulu

O LE Feagaiga FOU MA TUMAU FAAVAVAU

A tatou malamalama ma ola e tusa ai ma le feagaiga fou ma tumau faavavau, o le a tatou mau tofi i le ola e faavavau.

O le Faamoemoega o le Olaga

O tagata soifua taitoatasi o se atalii po o se afafine pele o ni matua faalelagi.¹ O le ata o le faaolataga a le Tama Faalelagi ua saunia ai le avanoa mo tagata uma e maua le ola e faavavau, lea e taitaia e le Atua.² E leai se meaalofa e sili atu.³ O le malamalama i le fuafuaga o le faaolataga ua faamatalaina mai ai le faamoemoega o le olaga ma, afai tatou te filifilia, o le a taitaia i tatou i le faia o faaiuga mai se vaaiga e faavavau.

O le fuafuaga ma lona taua i le olaga faitino sa faamalamalama mai ma le mamana maoae i se tusiga o le *Liahona* o Oketopa 2015 i le mataupu na saunia e Elder Robert D. Hales o le Korama a Aposestolo e Toasefululu.⁴ O se vaega o Lana fuafuaga, na faatulagaina e le Tama le feagaiga fou ma tumau faavavau ina ia mafai ai e Ona atalii ma afafine ona toe foi atu i Lona afioaga ma mautofi ai i le ola e faavavau.

I Lana faatomuaga i le Mataupu Faavae ma Feagaiga, na fetalai mai ai le Alii: “O le mea lea, o A’u o le Alii, ona ua Ou iloa le malaia o le a oo mai i luga o e o nonofo i le lalolagi, na Ou vala’au atu ai i luga o la’u auauna o Iosefa Samita, Laitiiti, ma tautala atu ia te ia mai le lagi, . . .



"Ina ia mafai ona faatuina la'u feagaiga tumau-faavavau."⁵

O lenei feagaiga, e masani ona ta'ua e le Alii o le "feagaiga fou ma tumau-faavavau," e aofia ai le atoatoaga o le talalelei a Iesu Keriso, e aofia ai sauniga uma ma feagaiga e tatau ai mo le faaolataga o tagata.⁶ E ui lava o le faatulagaina o le feagaiga fou ma tumau-faavavau a le Alii i le lalolagi o se faamoemoega autu o le Toefuataiga, e le malamalama nisi o le Au Paia o Aso e Gata ai i le taua o le feagaiga ma le folafolaga o mea lelei e oo mai mo i latou o e ola ai. O le faamoemoega o lenei tusiga e fesoasoani ia i tatou taitoatasia sili atu ona malamalama ma ola e tusa ai ma le feagaiga fou ma tumau-faavavau, ina ia mafai ona tatou maufofi ai i le ola e faavavau. O le a faamalamalamaina ai foi pe faapefea e se tasi o sauniga ma feagaiga o le talalelei e sili ona taua—faaipoipoga e faavavau—ona avea o se vaega o le feagaiga fou ma tumau-faavavau o le talalelei.

O le Uiga ma le Faamoemoega o le Feagaiga Fou ma Tumau Faavavau

O se feagaiga i le uiga o le talalelei o se maliega, se konekarate, po o se ioega i le va

*O le feagaiga fou
ma tumau faavavau
"o le tuufaatasiga
atoatoa o feagaiga
o le talalelei ma
avanoa."*

o le Atua ma se tagata (po o tagata) o e mauaina sauniga o le perisitua o loo faatinoina e ala i se tasi o i ai le pule o le perisitua ma e finalo malie e usitai i tuutuuga ma aiaiga o lea feagaiga. O nei tuutuuga ma aiaiga ua faatuina e le Atua.⁷

O le feagaiga fou ma tumau-faavavau "o le tuufaatasiga atoa o feagaiga uma o le talalelei ma matafaioi uma"⁸ na tuuina mai anamua⁹ ma na toefuatai mai i le lalolagi i nei aso e gata ai. O lenei faaaliga o loo tusia i le Mataupu Faavae ma Feagaiga 66:2: "E moni Ou te fai atu ia te oe, amuia oe i le talia *o la'u feagaiga tumau-faavavau, e oo lava i le atoatoaga o la'u talalelei*, ua auina atu i le fanauga a tagata, ina ia mafai ona latou maua le ola ma avea ma e mauaina mamalu o le a faaalia i aso e gata ai, e pei ona sa tusia e perofeta ma apusetolo i aso anamua."¹⁰ Ona ua toefuatai mai le feagaiga i le tisipenisione mulimuli o taimi, e "fou," ma talu ai e oo atu i le faavavau atoa,¹¹ e "tumau-faavavau."

I tusitusiga paia na fetalai mai ai le Alii o "le" feagaiga fou ma tumau-faavavau ma o "se" feagaiga fou ma tumau-faavavau. Mo se

faataitaiga, i le Mataupu Faavae ma Feagaiga 22:1, ua Ia faatatau i le papatisoga e avea o “se feagaiga fou ma tumau-faavavau lenei, lea lava sa i ai mai le amataga.” I le Mataupu Faavae ma Feagaiga 132:4, sa Ia faapea foi ona faatatau i le faaipoipoga o “se feagaiga fou ma tumau-faavavau.” Pe a Ia fetalai i “se” feagaiga fou ma tumau-faavavau, ua Ia fetalai e uiga i se tasi o le tele o feagaiga na aofia i Lana talalelei.

Pe a fetalai le Alii i “le” feagaiga fou ma tumau-faavavau, o loo Ia fetalai e uiga i le atoatoaga o le talalelei a Jesu Keriso, lea e aofia uma ai sauniga ma feagaiga e manaomia mo le faaolataga ma le faaeaga o le tagata. E le o le papatisoga po o le faaipoipoga o “le” feagaiga fou ma tumau faavavau; nai lo lena, o i laua uma o ni vaega o le mea atoa.

O i Latou e Tumau e Oo i le luga i le Feagaiga Fou ma Tumau Faavavau e Maua le Ola e Faavavau

O faamanuiaga sili ma le faavavau ua folafola mai ia i latou e maua sauniga o le talalelei e fai a i le pule tatau o le perisitua ma faamanuiaga e le Agaga Paia o le Folafolaga,¹² ma o i latou e tausia feagaiga paia e faatatau i sauniga. O nei faamanuiaga e aofia ai le faamagaloga o agasala,¹³ le mana o le amioatua,¹⁴ ma le mafutaga a le Agaga Paia,¹⁵ faatasi ai ma le taitaiga, musumusuga, faamafanafanaga, filemu, faamoemoe, ma le faapaiaina e oo mai faatasi ma lena meaalofa.¹⁶

O faamanuiaga ma meaalofa silisili a le Atua o le ola e faavavau—o le olaga lea o loo soifua ai le Atua!¹⁷ O lenei meaalofa e tuuina atu na o i latou lava o e mauaina sauniga uma o le talalelei ma ola ai i le feagaiga o loo aofia ai i totolu o le feagaiga fou ma tumau faavavau.¹⁸ I afioga a le Alii: “Ma e faatatau i le feagaiga fou ma tumau-faavavau . . . sa faatuina mo le atoatoaga o lo‘u mamalu.”¹⁹ E moni lava, o i latou o e ulu atu i le feagaiga fou ma tumau-faavavau, ma tumau e oo i le iuga “O le a tutulai mai i le uluai tote-tutu . . . ma o le a mautofi i nofoalii, malo, itumalo, ma mana, ma puleaga, o mea maualuluga uma ma loloto.”²⁰ Na malosi lava le folafola mai e le Alii e faapea “o le a fai ia te i laua mea uma i soo se mea e tuu atu e la‘u auauna i luga o i laua, i le taimi nei, ma i le faavavau atoa; ma o le

a taulia atoatoa pe a i ai i laua i fafo o le lalolagi; ma o le a laua pasi atu i agelu ma atua, o e ua faatutu iina, i lo laua faaeaga ma mamalu i mea uma, e pei ona faamauina i luga o o laua ulu, o le mamalu lea o le atoatoaga ma le faaauauina o fanau e faavavau ma faavavau lava. Ona avea ai lea o i laua ma atua.”²¹

I se aotelega, o i latou o e ulu atu i le feagaiga fou ma tumau-faavavau ma tumau ai e oo i le iuga o le a (1) maua le atoatoaga o le mamalu o le Atua, (2) olioli i le mana o le amioatua i le taimi nei ma le faavavau,²² (3) faaeaina,

(4) olioli i le faaipoipoga e faavavau ma le faateleina, ma (5) avea ma atua. I le tuu faatasia, o nei faamanuiaga o le taunuuga o le mealofo a le ola e faavavau.

○ faamanuiaga sili
ma le faavavau ua folafola
mai ia i latou e maua
sauniga o le talalelei.

E tatau Ona tatou Usiusitai i Feagaiga Taitasi i Totonu o le Feagaiga Fou ma Tumau Faavavau

Na manino lava le folafola mai e le Alii tatou te maua nei faamanuiaga faalelagi pe a tatou usiusitai i Ana tulafono e pei ona faatulagaina i le feagaiga fou ma tumau faavavau: “O le feagaiga fou ma tumau faavavau . . . na faatuina mo le atoatoaga o lo‘u mamalu; ma o ia o lē e mauaina lona atoatoaga e ao ma tatau ona mau i le tulafono, po o le a tausalaina o ia, ua fetalai mai ai le Alii le Atua.”²³ Sa ia tautino mai foi, “Aua o i latou uma o e e fia mauaina se faamanuiaga i lo‘u lima ia mau i le tulafono na tofia mo lena faamanuiaga, ma ona tulaga, e pei ona sa faatutuina mai i luma atu o le faavaega o le lalolagi.”²⁴ I le vaega lava lea e tasi o le Mataupu Faavae ma Feagaiga, sa toe ta‘ua ai e le Alii lenei manatu: “E moni, e moni, Ou te fai atu ia te outou, vagana ua outou ola i la‘u tulafono e lē mafai ona outou maua lenei mamalu.”²⁵

O le mea e manaomia moni lava o le tatau ona tatou usiusitai i tulafono a le Atua ina ia mafai ona maua le mamalu ua Ia ofoina mai i e faamaoni e faatatau i sauniga ma feagaiga uma i totolu o le feagaiga fou ma tumau faavavau. Mo se faataitaiga, afai ou te le maua le sauniga ma tausia feagaiga o le papatisoga, o le a tausalaina au, o lona uiga, ou te le mafai ona ou alualu i luma—e le mafai ona ou mautofi i le atoatoaga o Lona mamalu. E faapena foi pe afai ou te le

mauaina sauniga o le malumalu ma tausia feagaiga e faataau i ai po o, le moni lava, pe afai ou te musu e talia soo se tasi o sauniga o le talalelei po o lou musu e ola ai i soo se tasi o feagaiga e faatatau i ai, e le mafai ona ou faaeaina. Nai lo lena, o le a tausalaina au, o lona uiga o lo'u alualu i luma o le a taofia. I se faapuupuuga, e tatau ona ou maua uma sauniga o le talalelei ma ola ai i feagaiga uma e faatatau i ai pe afai o le ola e faavavau o lou naunautaiga lea.

O tuutuuga o feagaiga ua tatou ioe e ola ai o ni Au Paia o Aso e Gata Ai e mafai ona faavasegaina i ni vaega se fa: (1) e ave i o tatou luga le suafa o le Faaola, ia manatua pea o Ia, ma ia mulimuli i Ana fataitaiga; (2) ia tausia Ana poloaiga uma; (3) ia naunau e auauna atu i fanau a le Atua o se vaega o Lana galuega o le faaolataga, e oo lava i le osigatulaga patino; ma (4) e faapaiaina i tatou lava ma mea ua tatou maua i le galuega a le Alii.

E tusa ai ma le tulafono a le Atua, o le talalelei (ma mamalu o loo ia ofoina mai) e maua e ala i sauniga faapitoa o loo faia e ala i le pule o le perisitua. E ala atu i sauniga o le perisitua le faaalia mai o mana o le amioatua i o tatou olaga—ae ua na o le tau-sia lava o feagaiga e o faatasi. O feagaiga e ola ai, po o le tuuina mai o le ola i, le sauniga, e pei lava ona faaolaina e se afi se taavale ma mafai ai ona ia feaveaiina lana pasese mai lea nofoaga i le isi nofoaga. I se faapuupuuga, i le tulaga tatou te tausia ai ma le mafaufau i ai ma le faamoni feagaiga e o faatasi ma sauniga tatou te mauaina, o le a tatou tuputupu ae i lo tatou malamalama i le Atua ma maua ai le “mana o le faaleatua”²⁶ i le alofa tunoa o le Atua e ala i le Togiola a Keriso.²⁷

O le Tulaga o le Faaiipoipoga i le Feagaiga Fou ma Tumau Faavavau

I le Mataupu Faavae ma Feagaiga 132:4, ua fetalai mai le Alii o le a Ia faaalia mai “se” feagaiga fou ma tumau-faavavau, ma faaopoopo mai, “Afa! tou te lē mau i lena feagaiga, ona tausalaina lea o outou; aua e leai se tasi e mafai ona teena lenei feagaiga ma faatagaina e ulu mai i lo'u mammal.” O nei upu e faatatau i le feagaiga o le

faaiipoipoga e faavavau²⁸ e faia i le pule tatau o le perisitua,²⁹ o se vaega tutotonu lea ma le taua o “le” feagaiga fou ma tumau-faavavau (o le atoaga o le talalelei toefuataiina a Iesu Keriso).³⁰ Na faamamafa mai e le Alii le taua tele o le feagaiga o le faaiipoipoga e faavavau i le tauina mai ia i tatou faapea o i latou o e e teena lenei feagaiga o le a le maua le ola e faavavau.³¹

O nisi tagata, e aofia ai nisi tagata o le Ekalesia, e sese le faitauina Mataupu Faavae ma Feagaiga 132:4 faapea o lona uiga o le faaiipoipoga faaautaunonofo e manaomia mo le faaeaga, ma taitai atu ai i latou e talitonu o lena faaiipoipoga faaautaunonofo o se mea e manaomia mo le faaeaga i le olaga e faavavau. O lenei mea, e ui i lea, e le o lagolagoina i faaaliga. O loo tusia i Mataupu Faavae ma Feagaiga 131 ma 132, na faalauiloa mai e le Alii le tulafono o le faaiipoipoga e faavavau e ala i le faapitoa lava ona faatatau i le faamauina o se alii e toatasi ma se tamaitai e toatasi (tagai i le 132:4–7, 15–25). E ala i le tuuina mai o le tulafono o le faaiipoipoga e faavavau i le anotusi o se faaiipoipoga i le toatasi, ua faamanino mai e le Alii o faamanuiaga o le faaeaga, e tuuina atu i alii uma ma tamaitai uma o e agavaa e ulu atu i le feagaiga o le faaiipoipoga e faavavau e faia i le pule tatau o le perisitua, e tutoatasi pe o lena faaiipoipoga faaautaunonofo po o le toatasi.³²

Mataupu Faavae ma Feagaiga 132:19 ua faamanino mai o le ola e faavavau e folafolaina atu i se ulugalii e taitoatasi o e ua faamauina i le pule o le perisitua ma o e mau i le feagaiga—ma e leai se tulaga faaopoopo po o se mea e manaomia. Soo se alii ma se tamaitai ua faamauina i lenei ala, ma ola ai i totonu o le feagaiga o le a faaeaina.³³ O faaiipoipoga anamua ua tutusa lava ma le aoaoga faavae o le faaiipoipoga e faavavau ua faamatala mai iinei.³⁴ O le sauniga e faamauina ai ulugalii mo le faavavau e aofia ai feagaiga e tutusa ma faamanuiaga mo le faaiipoipoga o le taitoatasi ma faaiipoipoga faaautaunonofo na faatagaina i le taimi ua tuanai. O nei feagaiga lava e tasi ma faamanuiaga o le a maua pe a mavae lenei olaga i e faatuatua e le i maua le avanoa e faamau i le olaga nei.³⁵

E ala atu i

sauniga o le perisitua
ona faaalia le mana o le
amioatua i o tatou olaga.



Ina ua uma ona faaalia mai le tulafono ma le feagaiga o le faaipoipoga e faavavau i le va o se alii e toatasi ma se tamaitai e toatasi, na aoaoina e le Alii Iosefa Samita e mafai e se tagata i le amiontonu ona faaipoipo i le sili atu nai lo le tasi le ava i totonus o le feagaiga o le faaipoipoga e faavavau pe a faatagaina ai pe na poloaiina e le Alii e ala i Lana perofeta ua faauuina (o loo umia ki o le perisitua talafeagai).³⁶ O le faatagaga ma le poloaiga e faia faaipoipoga faaautaunonofo, na tuuina mai e le Alii ia Aperaamo ma isi perofeta anamua,³⁷ sa faapena foi ona tuuina mai i le Perofeta o Iosefa Samita: "Ma ua Ou tuu atu ia te oe, lau auauna, Iosefa, se tofiga, ma toefuatai mea uma."³⁸

I tausaga mulimuli ane, na toe aveesea ai e le Alii Lana faatagaga ma le poloaiga mo tagata o le Eklesia e ulu atu i le faaipoipoga faaautaunonofo (i se isi faaupuga, ia faamauina i le sili atu nai lo le tasi le toalua) ina ua tuuina mai le Manifeso o le 1890 e Peresitene Uilifoti Utilafi (1807–98).³⁹ O lenei mea na taitai atu ai i le iuga o faaipoipoga faaautaunonofo, o lona uiga e leai se tagata o le Eklesia e mafai ona faaipoipoina pe faamauina i se toalua e sili

*"O le faaipoipoga
Faaselesitala e taua
i le atoatoaga o le
mamalu i le lalolagi
a sau."*

atu ma le toatasi o loo ola. Aemaise lava, o le Manifeso e lē taofia ai soo se tasi e agavaa ua uma ona faamauina i se toalua ua maliu mai le faamauina i le isi, o loo soifua. O lenei mataupu faavae e ogatusa ma le aoaoga faavae ua faaalia mai faapea o le faaipoipoga taitoatasoi o le tulaga faatonuina a le Alii mo se faaipoipoga sei vagana ua Ia tautino mai ma faatagaina mai i se isi ala i Sona sui ua tofia, o lona uiga o le Peresitene ma le perofeta o le Eklesia.⁴⁰

E fai ma sui o le Au peresitene Sili ma e tali atu ai i le lesili "Pe taua le faaipoipoga faaautaunonofo po o le faaselesitala i le atoatoaga o le mamalu i le lalolagi a sau?" Na tusia e Peresitene Charles W. Penrose (1832–1925): "O le faaipoipoga Faaselesitala e taua i se atoatoaga o le mamalu i le lalolagi a sau, e pei ona faamatalaina i le faaaliga e faatatau i ai; ae o le o taua ai faapea o le faaipoipoga faaautaunonofo e taua."⁴¹

I le 1933 na folafola mai ai e le Au Peresitene Sili: "O le faaipoipoga Faaselesitala—o lona uiga, o le faaipoipoga mo le taimi nei ma le faavavau—ma le tele o toalua po o le faaipoipoga faaautaunonofo e le tutusa. O



faaipoipoga taitoatasi mo le taimi nei ma le faavavau, ua faapaiaina i o tatou malumalu e tusa ai ma le afioga a le Alii ma tulafono a le Ekalesia, o faaipoipoga Faaselesitila.⁴²

E tusa ai ma nei fuaitau, na tusia e Elder Bruce R. McConkie (1915–85) o le Korama a Aposetolo e Toasefululu: “O faaipoipoga faaautaunonofo e le taua i le faaolataga po o le faaeaga. O Nifae ma ona tagata sa le tuuina atu i ai le mana e faia ai e sili atu nai lo se tasi le ava ae na latou mafai lava ona maua faamanuiaga uma i le faavavau na ofoina atu e le Alii i soo se tagata. *I o tatou aso, na aoteleina e le Alii e ala i faaaliga le aoaoga faavae atoa o le faaeaga ma faavaeina i luga o le faaipoipoga o se alii e toatasi e se tamaitai e toatasi.* (MF&F 131:1–28.) Mulimuli ane sa ia faaopoopo mai mataupu faavae e faatatau i le faia o avā e toatele ma le tulaga faapitoa o sea ituaiga o faaipoipoga faatoa aoga pe a faatagaina e le Peresitene o le Ekalesia. (MF&F 132:7, 29–66.)⁴³

I aso nei, e pei ona faatonuina ai e le Alii e ala i Lana perofeta, o Le Ekalesia a Iesu Keriso o le Au Paia o Aso e Gata Ai e le o toe faia

*Mo tagata uma o e
ola i le tuutuuga o
le feagaiga fou ma
tumau-faavavau,
o le taui o le olioli
ma le filemu i lenei
lalolagi ma le ola e
faavavau i le isi.*

ni faaipoipoga faaautaunonofo, ma o tagata taitoatasi o e ola ai e le faatagaina ona auai i le Ekalesia po o le le toe avea ma tagata o le Ekalesia. Ua faamautuina e le Ekalesia o le faaipoipo i le toalua e toatasi o le tulaga faatonuina a le Atua mo se faaipoipoga sei vagana ai ua Ia faatagaina pe poloaiina se isi ala i Lana perofeta. E le aoaoina i le Ekalesia faapea o le auai i faaipoipoga faaautaunonofo e taua mo le faaeaga.

Faaiuga

E tele naua mea tatou te le iloa e uiga i le olaga a sau; ae peitai, tatou te iloa o le mauaina ma le ola ai i totonu o le feagaiga fou ma tumau faavavau e taua mo le mautofi i le ola e faavavau. Ua tatou iloa foi e i latou faapena na, o le “o lea lava mafutaga ua i ai ia te i tatou iinei”—i le olaga nei—“le a i ai ia te i tatou iina”—i le olaga a sau—“ae o le a nao na faatasia ma le mamalu e faavavau.”⁴⁴

O faamanuiaga faalelagi e maua e ala mai i le feagaiga fou ma tumau faavavau e totonugalemu i le faamoemoega autu o le fuafuaga a le Tama ma le Toefuataiga o le Ekalesia a

Iesu Keriso i nei aso e gata ai. O le “susulu atoatoa o le faamoemoe”⁴⁵ o lenei feagaiga mamalu e musuia ai e faamaoni e maua ai le “e fai ma taula i agaga o tagata, lea o le a latou mautinoa ma mausali ai, ma faatumulia ai pea i galuega lelei e le aunoa, ma taitaiina ai e viia le Atua.”⁴⁶ Mo tagata uma o e ola i le tuutuuga o le feagaiga fou ma tumau-faavavau, o le taui o le olioli ma le filemu i lenei lalolagi ma le ola e faavavau i le isi.⁴⁷ ■

FAAMATALAGA

1. Tagai “O Le Aiga: O se Folafolaga i le Lalolagi,” *Liahona*, Nov. 2010, 129; tagai foi i le *God Loveth His Children* (tamaitusi, 2007), 1.
2. Tagai Robert D. Hales, “Ata o le Faaolataga: O se Oa Paia o le Malamalamā e Taialaina i Tatou,” *Liahona*, 2015 Oke., 32–39.
3. Tagai Mataupu Faavae ma Feagaiga 14:7.
4. Tagai Robert D. Hales, “Ata o le Faaolataga: O se Oa Paia o le Malamalamā e Taialaina i Tatou,” 32–39.
5. Mataupu Faavae ma Feagaiga 1:17, 22.
6. Mataupu Faavae ma Feagaiga 66:2.
7. Tagai Taiala i Tusitusiga Paia, “Feagaiga.”
8. Iosefa Filitia Samita, *Doctrines of Salvation*, lolo. Bruce R. McConkie, 3 vol. (1954–56), 1:156.
9. Tagai Ieremia 32:40; Mataupu Faavae ma Feagaiga 22:1.
10. Faaopoopo le faamamafa; tagai foi i le Mataupu Faavae ma Feagaiga 39:11; 45:9; 49:9; 88:131, 133; 101:39.
11. Tagai Mataupu Faavae ma Feagaiga 132:7.
12. Na aoao mai Peresitene Iosefa Filitia Samita (1876–1972): “O Le Agaga Paia o le Folafolaga o le Agaga Paia lea e tuuina le faamaufailoga o le faamaoniga i luga o sauniga uma: papatisoga, faamauga, faauuga, faaipoipoga. O le folafolaga e faapea, o le a maua faamanuiaiga e ala i le faamaoni. Afai e solia e se tagata se feagaiga, po o le papatisoga, sauniga, faaipoipoga po o se isi lava mea, e aveeseina e le Agaga le faamaufailoga o le faamaoniga, ma o le a le maua faamanuiaiga. O sauniga uma ua faamaufailogaina ma se folafolaga o se taui e faavae i le faamaoni. E aveesea e le Agaga Paia le faamaufailoga o le faamaoniga pe a solia feagaiga” (*Doctrines of Salvation*, 1:45; tagai foi i le Mataupu Faavae ma Feagaiga 76:52–53; 132:7).
13. Tagai i le Galuega 2:38; 2 Nifae 31:17; Moronae 8:25.
14. Tagai Mataupu Faavae ma Feagaiga 84:19–21; tagai foi Moronae 10:32–33.
15. Tagai Ioane 14:26; Mataupu Faavae ma Feagaiga 121:45–46.
16. Tagai i le 2 Nifae 32:5; 3 Nifae 27:20; Moronae 8:26; Mataupu Faavae ma Feagaiga 11:13; Mose 6:59–61.
17. “O le ola e faavavau o le soifuaga o le Atua, po o le olaga faatasi ma le Atua” (Harold B. Lee, i le Conference Report, Oke. 1956, 61). “O i latou e faaipoipo i le malumalu mo le taimi atoa ma le faavavau e maua le faamanuiaiga o le ola e faavavau. Ou te tuu le faamamafa i ola e faavavau. O le ola e faavavau o le soifuaga o le Atua, o lona uiga, e faapei o ia” (Iosefa Filitia Samita, *Answers to Gospel Questions*, tuuf. Joseph Fielding Smith Jr., 5 vol. (1957–66), 4:197).
18. Tagai Mataupu Faavae ma Feagaiga 14:7.
19. Mataupu Faavae ma Feagaiga 132:6.
20. Mataupu Faavae ma Feagaiga 132:19.
21. Mataupu Faavae ma Feagaiga 132:19–20.
22. Tagai Mataupu Faavae ma Feagaiga 84:19–21.
23. Mataupu Faavae ma Feagaiga 132:6.
24. Mataupu Faavae ma Feagaiga 132:5.
25. Mataupu Faavae ma Feagaiga 132:21.
26. Mataupu Faavae ma Feagaiga 84:20–21.
27. Tagai Moronae 10:32–33.
28. Tagai Mataupu Faavae ma Feagaiga 132:4, 15.
29. Tagai Mataupu Faavae ma Feagaiga 132:7, 18.
30. Tagai Mataupu Faavae ma Feagaiga 132:6–7 tagai foi Mataupu Faavae ma Feagaiga 66:2.
31. Faamolemole ia matau o le ola e faavavau e le tuuina atu ia i latou o e “teena” lenei feagaiga. O i latou, e ese mai ai, sa le maua le avanoa mo le faaipoipoga e faavavau i lenei olaga o le a tuu atu i ai le avanoa mo le faaipoipoga e faavavau i le olaga a sau. Faamolemole ia tagai foi i vaeafamatatalaga 35 o loo i lalo.
32. Tagai Mataupu Faavae ma Feagaiga 132:15–25.
33. Mo se faataitaiga faaopoopo e faamaonia ai o ulugali e tasi le ava ua faamauina mo le faavavau ma tausia feagaiga e o faatasi e faapaleina i le faaega, tagai i le Mataupu Faavae ma Feagaiga 131.
34. Tagai Gospel Topics, “Plural Marriage in The Church of Jesus Christ of Latter-day Saints,” topics.lds.org.
35. “E lei se tagata o le Au Paia o Aso e Gata Ai, o lē maliu i le mae'a ai ona soifua i se olaga faamaoni, o le a lē mauaina se mea e tasi, ona o le lē mafai a ona fai o nisi mea patino, ina ua lē mauaina avanoa mo i latou. I se isi faaupuga, afai o se alii talavou, po o se tamaitai talavou ua le mauaina se avanoa e faaipoipo ai, ma sa ola faamaoni e o'o lava i le oti, o le a latou mauaina faamanuiaiga uma, faaolataga ma mamalu e mafai ona maua e soo se alii po o se tamaitai, sa maua lenei avanoa ma faaleleia atili ai. E mautinoa ma lelei lena tulaga” (*Aoaoga a Peresitene o le Ekalesia: Lorenzo Snow* [2011], 130).
36. Tagai Mataupu Faavae ma Feagaiga 132:34–35, 37–39.
37. Tagai Mataupu Faavae ma Feagaiga 132:34–39.
38. Mataupu Faavae ma Feagaiga 132:40.
39. Tagai Folafolaga Aloaia 1.
40. Tagai Iakopo 2:27–30. E ui lava e le o faamatalaina mai e le Alii mafuaaga uma mo le poloaiina po o le faatagaina o le faia o faaipoipoga faaautaunonofo, i le Mataupu Faavae ma Feagaiga 132 ua ofoina mai e le Alii ni mafuaaga se lua: (1) i faataunu ai folafolaga e tusa o le feagaiga faa-Aperaamo, ma (2) “ia ululuola ma faatumuina ai le lalolagi” (MF&F 132:63; tagai foi i le fuiapi 34). Iakopo 2:30 ua ofoina mai atonu o le faamatalaga sili ona manino o le mafuaaga na poloaiina ai e le Alii le faiga o faaipoipoga faaautaunonofo: “Ma afai ou te loto i ai, ua fetalai mai ai le Alii o Au, ia faatuina mai mo au, o le a ou poloai i ou tagata; a le o lea o le a latou faalogo i nei mea.” Tagai foi Gospel Topics, “Plural Marriage in The Church of Jesus Christ of Latter-day Saints,” topics.lds.org.
41. Charles W. Penrose, “Peculiar Questions Briefly Answered,” *Improvement Era*, Set. 1912, 1042; faaopoopo le faamamafa.
42. I le James R. Clark, tuuf, *Messages of the First Presidency of The Church of Jesus Christ of Latter-day Saints*, 6 vol. (1965–75), 5:329.
43. Bruce R. McConkie, *Mormon Doctrine*, lom. 2 (1966), 578–79; faaopoopo le faamamafa. Tagai foi i le faamatalaga lenei Elder Melvin J. Ballard (1873–1939) o le Korama a Apostetolo e Toasesfululua. “O i latou e le mauaina le faateleina e le iu e le mafai ona avea faapei o le Atua, ona o lena mea faatasi ai ma isi mea, ua avea ai o Ia ma le Atua. O le faavavau o le feagaiga o le faaipoipoga e tatau ona malamalamā manino i ai le Au Paia o Aso e Gata Ai e manino lava o le faamauina o le itiiti ifo ma le tasi le tamaitai i se alii e toatasi mo le olaga nei ma le faavavau atoa. Ona aua led le le mautonu i lena manatu ma vaai faalemafaufau o le uiga tonu lava o le sili atu ma le tasi le tamaitai. Atonu e mafai, e moni lava, ae o lona uiga e le itiiti ifo ma le toatasi le alii ma le toatasi le tamaitai e faamauna i le mana o le perisitua paia ma e ala i le faamaoniga o le faamauga e le Agaga Paia mo le olaga nei, ma le faavavau atoa, ona afai latou te tausia a latou feagaiga, ae e le i avea i latou ma sui mo le tikeri aupito maualuga o le mamalu selesitala, ma ua no o i latou lava o nei vaega uma o fanau a lo tatou Tama ua faia i ai le folafolaga o le faateleina e le iu ma faavavau” (*The Three Degrees of Glory: Lauga o le A saunia e Melvin J. Ballard*, Sete. 22, 1922, 10; faaopoopo le faamamafa).
44. Mataupu Faavae ma Feagaiga 130:2.
45. 2 Nifae 31:20.
46. Eteru 12:4.
47. Tagai Mataupu Faavae ma Feagaiga 59:23.

“SA OU FAIA SE TAUTINOGA I LE ATUA”

Saunia e Néstor Curbelo

Faufautua o Talafaasolopito o le Ekalesia, Eria i Saute o Amerika i Saute

○ Virgilio Simarrón Salazar o se taitai i lona nuu moni o Kati o Ekuatoa i matu. E oo mai i lenei aso, o loo faatu-mauina e Kati lo latou ala tulaga ese o le olaga ma la latou lava polokalama o le faamasinoga i se aufono o le nuu, kovana, ma faamasino. O nei matafaioi faaletaitai e masani lava o ni tofiga o le mamalu e umia e aiga mo tupulaga ma o loo fausia i luga o se faavae loloto o le faaaloalo o le alalafaga ma le faatauaina. O le faaaloalo mo le tofiga o se tiute e tatau ona tausia lelei ma faasolo atu i le isi tupulaga.

Ae na suaia fuafuaga a Virgilio Simmarón mo lona olaga i le 1996, ina ua toe foi mai lona atalii, o Wilson, mai le aoga i Quinindé faatasi ma ni kopi o le Tusi a Mamona ma se molimau mausali e uiga i lana tapuaiga fou. I le faatumulia ai i le faatuatua ma le nau-nautaiga o se tasi ua mauaina le upumoni, na faasoaa atu e Wilson le savali o le talalelei i lona aiga, ma sa lei umi ae papatisoina i latou i le vai o le Vaitafe o Canandé.

A o faasoaa atu e le au Simarróns le talalelei i uo ma tuaoi Kati, e ui i lea, se faatupulaia se feteenaiga matuia. Sa lagona e nisi tagata Kati o talitonuga o Virgilio Simarrón na avea ai o ia ma se tagata tetee ma na oo lava ina fuafuaina sauaga e faasaga ia te ia. Sa lagona e

Sa faatuina le Ekalesia i Guayacana, Ekuatoa, e faafetai tele ai ia Virgilio Simarrón, o lē na faia se faaiuga faigata ina ia tumau faamaoni i lana molimau.

nisi, i le avea ai ma se kovana, e le tatau ona auai o ia i se faatuatuaga fou e ono fevae-vaeai ai tagata. Faatasi ai ma lenei popolega, sa latou ave o ia e faamasino e le aufono a le nuu. O le a avea ma se tasi o aafiaga sili ona faigata i le olaga o Virgilio.



I le mulimuli ai i le galuega faafaifeautalai o le aiga o Simarrón, na papatisoina le 60 tagata i le Vaitafe o Canandé ia Me 1999.

Na faamatalaina e Wilson le mea na tupu: "O le aufono, i le faapotopotoga atoa, na ta'u atu i lo'u tama, 'o le a e tumau i le avea ai ma lo matou kovana pe afai e te faafitia le Ekalesia a Iesu Keriso; e tatau ona e fulitua i ai.' Na fai atu lo'u tama, 'Sa ou faia se tautinoga i le Atua, ma a fai e se tagata se tautinoga i le Atua, e le mafai ona fulitua i ai. E le mafai ona ou tuua le Ekalesia. Afai tou te manatu o au o se kovana ua vaevaeina tagata Kati, oi lo'u nuu e, ina filifili ia outou i le aso nei se isi tagata i lo'u tulaga.' Ona ou vaai lea i le vaaiga o lo'u tama o loo tagi. Na i ai le filemu atoa i le aufono mo le silia ma le lima minute—e leai se tasi na faia se tala. Ona fai mai o se tagata, 'Ia Kovana, alu ese.' Na tu lemu lo'u tama, o lea na matou agai atu ai i lalo ma lo'u tina, ma lo'u tuafafine, ma tuua ai le aufono."

Ina ua uma ona aveese Uso Simarrón mai lona ofisa, na mulimuli mai aso faigata mo le aiga. I le lagonaina o le inoino mai le toatele o e sa faaaloalogia muamua i latou, na liliu atu le aiga i le faatuatua sa latou taliaina ma talai atu le talalelei ma le finafinai tele. Na faamalamalama mai e lo latou peresitene o le siteki, o Omar Intriago Cesar: "Sa amata ona latou talai atu le talalelei mai lea fale i lea fale i aiga taitasi o lenei nuu. Sa amataina le Paranesi o Guayacana e Virgilio Simarrón ma lona alo, o Wilson. Sa faatuina le Ekalesia ona o lona faatuatua, o lona malosi, ma lana molimau."

I na o ni nai tausaga, na fua tele mai taumafaiga a le aiga o Simarrón. O le aso 30 o Me, 1999, na avea ma se aso o le faamanatuina i Guayacana ina ua faia se sauniga papatisoga tele. Sa faamatala e Peresitene Intriago, "Na ma taunuu

atu ma Roberto Garcia, le peresitene o le misiona, ma auai uma ai i lena aso mamalu, lea na i ai i luga o matafaga o le Vaitafe o Canandé, ni faifeautalai se toalua na papatisoina le 60 tagata. Ona, faamauina lea e Peresitene Garcia i le isi itu ao au i le tasi itu o i latou uma na papatisoina o ni tagata o le Ekalesia. O se avanoa o le a le mafai lava ona aveesea mai i lo'u olaga."

E ui lava ina tuua e Virgilio lona tofi faalekovana ina ia tumau faamaoni i lana molimau, sa mafai ona ia faasolo atu se isi talatuu i le isi augatupulaga: o le auauna atu i tagata e ala i le faatuina o le talalelei i totonusi o i latou. Sa soifua o ia e vaai ia Wilson o auauna atu i se misiona talai ona toe foi lea i Guayacana e faaipoipo ai i lona faletua o, Ruta, ma maua ni fanau. I ni nai tausaga mulimuli ane, sa maliu Virgilio o loo faamaoni i le Ekalesia. Na soifua lona faletua o, Maria Juana Apa, e molimauina le valaauga o lo lo alo, i le 2014, e avea ma peresitene o le paranesi i Guayacana.

E iloa lelei e Wilson le tupuaga na manao lona tama e tuuina atu ia te ia. "O o'u tuaa sa avea pea ma kovana, o taitai o fitafita, o tagata tau malolosi," o lana tala lea. "Ou te lagona o loo faaalia pea nei aa o augatama ia te au. Ae o lenei ua avea au o se tagata o le Ekalesia, o lena malosi uma ua fesoasoani ia te au e avea ma se fitafita lelei a Iesu Keriso." ■



Luga: O se tupulaga fou o taitai, Ruta ma Wilson Simarrón o le Paranesi a Guayacana (faatasi ai ma tagata o le paranesi o loo faaalia i le agavale).



Saunia e
Elder D. Todd
Christofferson

O le Korama
a Aposetolo e
Toasefululua


I A **FILEMU**

Ou te faamoemoe o le a e faaaluina se taimi o lenei vaitau o le Kerisimasi e nonofo ai mo sina taimi filemu ma ia tuu atu i le Agaga o le Faaola e faamafanafana oe ma faamautinoa atu ia te oe e uiga i le aoga o lau auaunaga, o lau taulaga, ma lou olaga.

Emasani foi ona faamalosiau ia te au le mafaufau i le ofoina atu o le auaunaga ma le ositaulaga o Le Au Paia o Aso e Gata Ai e faia i o latou aiga, i o latou uarota, ma lo latou Tama Faalelagi. O se mea ua faapaiaina, ma paia. Ou te le talitonu o loo i ai se mamalu e maualuga atu o le a mafai ona oo mai ia i tatou nai lo o le Alii o le a mafaufau i la tatou taulaga e taua ma le talafeagai, ma o le a Ia faaalologia ma taliaina.

O lona uiga o le faamalo tele o le Tama i le Alo ina ua Ia faasino atu ia te Ia o “lo‘u Atalii Pele, o le ua ou fiafia lava i ai” (3 Nifae 11:7; tagai foi Mataio 3:17; Mareko 1:11; Luka 9:35; MF&F 93:15; Iosefa Samita—Talafaasolopito 1:17). Oka se faalaniga matagofie. O le a se isi faamamaluina e sili atu nai lo le faapea mai o le Atua ia te oe, “O Lo‘u atalii pele” po o “O Lo‘u afafine pele,” ma o le a e mauaina Lana faamalo o lau taulaga ua taliaina e Ia, “o le ua ou fiafia lava i ai.”

Ou te tatalo i lenei vaitau o le Kerisimasi o le a mafai ona i ai ni ou lagona o le silasila o le Alii i lau taulaga, o ni lagona o le auala e te tu ai i Lana silafaga, o ni lagona o lou tulaga o se pele i le avea ai ma Sona atalii po o Sona afafine. Ma ou te tatalo o le malamalamā i lena tulaga e mafai ona tuuina atu ia te oe se faamafanafanaga tele, faamautinoaga, ma le mautinoa ua faamaonia oe i Ona fofoga.





O LE MEAALOFA A LE FAAOLA O LE FILEMU

"O le sa mafatia i le faanoanoa ua masani foi ma le tiga na fetalai atu i tagata uma o e atu-atuuale ma tuuina mai le meaalofa o le filemu. 'Ou te tuuina atu ia te outou le manuia, o lou manuia ou te avatu ai ia te outou, ou te le avatu ia te outou e pei ona avatu e le lalolagi. Aua le atuatuuale o outou loto aua foi tou te matatau' [Ioane 14:27]."

Peresitene Thomas S. Monson,
"Meaalofa Taua," *Liahona*,
Tes. 2006, 3.

O Le Soifua Mai o le Faaola

Pe a tatou talanoa e uiga i le soifua mai o Iesu Keriso, ua tatou mafaufau ma le talafeagai i mea nei. O lona soifua mai sa le iu le taua ona o mea o le a Ia silafia ma mafatia ai ina Ia mafai ona sili atu ona fesoasoani ia i tatou—ma faaiu uma lava i Lona Faasatau-roga ma le Toetu (tagai i le Alema 7:11–12). Ae o Lana misiona foi na aofia ai le matagofie o Lana auaunaga, o wavega o Lana galuega, o le faamalologa na Ia aumaia i e puapuaga, ma le olioli sa Ia ofoina atu—ma ofoina mai ai pea—i e faanoanoa.

Oute fiafia foi e mafaufau i mea e oo mai i se taimi mulimuli ane. O a'u mau e lua ou te fiafia i ai i le talanoa e uiga i lena taimi o loo maua i le faaiuga o mataupu e 7 i le tusi o Faaaliga:

"Latou te le toe fia aai, e le toe fia inu foi; e le ogotia i latou i le la, po o se vevela.

"Aua o le tamai Mamoe o loo i luma o le nofoalii na te fafaga ia i latou, ma taitai ia te i latou i punavai o vai ola: e soloieseina foi e le Atua o loimata uma nai o latou mata" (Faaaliga 7:16–17; tagai foi i le 21:4).

O lena mea ou te mauaina ai le faamoe-moe paia o le mea e oo mai, o le vaaiga o le a i ai i le taimi o le Meleniuma tele ma le nofotupu faaselesitila o Keriso e mulimuli mai.

Faatasi ai ma na mea uma e oo mai, e ui i lea, ou te manatu e talafeagai i lenei taimi o le tausaga ia le na o le mafaufau e uiga i lena pepe i le faatanoa vao. Aua le lofituina po o le faatumulia i mea o le a oo mai; tau lava o le mafaufau e uiga i lena tamai pepe. Faaalu sina taimi filemu, ma le toofilemu e mafaufau loloto ai i le amataga o Lona soifuaga—le faatumutumuga lea o na valoaga faalelagi ae o le amataga faale-lalolagi mo Ia.

Faaalu se taimi e malolo ai, maua le filemu, ma tagai i lenei tamaitiiti i lou mafaufau. Aua e te popole tele pe lofituina

i mea e oo mai i Lona soifuaga po o lou olaga. Nai lo lena, faaalu sina taimi filemu e mafaufau ai atonu o le taimi sili ona toafimalie i le talafaasolopito o le lalolagi—inua olioli uma le lagi i le savali "O le Viiga i le Atua i mea aupitoaluga, ma le manuia i le lalolagi, o le finagalo alofa i tagata" (Luka 2:14).

Ia tuu atu i le Agaga e Faamafanafanaina Oe

I ni nai tausaga ua mavae, sa ou faalogoina i se leitio se faatalanoaga o loo saunoa ai Epikopo Desmond Tutu, o le akiepikopo o le lotu Egelani i Aferika i Saute. Faatoa uma ona



ia lolomiina se tusi ma lona afafine e uiga i le toefaaleleia na tupu i Aferika i Saute ina ua mavae le faailogalanu.¹ O le mea autu lava ia, o le savali a le tusi e faapea o loo i ai le lelei i tagata uma.

I le taimi o le faatalanoaga na tuuina atu se fesili loloto, ma musuia ia Epikopo Tutu: "Pe ua e iloa ua suia lou sootaga ma le Atua a o e faasolo ina matua?"

Sa malolo Epikopo Tutu ona faapea atu lea, "Ioe. Ua ou aoaoina ia faateleina le le tautala i le afioaga o le Atua."

Na ia manatua ai pe a tatalo o ia i ona tausaga na muamua atu, ia faia lea mea ma se lisi o talosaga ma popolega. Na te agai



Faaalu sina taimi
filemu e mafaufau ai
atonu o le taimi sili
ona toafimalie i le
talafaasolopito o le
lalolagi—ina ua olioli
uma le lagi i le savali
“O le Viiga i le Atua
i mea aupitoaluga,
ma le manuia i le
lalolagi, o le finagalo
alofa i tagata.”

atu e tatalo ma se mea na ia ta'ua
“o se ituaiga o lisi o faatauga.” Ae o
lenei, na ia fai mai ai, “ou te mafau-
fau [ua ou] taumafai ina ia matua i le
na ona i ai iina. E pei o lou nofonofo
i luma o se afi i le taumalulu, ua na
ona e i ai i luma o le afi, ma e le tatau
ona e taumafai e fia poto po o se isi
mea. E faamafanafanaina oe e le afi.”²

Ou te manatu o se faatusa mata-
gofie lena—e na o lou nofonofo
faatasi ma le Alii ma tuu atu ia te Ia
e faamafanafanaina oe e pei o se afi
i le taumalulu. E le faapea sei e atoa-
toa po o le tagata aupito sili na ola i
le lalolagi pe sili i soo se mea ina ia
faatasi ma Ia.

Ou te faamoemoe o le a e faaaluina
se taimi i lenei vaitau o le Kerisimasi
e nofonofo ai mo sina taimi filemu
ma tuu atu i le Agaga o le Faaola e
faamafanafana oe ma faamautinoa oe
i le taua o lau auaunaga, o lau taulaga,
o lou olaga. Nofonofo filemu faatasi
ma lena tamai pepe ma o le a e alu

ese mai ua faamalosia faaleagaga ma
ua sili atu ona saunia mo mea uma e
oo mai mulimuli ane. Ia tuu atu i lena
taimi e avea ma se taimi o le malologa
ma le toe faaleleia ma se faamautino-
aga ma le faafouina.

E tuuina atu e le Atua ia te oe lena
faamanuiaga i lenei Kerisimasi a o e,
faatasi ma au, tuuina atu le molimau
i le Faaola o Iesu Keriso—Lona toto-
nugalemu i o tatou olaga, i olaga o
tagata uma, ma le faamoemoega autu
lava o le olaga.

Tatou te tapuai ia te Ia, tatou te au-
auna atu ia te Ia, ma tatou te alolofa ia
te Ia. Tau ina ia mafai ona atagia mai i
lou olaga lena alofa e ala i lau taulaga
i lenei vaitau o le Kerisimasi ma aso
uma lava. ■

FAAMATALAGA

1. Desmond Tutu ma Mpho Tutu, *Made for Goodness: And Why This Makes All the Difference* (2011).
2. Desmond Tutu, i “Desmond Tutu, Insisting Ua ‘Faia i Tatou mo le Lelei’” (NPR faatala-
noaga e ala i le Renee Montagne, 11 Mat., 2010), npr.org.

TAMOE I LE MALUMALU

Ia Tesema o le 1999 sa matou sauni mo la matou malaga faaleausaga o le Kerisimasi i le Malumalu o Bern Suitisenani. O le malaga, o se tu faapitoa sa ma amataina ae e lei leva ona ma faaipoipo, o se tasi o auala matou te faamanantuina ai le soifua mai o le Faaola.

Matou te nonofo e tusa ma le valu itula i le taavale mai le malumalu, ma o le leaga o le tau na muamua atu i la matou malaga ese atu. O laau ua tase'i i luga, o se matagi matuitui, ma auala ua aisā o le a matautia ai le malaga.

Sa ou lagonaina le le mautinoa ma na lei malamalama pe aisea na matou fetaiai ai ma le tele o faafitauli ae na matou iloa e finagalo le Alii ia matou o atu i le malumalu. Pe o le a Ia le tatalaina lo matou ala?

O lo'u toalua, o Antonio, na ma tootutuli i le tatalo ma le ma fanau ma

fai atu i lo tatou Tama Faalelagi, sei vagana ai ua Ia tau mai se mea e ese ia i matou, o le a matou agai atu mo Bern i le aso e sosoo ai.

"Afai e le mafai moni lava ona uia le auala," na fai mai ai Antonio ina ua uma le matou tatalo, "o le a tatou toe foi mai."

Sa ou lagonaina sa sao la matou faaiuga, ae sa ou fefe pea. O le taeao na sosoo ai, i le faatumulia i le le mauttonu, sa ou manao e toe tatalo. Na fai mai Antonio ua uma ona matou mauaina la matou tali, ae na ia tootuli mai i ou tafatafa ma le alofa ma le onosai.

Ina ua matou tuua, faatoa tauvavalua mai le vaveao ma o ao pogisa sa i ai i o matou luga. A o matou tietie atu, sa mafai ona ou iloa atu sina vaega itiiti o le lagi lanumoana i tafatafa o mauga. Sa faavava mai se ave vaivai o le la i ao.

Na faamalosia lo'u faatuatua femoumouai e lena ilaila mai o le la susulu. O se vavega lava, na oso ae le la ma na agai ai i luga le vevela o le ea. Sa leai se puao, leai se aisa, leai se matagi—ae na o se aso manino, ma tulagaese le mafanafana o le taumalulu. Sa faatumulia ou mata i loimata. Sa foliga mai sa taliina e le Tama Faalelagi a matou tatalo.

Ina ua matou taunu i Bern, sa amata ona toulu malosi le kiona ma faaauau ai pea ona toulu le kiona i le taimi atoa na matou nonofo ai. A o matou agai atu i le malumalu a o lei tafa ata o le taeao na sosoo ai, na liua le afa i se afā aisa. Mo se minute sa ou fefe, ma sa amata ona ou tamoe i le auala savali e tau atu i le malumalu.

Ona oo mai lea o se manatu i lo'u mafaufau: "O le ala lenei



ATA NA TUSIALE STAN FELLOWS

O LAU VAVEGA O LE KERISIMASI

e tatau ona i ai. E ee mai le lalolagi ia i tatou i faafitauli, ae e tatau ona tatou taufetuli i le filemu o le Alii o loo maua i Lona maota.”

Sa matou maua se taimi fiafia i le malumalu i lena vaitau o le Kerisimasi, ae na matou popole i la matou malaga atu i le tale. Sa faaaauau pea le toulu o le kiona, ma o le ma atalii laitiiti na maualuga lona fiva. I le aso o lo matou malaga ese atu, e ui i lea, na taofi faavavega le kiona, ma na tea le fiva o le ma tama tama ina ua uma ona ia maua se faamanuiaga faaleperisitua.

A o lagolagoina i matou e le filemu o le malumalu, sa oo mai se fuaiupu o le Tusi Paia i lou mafaufau: “E i ai ea se mea e faigata ia Ieova?” (Kenes 18:14). I le agaga faafetai, na ou iloa ai e leai, e le faigata. ■

Antonella Trevisan, Udine, Italia



Ao matou agai atu i le malumalu a o lei tafa ata o le taeao na sosoo ai, na liua le afa i se afā aisa.

I le taimi o le tautoulu o le 1968, na talosaga mai lo matou epikopo i ou matua pe mafai ona la tautino atu se tupe mo le fausiaina o le Malumalu o Provo Iuta. E leo toe faia e uarota lena mea i le taimi nei, ae sa masani ai i lena taimi. Na tautino atu e lo'u tama le I.S. \$1,000. E mafai ona foliga mai e le o se tupe tele, ae sa tele ia i matou. Sa faigaluega lo'u tama i ni galuega se lua e fesoasoani e lagolago ai se atalii i le kolisi, se atalii i le misiona, ma le fanau e toalima i le tale.

Ina ua faanonofa i matou e lo'u tama i lalo mo se aufono a le aiga ma ta'u mai ia i matou na ia tautino atu le \$1,000 agai i le malumalu, ou te manatua lou mafaufau, “E mafai lava ona e tautino atu se \$1 miliona aua o aofaiga uma e lua e le mafai ona ausia.” Sa le mafai ona ou talitonu sa ia tautino atu se aofaiga tele faapea, ma ua itiiti ifo ma le fa masina matou te faaputuputu ai le tupe.

Na matou filifilia ni auala se fa e fesoasoani ai ia maua le tupe: o le a matou taofia le tuuina atu o meaalofa i lena Kerisimasi ma foai atu le tupe sa tatau ona faaaluina i meaalofa; o matou ma ou uso o le a foai atu a matou tupe mai le tau sitama; o lou tuagane laitiiti o le a faia ni galuega eseese e maua ai se tupe; ma o le a matou o o se aiga i se faatoaga o le lotofale, e piki apu i aso taitasi mo ni nai vaiaso, ma foai atu le tupe maua.

Na matou afifiina faameaalofa se pusaseevae o le a tuu ai a matou tupe teu, sa faaopoopo atu i ai se ata o le malumalu ma se ata o Iesu Keriso, ma tuu le pusa i luga o se tama'i laulau. Na faatupulaia le fiafia ao faateleina a matou foai. Na suia la matou taulai

atu mai meaalofa sa matou mananao i ai i la matou meaalofa mo le Faaola. Ou te matuai talisapaia le meaalofa na ia tuuina mai i fanau a le Atua—Lona soifua—na ou manao e toe faafoi atu se mea ia te Ia.

O le pikina o apu na iloa mulimuli ane o se auala sili ona faigata ma le faamalieina e maua ai se tupe. Sa matuai faavaivai tagata, ae sa faamalosia i matou ma tauia a o matou faaaluina le taimi faatas i se aiga. Sa amata ona matou “fili faatas i [matou] loto i le lotogatasi ma le alofa o le tasi i le isi” (Mosaea 18:21).

A o latalata mai le Kerisimasi, ou te autilo i totonus o le pusa o le foai, ae sa masani lava ona le faamalieina au. E ui lava i a matou taumafaiga, sa matou mamao ese mai la matou sini.

Sa ou lagona le fiafia, e ui i lea, e uiga i la matou filifiliga ina ia lafoai meaalofa. Sa ou iloaina o a matou osigataulaga sa laiti, ae sa ou faatuatua o le a fiafia le Faaola.

I se tasi aso sa fofogaina mai e lo'u tama ua matou ausia la matou sini, ma ua ia foaiina atu le tupe. Ou te le'i iloaina lava pe na faapefea ona matou vave maua le isi vaega.

O le faataunuina o le tautinoga a Tama i lena Kerisimasi o se vavega lava. Ae mo au, o le vavega moni e faapea e ala i le tuuina atu nai lo le taliaina, sa ou latalata atili atu ai i le Faaola. Na sili atu lena mea nai lo soo se meaalofa o le Kerisimasi na mafai ona ou maua. I le fitu tausaga mulimuli ane na toe faafoi mai ai le meaalofa ia te au a o ou tootuli ai i le fata fiaitalaga i le Malumalu o Provo ina ia faamauina mo le olaga nei ma le faavavau atoa i lou toalau. ■

Joan Burton Stott, Kalefonia, ISA

le tatalaina o se pusa, sa ou maua ai se talieelele faatoa sui i le fale e gaosi mai ie o le Kerisimasi.



O MANOA O LE TAULAGA

se tasi Kerisimasi i tausaga ua mavae, sa tele lava mea i lo'u mafaufau e fiafia ai i le vaitau. Na maua lou toalua, o Andy, i se tale lea, i le mulimuli ai i suesuega faafomai, na vave ona faateteleina i le faaleagaina o māmā, taotoga, o le toelipeaina o lona faai, ma le aveeseina o ni vaega mo le sue-sueina—"mo le saogalemu." O lona taotoga sa faia i le vайaso ae matou te lei masii atu i se fale fou.

I ni nai vайaso ao lumanai le Kerisimasi, sa ou asiasi atu i lou tuaoi o Janae. Sa fesili mai pe ua ou saunia mo le Kerisimasi. Sa mafai lava ona ou tali atu i ai sa ou saunia e pei ona tatau ai. Sa ou taua ai sa masani ona matou faia ni kuki o le Kerisimasi faatasi ma lou tinamatua ao lumanai le kerisimasi, ma sa ou manao e fai ni talieelele mo teineiti ae masalo o le a mafai.

I se vайaso mulimuli ane, sa ou nofo ae i le nofoa ua tumu i talaane o la matou laau Kerisimasi. Sa momoe teineiti, ma na galue Andy i lona ofisa ae ou faalogoina le logo o le fai-tooa. Sa ou tatalaina le fai-tooa ma vaaia ai

Janae i lo'u faasitepu, o uuina ni afifi se tolu a o tolu ifo le kiona i ona tua atu.

"Sau i tototonu," sa ou fai atu ai, ma le mautinoa sa ia mafai ona lagona lou tei.

"Faafetai, ae e tatau ona ou toe foi," o lana tala lea. "O nei mea e mo au teineiti."

Sa tuu mai e Janae ia te au afifi.

"O ni talieelele," o lana tala lea. "E le o mea sili ia, ae sa mafai ona ou faaumaina i le po nei."

I se taimi o le lotomaualalo o le ofo tele, sa ou manava atu se faafetai. Sa ma feopoai, ma sa ou vaai atu ia te ia ua toe foi atu i lona ala i le fale.

A o ou toe nofo i lou nofoa, sa ou tatalaina ma le faaeteete le lipine satini paepae o le pusa e tasi. I le tatalaina, sa ou maua ai se talieelele faatoa sui i le fale e gaosi mai ie o le Kerisimasi. Sa ou faasolo se afega i le va o lo'u limamatua ma le limatusi a o ou mafaufau e uiga ia Janae. Sa i ai sana fanau laiti e toafa, e aofia ai le masaga faatoa atoa o la tausaga.

Sa ia aoaoina atu le piano, ma sa ia te ia se tofiga pisi ma le taua i le matou uarota.

Sa ou taumafai e mafaufau po o le a se taimi o le a ia maua e fai ai talieelele, ma sa ou iloaina i le taimi lava lena sa leai sona taimi. Sa ia faaava-noa le taimi.

Na tafe ifo loimata a o ou lagolina le alofa o le Tama Faalelagi na tuuina mai e ala mai ia Janae—se fuataga o le mafanafana ma le lagolelei a o siomia ai au "i lima o [Lona] alofa" (MF&F 6:20).

Ua tele tausaga talu ai ona matou mauaina talieelele. Ua leva ona le ofi i lau fanau teine, ae ou te teuina i lau umukuka, ma tautau i o latou manoia mai se matau ua faafouina i lalo o mea fou. O taimi uma lava ou te vaai ai i meaalofa a Janae, e faamanatu mai ai ia te au le mafanafana ma le alofa sa ou lagonaina i lena po. Latou te faamanatu mai ia te au le mea ou te manao ia avea ai—se soo o Iesu Keriso e agavaa mo faaaliga ma nau-nau e auauna atu. ■

Candice A. Grover, Idaho, ISA

SA LEI TUUA NA O AU

Ao nofonofo i totonus o se lua na faatatope le eliina mo le puipuiga, sa ou tilotilo atu agai i le oneone i le itu i matu—agai i Iraki. O le aso 24 o Tesema i le taimi o le Osofaiga a Iraq, ma sa tofia au i le tiute o le leoleo e amata atu i le vaeluaga o le po.

Sa na o au le Au Paia o Aso e Gata Ai i lau vaegaau, o lea sa sili atu ai le tuuatoatasi o au i aso fiafia. Na matou i ai i le toafa o Saudi Arabia talu mai Aokuso, ma o lenei ua oo mai le Kerisimasi ma se po malulu, ma fetu e faamalamalama ai. Sa momoe le tolau-apiga, ma sa i ai ni nai ou itula faatasi ma faaputuga oneone lanu moana-efuefu ma o'u mafaufauga.

Sa ou mafaufau i lou toalua ma le atalii i Georgia, ISA, ma lou misia tele o faafiafiaga i le aiga—o le laau, o meaalofa, o se taumafataga moni o le Kerisimasi. Ona ou amata lea ona mafaufau loloto i le tala o le Kerisimasi.

Sa ou mafaufau e uiga i le po na fanau mai ai Keriso. Sa ou mafaufau pe na faapefea le pogisa pe na i ai se masina e lafo ifo lona pupula i le laufanua ma pe na o se malamalama o le fetu. Talu ai sa leai se moli eletise i Lona soifua mai, masalo o le po sa pei lava o le po lenei ua ou molimauina. O le a leai ni faafiafiaga—na o le pogisa, ma le po filemu.

Ona oso faafuasei mai lea o se manatu matagofie ia te au. Ua tau mai e le Tusi Paia na o mai Makoi mai Sasae, sa taitaiina mai e se fetu na faaali mai i le lag i le po. A o ou tilotilo atu i le lag i pogisa, sa ou iloaina ai sa ou i ai i le itu i sasae o Peteleema ma o se tasi o nofoaga autu o le malamalama i le taimi lena o Baghdad. Atonu na o mai Makoi mai se nofoaga e le mamao mai le mea sa ou i ai? O le a le fetu na susulu? Pe o i ai pea i le lag? Pe mafai ona ou vaai i ai?

Sa ou tilotilo atu agai i le lag i ma le ofo i foafoaga a le Atua ma lagonaina se mafanafana na sau mai i totonus. Sa le afaina pe afai sa ou i ai i le nofoaga lava lea e tasi po o le fetu lava lea e

tasi sa i le lag. O le mea e taua o le faapea sa ou mauaina lea lava malamalama e tasi e pei o Makoi i se pepe meamea na fanau i Peteleema ma o le Tupu o tupu.

Sa le tuua na o au i lena Kerisimasi; nai lo lena, sa ou faatasia ma i latou uma o e o loo saili ia te Ia, pe o i latou o ni Makoi, perofeta, po o ni fitafita ua tuuatoatasi i se pu i le toafa. O le po lena na faamalosia ai lau molimau i le soifua mai o le Faaola, ma o le taeao na sosoo ai na i ai lava le Agaga Paia ia te au.

Nai lo le avea ai ma se faanoanoa o le Kerisimasi o le tausaga lena, na avea ma se tasi o au Kerisimasi aupito sili ona ttau. ■

Robert Hoffman, Uosigitone, ISA



Ao ou tilotilo atu i le lag i pogisa, sa ou iloaina sa ou i ai i le itu i sasae o Peteleema.



ATA NA TUSIA E ALLEN GARN

O SE TUPE ITI A LE FAFINE UA OTI LANA TANE O ONA PO NEI

Oie laulau nono papae ma tamaloa aisa i le ogatotonu o laulau na tuuina mai se vaaiga o le Kerisimasi i le fale faafiafia ao faia tapenaga faai mo la matou pati faaleaiga o le Kerisimasi.

A o matou faatalitali mo a tatou malo, sa oo atu lau faataupupula i se laulau ma se fagu gaogao—ua tusia ai “Sao mo le Tama o le Kerisimasi”—o loo i luga. Sa ou tatalo ina ia oo atu i le faiuga o le po, ua tumu le fagu.

I le taimi o a matou sauniuniga o le pati na matou iloaina ai o le toalua o lo'u tausoga ua leai se galuega mo le silia ma le tausaga ma le afa. O le ala tupe maua a lona aiga o le tufaina lea o le pepa i aual e lima, lea e manaomia ai ona latou amata i aso taitasi i le 3:30 i le taeao. O le tele o le latou tupe maua e alu i le totogiina o le mokesi, ma isi mea e manaomia, ae totoe ai sina vaega laitiiti mo mea latou te manaomia, e pei o meaalofa o le Kerisimasi.

O le aiga o lou tausoga na muamua taunu mai. Sa ou matauina a o latou agai atu i laulau, ma pasia la matou

fagu o le Kerisimasi. A o latou latalata atu i ai, sa tu le toalua o lo'u tausoga e faitau le faailoga i luga o le fagu. E aunoa ma le faatali, sa ia aumai a i fafo ni nai tala, ma lafo atu i le fagu, i le iloaina po o ai o le aiga na “manaomia le fesoasoani”.

Na faatumuina au i le alofa, ma na vave ona ou manatua le tala o le Feagaiga Fou o le fafine ua maliu lana tane ma ana tupe iti e lua. Sa lafo e tagata mauoa a latou foai tetele i le mea e teu ai tupe ae “ua alu ane foi le tasi fafine mativa ua oti lana tane, ua lafo ane ai tupe iti e lua” (tagai i le Mareko 12:41–42).

Ona fetalai ane lea o le Faaola i Ona soo:

“O mea a lena fafine mativa ua oti lana tane, ua lafo i le mea e teu ai tupe, ua sili ia ia i latou uma na lafo i ai:

“Aua o i latou uma, ua latou lafo nisi mea mai a latou mea ua tele; ao ia ua mativa ua ia lafo ana mea uma sa ia te ia, o ana mea uma e ola ai” (Mareko 12:43–44).

Na fetalai Iesu Keriso ao ia “ua mativa” ua ia lafo “ana mea uma e

S a ou tatalo ina ia oo atu i le faaiuga o le po, ua tumu le fagu “Sao mo le Tama o le Kerisimasi”.

ola ai.” Sa mafai ona ia tuuina atu na o le tasi le tupe iti. Semanu atonu o le a faamalieina ai mea na manaomia, ae o lona loto faamaoni ma le naunautai e ositaulaga mea uma na tosina atu ai le vaai a le Alo o le Atua.

E leai se tasi o le a tuuaia le toalua o lo'u tausoga mo le savali ese mai le fagu ma le mafaufau, “Ua ou le avatu se mea ona ua ou le tagolima” (Mosaea 4:24). O lana faataitaiga maoae o le alofa mama ma le alofa mo ona uso a tagata na ootia ai e le gata o au, ae faapea foi isi tagata o lou aiga o e na vaavaai atu ia te ia. Ou te iloa o lona aiga o le a manuia lava ona “o le alofa mama o le alofa le pon lea o Keriso, . . . ma o soo se tasi e maua ua i ai ia te ia i le aso gataaga, o le a lelei ia te ia” (Moronae 7:47).

Sa matou faamoemoe e tuuina atu i lona aiga se mea i lena po, lea na matou faia mulimuli ane, ae i le tuuina atu o se vaega o lona lava taimi o le manaomia, na ia faaali mai ia i matou pe a oo i le mea e sili ona taua, ua mauoa lava o ia. ■

Stephanie H. Olsen, Iuta, ISA

NA FAAPEFEA ONA LATOU ILOA LO'U MANAOGA?

Ua toeitiiti atoa le 20 tausaga talu ai sa ou maua ai lo'u valaauga faamisiona e auauna atu i Japani. Faatasi ai ma se naunautaiga tele ma sina popolevale, sa ou sauni e tuua mo la'u misiona ia Ianuari. I le taimi lea o o'u matua ua leai ni galuega.

Sa i ai le tupe mo la'u misiona i le taimi lava ou te taunu ai, ae sa tauivi lo matou aiga i mea tau tupe. Sa ou le mautino a po o fea o le a ou maua ai se tupe mo le tapenaga e pei o lavalava o le misiona, atopau, ma isi mea e manaomia. Sa ou faigaluega faavaitaimi ae o le a le lava ai. Sa faapitoa lava lou popole pe o le a faapefea ona ou maua se tupe e talosaga vave ai mo se tusifolau ina ia ou

mauaina i le taimi e tuua ai mo Iapani.

I se tasi o aoauli, i le naunautai, sa ou alu ai i lou potu ma aioi atu i le Tama Faalelagi. Sa ou faasoaina atu lou naunau e auauna atu i Japani ma lou agaga faafetai o lau miti o le auauna atu i se misiona o le a vave ona faataunuina. Sa ou taofiofi ou loimata, ma tau atu ia te Ia lou matuai manaomia o se \$75 mo se tusifolau lea ou te lei mauaina lava. Ina ua ou tu i luga mai lau tatalo, sa ou iloa o le a lelei mea uma. Sa ou le iloa pe faapefea, ae o se filemu sa faamautino a mai ia te au o le a saunia e le Alii.

Mulimuli ane i lena aso na ou tatalaina la matou pusameli ma maua ai se kata o le Kerisimasi i totolu. O le tagata na tuiina mai sa faia se taumafaiga malosi e aua le faailoaina mai. Sa leai se faailoga tusi i luga o le kata; na tiliva mai e se tagata.

I totolu o le kata na taina ai, "Malo Lava! O oe le tagata ua mauaina se galuega o le agalelei faa-Kerisiano. Manu le Kerisimasi, Hannah. Ia manuia lau misiona."

I totolu o le kata sa i ai se \$100. Sa ou tu i lou faitotoa i luma ma tagi. Po o ai lava na faia lenei mea, pe na faapefea ona latou iloa lou manaoga?

I tausaga mulimuli ane, ou te lei iloa lava po o ai na aumaia le tupe i lou pale i lena aso. Ou te mafaufau pea e uiga i lena tagata, po o tagata, i le tele o taimi talu mai lena taimi. Sa latou faaalia le mea ou te talitonu i ai i le uiga o le saunoaga a Elder Joseph B. Wirthlin (1917–2008) o le Korama a Aposetolo e Toasefululu: "O le agalelei o uo uiga faa-Keriso e ootia loloto ai ma suia ai o tatou olaga. . . . I lenei Ekalesia, o tatalo mo fesoasoani e masani ona tali mai e le Alii e ala i se galuega faigofie e fai i aso taitasi o le tausiga o uso ma tua-fafine. I le agalelei o uo moni, na ou vaaia ai le alofa mutimutivale o le Alii lava Ia."¹

O lena galuega o le agalelei na sua ai au, na fesoasoani ia te au e tuua ai i le taimi tatau mo la'u misiona, ma musuia au e vaavaai mo auala e avea ai ma tali i tatalo a isi. ■

Hannah Eiselin, Arizona, ISA

FAAMATALAGA

1. Joseph B. Wirthlin, "O Soa Taua," *Liahona*, Jan. 1998, 37.

Na ou tatalaina la matou pusameli ma maua ai se kata o le Kerisimasi i totolu. Sa leai se faailoga tusi i luga; na auina mai e se tagata.

Toe Foi Vave i le Fale

MAI LA'U MISIONA

Saunia e Brittany Romanello Casco

O le mauaina o lo'u valaauga o le misiona o se tasi o taimi sili ona loloto ma le mamalu o lo'u olaga. Sa ou mafaufau e uiga i se misiona i le tele o taimi talu ona ou mauaina se molimau o le talalelei i le 18 tausaga. Ou te manatua ina ua ou maua lo'u valaauga e auauna atu i le Misiona a Taiuani Taichung, sa ou iloa ai ua sa'o, ma sa ou matuai fiafia lava e auauna atu.

Sa ou faitau au tusitusiga paia i aso taitasi, auai i au vasega faasauniuni a faifeautalai ma le malumalu, ma e oo lava i le taumafai e aoao le faa-Saina Meniterini e au lava ia. I le avea ai ma se tamaitiiti e toatasi i lo'u aiga, sa ou iloa o la'u misiona o le a aumaia le mamalu e le gata ia te au lava, ae faapea foi i o'u matua ma lo'u Tama Faalelagi. O le aso na ou ulufale atu ai i le nofoaga autu mo le aoaoina o faifeautalai (NAF), sa ou lagonaina e pei e leai se mea e mafai ona sese i le 18 masina e sosoo ai. Sa ou fiafia lava e uiga i mea uma mai le vaai i

papatisoga i le faataitaia o le kukaina o meaai Taiuani sa ou faalogo soo i ai. Sa ou le iloaina ina ua ou ulu atu i le NAF o la'u misiona o le a matuai ese lava mai le mea na ou faamoemoeina.

Mauaina i le Ma'i

E tusa ma le fa masina i totonu o la'u misiona, sa amata ona ou lagonaina le tiga—e le gata i le taimi o gaoioiga faaletino e pei o le tietie i la'u uila po o faamalositino o le taeao ae faapena foi pe a ou moe po o le faia o suesuega faaletagata lava ia. Sa vave lava ona amata ona ou paee. E oo lava i le inuina o vaiinu na ou ma'i ai. O suesuega a fomai na le mafai ona faailoa ai le mea na faaletonu. Sa leai ni siama ninii po o ni vairasi. O lau peresitene o le misiona, o la'u soa faifeautalai, ma au foi sa le mautonu i lo'u ola maloloina ua faaletonu.

I le masina na sosoo ai, sa tumau pea lou faatuatua lea na faateia ai foi au lava ia. E ui lava sa ou lagonaina lo'u lotovaivai, sa ou talitonu, afai ou te galue malosi pea, tietie uila ia

Sa ou le iloaina ina ua ou ulu atu i le nofoaga autu mo le aoaoina o faifeautalai faapea o la'u misiona o le a matuai ese lava mai mea na ou faamoemoeina.

saoasaoa atu, e oo lava i le tautala atu i lau Faasaina panupanu i tagata uma sa ou vaaia, o le a faamaloloina faavavega au e le Atua. Sa ou talitonu i tala ia Keriso na faamaloloina ma'i ma faatutu e ua maliliu, ma na ou talitonu ma le loto atoa o le a Ia faia lea lava mea mo au—o se faifeautalai vaivai ae naunautai. Ona oo lea i se tasi aso Sa ao ma tietie uila ma la'u soa i le falelotu o le Ekalesia e feiloai ma se tagata



sailili, na le mafai ona tatalia le tiga ma le tetete o lo'u tino atoa. Ina ua ma taunu i le falelotu, sa ou fesili atu i alii faifeautalai e tuuina mai ia te au se faamanuiaga, lea sa fesoasoani. A o mavae atu aso, na faateleina faamanuiaga faaleperisitua ma sa faapena foi tatalo mo le faamalologa.

O le aso sili ona pogisa o la'u misiona ina ua ou ala ae i se tasi taeao i le vevela matautia o Taiuani ma iloa ai ua le mafai ona toe minoi lo'u tino e mafai ai ona aluese mai le moega. I lena taimi, sa ou iloa ai o le a le mafai ona toe avea au ma se faifeautalai. Na oo mai lo'u peresitene o le misiona e asiiasi mai ia te au, ma na ma fefau-tuaai faatasi. Na ma talanoa i avanoa uma, ma ina ua mavae le tele o tatalo ma loimata e tele, na faamautu e le Agaga ua tatau ona ou toe foi atu i le fale ma taulai atu i le faamaloloina.

Toe Foi Vave i le Fale

Nai lo le foi mai i le fale i paluni ma failogia o le "Afio Mai i le Aiga", sa tuleiese atu au mai le vaalele i ou matua fefefe, o e sa faavave lava ona aveina atu au i le potu o faalavelave faafusei a le falemai. Sa amata ni masina o suesuega, ae na le mafai e fomai ona mauaina le mea na faaletonu ia te au. E le gata i lea, o tagata alolofa na siomia au na fai mai ni mea e pei o, "O afea e te toe foi ai?" "Pe o le a e nofo i le fale?" "Atonu sa tatau ona e faaipoipo." "Atonu na e sese i lou alu."

Sa ou lagona le maasiasi ma le le mautonu. Pe sa ou agavaa mo le alofa o le Atua? Aisea na tupu ai lenei mea ae na ou auauna atu ma le filiga? Pe

sa le o au ea o se faifeautalai lelei? Pe na faafogia mai le Atua ia te au? Pe o le a taliaina e au uo la'u auaunaga faafeautalai "pona"?

I le isi ono masina, sa ou tauivi ma la'u molimau, lea sa ou lagonaina ai le tausalaina. Sa ou mafaupe na ou toilalo mai le alofa tunoa, ma pe alofa moni lava le Tama Faalelagi ia te au. E ui lava ina amata ona ou lagonaina si feololo teisi atu, ou te lei lagonaina le lagona na i ai a o lei amataina la'u

misiona. Sa ou aloese mai le agai i luma i lo'u olaga.

Ona oo lea i se tasi afiafia ma talanoa ma la'u uo lelei. Sa ia oo foi i le tiga ma le faanoanoa o le toe foi vave mai lana misiona ona o le ma'i ma sa galue agai atu i le toe foi atu i le galugega faamisiona. Ou te manatua o lena po o le taimi muamua i le ono masina sa ou lagonaina le filemu moni. Sa musumusu mai le leo o le Agaga ia te au, "E tatau ona e toe foi atu." Sa ou matuui faafetai lava ina ua iu lava ina iloa le itu e agai i ai. Sa ou alu e vaai lou epikopo i le aso na sosoo ai. Ona ou tusia lea o se tusi faatauanau i le Matagaluega a Faifeautalai e fesili atu pe mafai ona ou toe foi atu i le galugega faamisiona. Sa taliaina la'u talosaga, ma e tasi le masina mulimuli ane, sa ou toe tuiina lau pine o lo'u igoa.

E ono masina mulimuli ane, e ui i lea, sa amata ona ou toe lagonaina faafitauli lava ia o le soifua maloloina.



Na ou manatua lou taoto ai i se moega i le falemai, ua oso faama'i malosi mai itula o suesuega ma tui. Sa ou le talitonu ua tupu lenei mea. O le taimi lea sa ou iloa ai o la'u misiona ua maea. Faatasi ai ma loimata o le le fiafia ma le le faamalieina na tafe ifo i o'u foliga, sa ou faalogo i lo'u peresitene atamai o le misiona ua faapea mai: "Sister Romanello, e faalua ni taimi na e alofa ai i le Alii, aua sa e toe foi mai." Sa ou lagonaina se faamafanafanaga tele mai ana upu. O le taimi lea a o ou ulufale atu i le vaalele i le fale, sa ou folafola atu i lo'u Tama Faalelagi o le a ou tumau i le faatuatua e tusa lava pe ou te lei mauaina ni tali.

Mauaina o le Faamalologa i le Togiola a Keriso

O lenei ua silia teisi ma le lua tau-saga talu ona ou toe foi mai i le fale. O loo i ai pea ni faafitauli tumau, ma o lo'u tumau ma le malosi e le'i toe tutusa lava talu mai le taimi ae ou te lei auauna atu i la'u misiona. E lei mauaina lava e fomai po o le a le faaletonu ia te au. E lei faigofie ia te au le avea ma se faifeatalai ua maea le misiona e lei maua le avanoa e auauna atu ai i le taimi atoa o la'u misiona. E ui i lea, ou te alofa pea ia i latou uma taitoatasoi au tagata liliu mai matagofie. Na alu se taimi faatoa ou lagona le faamao-niaina ma iloa o la'u auaunaga faafai-faatalai faapuupuu e i ai sona taua e pei lava o le taua i misiona e 18 po o le 24-masina i isi faifeatalai.

Ua tuuina mai ia te au e le Alii le tele o avanoa e talanoa atu ai i isi na feagai ma le tiga o le toe foi mai i le

fale faafuasei. Ou te iloa ua taitaiina atu au e le Tama Faalelagi ia i latou e faasoa atu la'u molimau ma fesoasoani ia i latou ia iloa o le toe foi vave mai i le fale ona o faafitauli o le soifua maloloina e le o se faaletonu ia nana faalilolilo ae o se aafiaga e talanoaina.

O le taimi muamua sa ou toe foi mai ai i le fale, sa ou oo i le lagona o le amanaiaina o lo'u faatuatua, ae o le taimi lona lua na ou toe foi mai ai, sa ou oo i le lagona e maua pe a tumau faamaoni. Sa ou tumau i mea autu: suesue i tusitusiga paia, auai i le inisitituti, auai i le lotu, ma le faataunuina o o'u valaauga. Sa ou tatalo i le tele o taimi ia iloa pe aisea na tutupu ai nei mea uma faapea. Sa ou taofia le tuuaia o au lava ia, ma sa ou taofia le tuuaia o le Tama Faalelagi. A o ou vaai atu i lo'u olaga talu le toe foi mai le fale ma a'u asiasiga i ou tuagane ma uso Saina e nonofo i lou lava aai, ou te faatumauina le tulaga mausali faapea e i ai se faamoemoega e faavavau o mea uma.

Ou te fiafia i upu i le Mosaea 5:15: "O lea, ou te manao ai ia outou tutumau ma lē masi'i ese, ma tumu e lē aunoa i galuega lelei, ina ia mafai ona faamuina outou e Keriso, le Alii le Atua Mamana Aoao, e fai mona, ina ia mafai ona aumai outou i le lagi, ina ia mafai ona outou maua le olataga tumau-faavavau ma le ola e faavavau, e ala i le poto, ma le mana, ma le faamasinotonu, ma le alofa mutimutivale o ia o lē na foafaina mea uma, i le lagi ma le lalolagi, o lē o le Atua o mea uma."

Ou te talitonu afai ou te faaauau pea ona ola i lo'u olaga i le faapaiaina

i le Alii, o le a faavavau pea ona faamanuaina au. I lena auala, ou te iloa sa faamaloloina au e ala i le Togiola a Iesu Keriso, aua e ui lava o lo'u tino o le a le mafai ona 100 pasene le faamaloloina faaletino, o lo'u loto sa lei sili atu lava ona atoatoa po o le saunia e auuana atu i le galuega a le Matai. ■

E alala le tusitala i Iuta ISA.

O A NI A'U FILIFILIGA PE AFAI OU TE TOE FOI VAVE I LE FALE ONA O FAALETONU O LE SOIFUA MALOLOINA?

Mo i latou e i ai luitau o le soifua maloloina faaletino, faalelagona, po o le mafaufau, talanoa i lou epikopo po o le peresitene o le paranesi mo nisi faamatatalaga i le polokalama faafaifeatalai a le autalavou o auuana faale-Eklesia.

"**I**tulaga faapena, o misiona auauna atu e mafai ona avea o se faamunuaga sili, e faatagaina ai ia tagata e nonofo i o latou aiga ma maua togafitiga tatau ai ao soifua ma tuputupu ae ai i le galuega a le Alii."

Donald B. Doty, M.D., Taitaifono o le, Auau-naga tau soifua Maloloina o le Matagaluega a Faifeatalai, "Missionary Health Preparation," *Ensign*, Mar. 2007, 67.

O Le Ola Ai o se Molimau i Siamani

Saunia e Justina McCandless

Ena o le 30 minute e tietie ai i le nofoaafi mai le aai o Hannover ma olioli ma le filemu i totonu o le fia eka o fugalaau o laufanua o le tautotogo o loo i ai le tamai aai Siamani o Stadthagen. O le nofoaga lea na soifua ae ai Esther Graf e 19-tausaga-le-matua. O se nofoaga e te oo ai i soo se mea lava e ala i le savali po o le uila, se nofoaga e tumu ai auala i falefalaoa ma faleoloa aisakulimi, ma le nofoaga e faatumulia ai le sikuea o le aai i maketi i aso o le vайасо.

O Stadthagen foi o le aiga i se nuu ua ola lausiusi o Le Au Paia o Aso e Gata Ai.

E ui lava o le aai e laitiiti, o Stadthagen e i ai se uarota tele—o se mea e fou mo Siamani, lea e itiiti ifo ma le lima tagata lotu mo le tai 10,000 tagata Siamani. Ae mo Esther, o le nofoaga sili e aoao ai pe faapefea ona ola i mataupu faavae o le talalelei a Jesu Keriso ma pe faapefea ona faaoga na mataupu faavae e auauna atu ai ma faamanuia ai isi.

Ina ua 14 tausaga o Esther, sa ia maua lona faamanuia faapeteriaka,

lea na aumaia ai se malamalama taua. “Na faamanino mai ia te au le taua moni lava o au i le Tama Faalelagi,” o lana tala lea. “Sa ou aoaoina le taua tele o i tatou uma ia te Ia.”

Na te aveina lena malamalama ma faaaoga i lona sootaga ma isi.

I lona valaauga i le aufono a le siteki a talavou nofofua matutua, mo se faataitaiga, o ia e nafa ma le faa-mautinoaina ua lagona e tagata uma le faaaofia. “Ua ou aoaoina le taua o le aua le faitio i isi, ae nai lo lena ia faamasani ia i latou.”

Na te faatumauina foi lena mea i le mafaupe a i ai o ia i le aoga. “E fesiligia soo au e uiga i lau lotu, ae ou te le vaai i ai o se mea leaga i soo se itu,” o lana tala lea. “E ui i lea o taimi uma lava ou te fafia ai ona e faigofie lava lou faamanatu ia te au lava ia le tele o lona fesoasoani ia te au ma le tele o mea na te aumaia i lou olaga. E ala mai i le talalelei ua ou iloa ai le tele o mea.

“O taimi uma e i ai lava tagata o e faia ni ulaga i lo tatou faatuatuaga ma e le malamalama i ai,” o lana tala lea, “ae e le leaga moni lava pe

O le puipua o ona talitonuga e faigofie ai le faasoaina atu.

a tatou tutu e puipui mea ua tatou talitonu i ai.”

O le alofa o Esther ma lona faalagolago i le Atua e sili ona fesoasoani ia te ia i le ola ai ma faasoai atu le talalelei.

“Ae e te lei popole,” sa ia fai mai ai, “faalagolago muamua i le Atua. Pe a ou faia lena mea ma ou faatuatua, o isi mea uma e faigofie lava. Pe a tatou faalagolago i le Atua, e mafai ona tatou agai i luma i o tatou olaga ma le faatuatua ma talitonu i le lumanai. Pe a tatou faia lena mea, e mafai ona tatou ola o ni molimau a le Atua.” ■

E alala le tusitala i Siamani.



O NISI MEA E UIGA IA ESTHER

O a mea e fiafia Siamani e aai ai?

E fiafia Siamani e aai i pateta po o saimini fuamoa. O lau meaai e fiafia i ai o pateta ma fualaua faisua ma le sosi. E faapitoa lava lou fiafia i pi pupuu ma fualaua faisua pei ni kapisi lapotopoto ninii.

O a au mea e fai e fiafia ai?

Ou te faalogologo i musika, pese, ma ta le piano po o le kitara. Ou te fiafia e tao keke. O loo ou aoaoina au lava i le faiga o keke mananaia.

E faapei le tafao faamasani i Siamani?

Matou te le o i tafaoga faamasani. O se mea ese pe a fai mai se alii, "E te manao e ta te o i se tafaoga faamasani ma au?" O iinei e te iloaina tagata i ni vaega, ma afai e te fiafia i se tagata, e te talanoa i le telefoni ma i le initonet. E te lua feiloai i lea taimi i lea taimi, ona lua amata lea o se faigauo pe leai foi.

O LE EKALESIA I SIAMANI

- 39,401 le Au Paia o Aso e Gata Ai
- 15 siteki • 3 misiona
- 89 uarota • 2 malumalu
- 85 paranesi

E ALA I FUAINUMERA

- 80,995,685 tagata (fuafua mai ia lulai 2014)
- 6,200 falemataaga
- E le silia ma le 400 mataaga o manu, e sili ona tele i se atunuue tasi i le lalolagi

O MEA MONI E UIGA IA SIAMANI

Laumua: Perelini

Gagana: Siamani (Deutsch)



**Saunia e Peresitene
Dieter F. Uchtdorf**
Fesoasoani Lua i le
Au Peresitene Sili

PE FAAPEFEA ONA **ILOA LE UIGA MONI O LE KERISIMASI**

Pe a tatou saunia mo le Kerisimasi e ala i le mafaufau loloto i lona uiga moni, ua tatou saunia e maua le Keriso ma Lana savali. Se'i ou fautuaina atu ni mea se tolu e mafai ona e manao e suesue, mafaufau loloto, ma faaaoga i lenei vaitau o sauniuniga.

Muamua, ia olioli i le soifua mai o lo tatou Faaola. Ua tatou faamanatuina le soifua mai o le Alo o le Atua, le Foafoa, lo tatou Mesia. Tatou te olioli o le Tupu o tupu na afio mai i le lalolagi, na soifua mai i se faatanoa vao, ma na soifua i se olaga atoatoa. Ina ua soifua mai Iesu, sa matua tele naua le olioli i le lagi na le mafai ona taofiofa (tagai i le Luka 2:8–14).

Lona lua, mafaufau loloto i Lana faatosinaga i o tatou olaga i aso nei. O le Kerisimasi o se taimi mo le manatuaina o le Alo o le Atua ma le faafouina o lo tatou naunautaiga e tauave i o tatou luga Lona suafa. O se taimi e toe iloilo o tatou olaga ma iloilo o tatou mafauauga, lagona, ma amioga. Tau ina ia avea lenei taimi o se taimi e manatua ai, o le loto faafetai, ma o se taimi o le faamagaloga. Ia avea ma se taimi e mafaufau loloto ai i le Togiola a Iesu Keriso ma lona uiga mo i tatou taitoatasi patino lava. Ia avea faapitoa lava o se taimi o le toe faafouina ma le toe tautinoga e ola i le afioga a le Atua ma ia ususitai i Ana poloaiga. E ala i le faia o lenei mea, tatou te faamamaluina o Ia e sili atu nai lo le mea tatou te mafaiia i moli, meaalofa, po o pati.

Lona tolu, ia vaavaai pea mo Lona afio mai. E ui lava o le vaitau o le Kerisimasi e masani lava o se taimi mo le toe tepa i tua ma le faamanatuina o le soifua mai o lo tatou Alii, e foliga mai ia te au e tatau foi ona avea o se taimi o le vaavaai atu i le lumana. Sei o tatou vaavaai atu i luma. Sei o tatou saunia mo lena aso faamanuiaina pe a toe afio mai o Ia. Sei o tatou atamamai e pei o na tagata anamua o e na vaavaai atu mo Lona afio mai.

Ou te tatalo i lenei vaitau ma o taimi uma, o le a tatou vaai i le mama aiai o le tala o le soifua mai o le Faaola ma lagonaina le agaga faafetai faamaoni mo Lona soifuaga, aoaoga, ma le taulaga faaola mo i tatou. Tau ina ia mafai e lenei loto faafetai ona uunaia i tatou e faafouina lo tatou naunautaiga e mulimuli ia te Ia. Tau ina ia mafai ai foi ona taitai atu ai i tatou e faalatalata atili atu i o tatou aiga, la tatou ekalesia, ma o tatou uso a tagata. Ma tau ina ia tatou tulimatai pea i lena aso faamanuiaina pe a toe savalia e le Keriso toetu le lalolagi o lo tatou Alii, lo tatou Tupu, ma lo tatou Faaola faamanuiaina. ■

Mai le Faigalotu o le Kerisimasi a le Au Peresitene Sili 2010.



NA FAAPEFEA ONA E **FAAAOGAINA LENEI MEA?**

I ni nai Kerisimasi talu ai, na fai atu ai lo'u tinamatua i lana fanau ma fanau a fanau uma lava ia auauna atu i isi mo ia. O o'u tuafafine na koloseina ni pulou pepe ma auauna atu i se fale e tuu ai manu, ae o lo'u uso na tuuina i luga ni moli o le Kerisimasi mo se fafine nofofua. Sa ou maua ni igoa o aiga ma ave i le malumalu. Sa matou taufafi tusia uma lava ni tusi ia Tinamatua e faamatala ai o matou aafiaga—sa susulu mai loimata i ona mata ao ia faitauina i le taeao o le Kerisimasi. Sa ou lagonaina le agaga faafetai mo se faataitaiga a lo'u tinamatua ma iloaina ai e pei ona ou faia “[sa]auauna i le alofa” i isi (Kalatia 5:13), sa ou maua ai le alofa mama e sili atu ma lagonaina le latalata atili atu i tagata o le aiga o loo soifua ma e ua maliliu.

Amanda S., Iuta, ISA

O SE MEAALOFA E SUIA AI LE OLAGA

I LE FALEOLOA TAUGOFIE

Saunia e Keanu Williams

se tasi tausaga e le'i tele ni a matou tupe mo le Kerisimasi, o lea na ou tatalo ai mo se fesoasoani ina ia mafai ona ou faatau ai se meaalofa mo le toalua o lou tina, o Adrian (o lē ma te valaauna ma lo'u tuafafine matua o Weegee). O maua ma lo'u tuafafine sa na o le lua tala le ma tupe e faaalu i meaalofa.

Ina ua fai mai lo'u tina e tatau ona matou o i se faleoloa taugofie e lata ane e faatau ai mo meaalofa o le Kerisimasi, sa ou tamoe atu i lou potu ma tatalo mo se fesoasoani: "Faamolemole fesoasoani ia i maua ia maua se meaalofa mo le lua tala."

I le faleoloa na ma matamata ma Elaina i tusi ma maua ai se fusi tolu lea sa foliga mai e fou. Sa ma matuai fafia lava ina ua ma mauaina. Sa ou uumauina a o ma taufetuli atu i le ala i lou tina. Ao feosofi i luga ma lalo, sa ma fai atu faatasi, "Ua ma maua se meaalofa mo Weegee!" I le kesi e siaki ai faatau sa fesili atu lou tina, "E fia le tau mo lea?" Sa tali mai le tamaitai, "Lua tala." Sa tali mai lau tatalo.

O le taimi lena o le toalua o lou tina sa le o se tagata o le Ekalesia. Sa le fafia o ia i tagata Mamona, na te lei talitonu i le "tusi a tagata Mamona," ma sa le fafia i tagata o le ekalesia e pikina i maua mo gaoioiga a Alii

Talavou ma Tamaitai Talavou. Na oo lava ina ia tulieseina faifeautalai. Ae o tagata o le uarota ma faifeautalai e lei fiu ia te ia.

I le aso o le Kerisimasi na matou faasaoina lana meaalofa e faamulimuli. Na ma fai atu ma Elaina, "O le meaalofa silisili lenei e mafai e soo se tasi ona tuuina atu ia te oe! O le a e maua ai le fafia." Sa mate e Weegee mo ni nai taimi, ma sa matou talie i ana tali. Sa matou tau atu ia te ia, "O se meaalofa matagofie! O le a suia ai lou olaga. Na suia ai foi i matou."


Sa popole lo ma tina o le a ia le fafia e uiga i la ma meaalofa ia te ia, ae na ma iloa ma Elaina o le mea sao lea e fai.

Ina ua ia tatalaina, sa faafetai mai ia i maua mo le meaalofa ma fai mai o le a ia faitau i ai.

Ona ma te alolofa ia Weegee, ma te mananao e aoao o ia e uiga ia Iesu Keriso ma le meaalofa o Lana Togiola. Sa ma mananao ia te ia e talitonu e pei ona matou faia, ia tatalo ma salamo, ma maua le talalelei i lona olaga.

Sa ia faitau ma tatalo e uiga i le Tusi a Mamona, ma faatasi ai ma le fesoasoani a faifeautalai ma tagata o le uarota, sa papatisoina o ia ma ua avea nei ma se tagata o le Ekalesia. Sa matou matuai fafia lava e faamauna i le malumalu, ma matou te iloa o le a matou faatasi pea e faavavau o se aiga. ■

E alala le tusitala i Arisona, ISA.



LESONA I ASO SA
 O Le Autu o le Masina Lenei:
Fausiaina o le Malo
 o le Atua i Aso e
Gata Ai

O Le ALII FOU

Sa na o au le ositaulaga e toaga mai i la'u uarota fou.
 E faapefea ona ou aumaia isi ositaulaga i le lotu?

Saunia e Matthew Flitton

Mekasini a le Ekalesia

na ua siitia ese lo'u aiga i ni nai masina ae faatoa atoa lo'u 18, sa ou mauaina au lava i se uarota fou ma ua feagai ma se luitau. I totonu o le lua vaiaso talu lou taunu mai, na toe-toe lava o ositaulaga uma ua avea ma toeaiina. Na valaauna foi au e avea ma fesoasoani muamua i le korama a ositaulaga.

I le tuuina mai ia te au o lenei valaauga, na faamalamalama mai e le epikopo sa i ai le toatele o ositaulaga i le tauvalaauga, ae e toetoe lava a leai se tasi e sau. Sa i ai ia i matou le tele o galuega e faia e uunaia ai tagata e auai mai.

"E na o le valaaulia lava o tagata e o mai," o lana tala lea.

E na o le tasi le isi ositaulaga e sau i le lotu, o se alii e igoa ia Ryan, lea na auai mai i ni nai taimi i masina taitasi. Sa ou filifili e alu e tuitui i faitotoa o o matou tagata o le korama ua le toaaga mai ma valaaulia i latou i a matou gaoioiga. Sa ou popole, ma fefe nei latou le fafia mai ia te au mo le valaauliaina o i latou i le lotu. Sa ou manatu latou te le'i o mai ona ua latou le fafia i le ekalesia. Ae sa ou manatu foi o se faataitaiga lelei mo la'u misiona o loo

loma e taumafai e valaaulia, o lea sa ou u ai o'u nifo ma amata ona valaaau i isi ositaulaga po o le alu foi i o latou pale. Sa ou valaauliaina i latou i faea-saite, i gaoioiga, i le lotu.

O le mea na faateia ai a'u ona o nisi na tali moni mai lava ma o mai. Na iu lava ina i ai sa matou vaega o ositaulaga e toafa o e na amata ona o mai i se tulaga fai so. E le faapea ona sa latou le fafia i le ekalesia—sa na ona latou faatalitali mo se valaaulia e o mai ai. Sa popole foi e uiga i se tulaga fou—o le auai i le lotu—e pei foi o au.

O nisi o gaoioiga sa sili atu ona faamanuiaina nai lo isi. O tagata uma na auai mai mo le volipolo, ae sa ou tauivi e aumai tagata e auai i isi gaoioiga.

O le konafesi a le autalavou o lena tausaga sa faapitoa lava le tauia a o ou vaavaai atu i nisi o nei alii talavou o tutu i luga ma fai a latou molimau. Sa ou lagonaina na ou faia se ese-esega i o latou olaga.

O se tasi o eseesege na ou vaaia o Ryan sa auai i le lotu i vaiaso taitasi ma sa avea i maua ma se uo lelei.

Na ma maua uma ma Ryan le Perisitua Mekisateko pe tusa ma le ono masina talu ona ou siitia mai. Sa ou filifili e faatali seia maea la'u misiona e auai i le kolisi ina ia mafai ona ou faigaluega e sefe mo la'u misiona. Ua uma ona maua se matata a Ryan, ma sa tonu ia te ia e le alu foi i le kolisi . A manava galuega e masani lava ona ma tafafao faatasi.

O se tasi taimi, na ma feala ai toeitiiti lava o le po atoa e taumafai ina ia uma le tusi a Alema a o faitauina e Ryan le Tusi a Mamona mo le taimi muamua. Sa faigata ae sa faatupu ai le malosi faaleagaga. Sa maoae foi le vaai i suiga na faia e Ryan i lona olaga. Sa ia lafoiaia



mausa tuai, na fatuina ni maua e sili atu ona lelei, ma na suia nisi o ana ue ina ia mafai ona faatasi ai ma tagata na tutusa ma ona tulaga faatonuina.

Sa ou tulimatai atu i luma i la'u misiona talu mai lava ona amata ona ou alu i le lotu i ni nai tausaga ua mavae. Sa le mautinoa e Ryan pe o le a ia alu. A o ma tafafao, ma te talanoaina ai la'u misiona ma lo'u fiafia e auauna atu. A o ou faamalosiau ia te ia ma tali i fesili o le talalelei, sa ou maua le mautinoa sili atu i o'u lava tomai e auauna atu ai o se faifeautalai. O Ryan sa lava lona matua e alu ai ae sa tauivi o ia ma lana filifiliga.

"Ou te lei mautinoa pe o la'u molimau sa lava le malosi, e ui lava ina sa ou maua se lagona lelei e

uiga i le Ekalesia i lena taimi," o lana tala lea. "Sa ou manao e alu, ae sa matuai faigata lava ona tuua le aiga."

Na iu lava ina oo mai le aso ua mafai ai ona ou amata ona faatumuina au pepa o le misiona. Ina ua ou ta'u atu ia Ryan, sa ia faateia a'u i le faapea mai ua ia filifili e auauna atu foi. Na taunu mai o ma valaauga faamisiona i le po lava e tasi. Sa malaga ese Ryan e auauna atu i Kanata i le masina a'o lei amataina la'u misiona i Farani.

Ina ua ou sau i le fale i le lua tau-saga mulimuli ane, sa ou sueina uma

ositaulaga sa matou galulue faatasi. O se faanoanoaga ia te au le iloina o nisi e lei toe o mai i le lotu i le taimi na faatoa ou alu ese ai, ae sa ou fiafia lava e toe vaai ai Ryan. Sa ia auauna atu i se misiona faamamaluina, ma na pei lava o Alema ma atalii o Mosaea, sa ou maua ai le olioli sili e iloa o loo avea pea o ia ma o'u uso i le Alii (tagai i le Alema 17:2). ■

***E le faapea ona
sa latou le fiafia
i le ekalesia—sa na ona
latou faatalitali mo se
valaaulia e o mai ai.***



NA LATOU ILOAINA IOSEFA

O le a le ituaiga tagata na i ai Iosefa Samita, le Perofeta o le Toefuataiga? E mafai ona tatou aoao atili e uiga ia te ia e ala i le faitauina o mea na tau mai e i latou o e na feiloai ia te ia ma i latou na silafia lelei o ia.

O TAGATA E LE O NI MAMONA NA FEILOAI MA IOSEFA

Sa faagaeetia le tele o tagata e le o ni Mamona na feiloai ma Iosefa. Mo se faataitaiga, o Josiah Quincy, o le na faau mai Harvard ma o le na vave ona avea ma pulenuu o Boston, na asiasi atu ia Iosefa Samita i Navu. Sa ia fai mai o Iosefa o se “aafiga e tatau ona faamatalaina,” se tagata na fanau mai e taitai, “o loo i ai se foliga faale-taitai... lea sa foliga mai e faigofie le usitai i ai.” Sa ia fai mai o tusi lesona o le lumanai e mafai ona faasino ia Iosefa Samita o le puna “o uunaiga mamana i taunuuga o ona tagatanuu.”¹



O TAGATA FOU LILIU MAI NA FEILOAI MA IA

O tagata liliu mai na feiloai ma Iosefa mo le taimi muamua na faamatalaina foi ma le faamemelo. E lima aso talu ona taunuu i Navu mai Egelani, na tusi atu ai William Clayton i lona aiga: “O le po anapo na toatele i matou [na] faatasī ma Uso Iosefa, na olioli o matou loto e faalologologo ia te ia o talanoa e uiga i mea o le Malo, o ia o se tagata agaalofa ma e faauo e pei lava o soo se tasi o i tatou. Matou te lagonaina le alofa tele ia te ia ma o le a faapena foi outou.”²

O Mary Alice Cannon Lambert, sa 14 tausaga ina ua ia taunuu i Navu, na fai mai, “Na i ai ni nai alii taitai iina e faafeiloia le vaega o le au paia na o mai [i le vaa]. Na i ai le Perofeta o Iosefa Samita faatasī ma na uso. Na ou iloaina o ia i le taimi lava na vaai ai o’u mata ia te ia, ma i le taimi lava lena na maua ai la’u molimau o ia lava o se Perofeta a le Atua.”³

E mafai ona e faitau atili e uiga ia Iosefa Samita i le mataupu e 43 ma le 47 o Aoaoga a Peresitene o le Ekalesia: Iosefa Samita. O faamatalaga tina o le a fesoasoani ia te oe e iloa ai le Perofeta o Iosefa.



TAGATA NA SILAFIA LELEI O IA

John M. Bernhisel, o se tagata muamua o le Ekalesia, o se fomai. Sa ia mautotogi i le fale o le au Samita mo ni nai masina. Na ia saunoa ai o Iosefa Samita na i ai ni “mana malolosi tau i le mafaufau,” ma le malosi tele, “ma se atamai loloto o le natura faaletagata,” “faamasinoga, e silasila mamao,” ma se “fifia i le faamasinoga tonu,” “O ia o se tagata e agalelei ma loto fesoasoani, lima foai ma agaalofa, e faauogofie ma mata fiafia, ma o loo ia te ia se mafaufau e manatunatu loloto ma magafagafa lona uiga. O ia o se tagata e faamaoni, tautala sa’o, e le fefe ma tutoatas, ma e aunoa o ia mai le [faafoliga pepelo] o se ituaiga o tagata e le mafai ona maua.”⁴

O Howard Coray, o se tasi o failautusi a Iosefa, sa faa-gaeetia i le tomai o le Perofeta e feiloi ai ma ituaiga uma o tagata—o fomai, loi, ositaulaga, ma isi—o e na o mai e “tuuina atu ni fesili faigata.” Sa ia tusia o Iosefa “sa naunau i taimi uma e fai mea na manaomia mai ia te ia.... Sa ou faafetai moni lava, i le vaia o ia i taimi uma lava e lagolelei, e oo lava i le faatasi ai ma le tagata e sili ona lelei i le faasainenitis, ma le saunia [vave, saunia] o ona uiga faaalia o le a ia taliina ai a latou fesili.”⁵

O Daniel D. McArthur, o le na mulimuli ane taitaia se kamupani a taavale tosolima i le Vanu o Sate Leki, na faapea mai, “O la’u molimau o ia lava o se Perofeta moni a le Atua soifua; ma o le tele lava o taimi na ou faalogo ai i ana tautalaga ma vaai ai i ana gaoioiga o le tele foi lea o le faatalitonuina o au na ia vaai moni lava i le Atua le Tama ma Lona Alo o Iesu Keriso.”⁶



PEROFETA NA ILOAINA O IA

Na saunoa mai Peresitene Ioane Teila, lea na avea ma Peresitene lona tolu o le Ekalesia, “Afae e te fesili ia Iosefa poo le a ituaiga tagata e i ai Atamu o le a ia ta’u atu ia te oe i le taimi lava lena na te faamatalaina atu lona fuaitino ma ona foliga ma mea uma e uiga ia te ia. Atonu e mafai ona e fesili ia te ia po o a ituaiga tagata e i ai Peteru, lakopo ma Ioane, semanu e mafai foi ona ia tauina atu ia te oe. Aisea? Aua na ia vaai ia te i latou.”⁷

O le tei o le Perofeta, o Iosefa F. Samita, le Peresitene lona ono o le Ekalesia. Sa ia tusia, o Iosefa Samita “Na faatumulia o ia i le natura faaletagata sili ona tamalii ma mama, lea na masani ona faailoa mai i faafiafiaga mama—i le taalo polo, i le tauivi ma ona uso... ma faafiafiaina ia lava; ... na tumu o ia i le olioli; na tumu o ia i le fiafia; na tumu o ia i le alofa, ma isi uiga tamalii uma ia e faia e tagata maoae ma le lelei, ma i le taimi lava e tasi e faigofie ma mama; ... na ia te ia le mana, e ala i le alofa tunoa o le Atua, e malamalamai foi i fuafuaga uma a le Silisili Ese. O uiga na o le Perofeta o Iosefa Samita.”⁸ ■

FAAMATALAGA

1. Josiah Quincy, “Joseph Smith at Nauvoo,” *Figures of the Past from the Leaves of Old Journals*, lom. 3 (1883), 376–400; tagai foi Richard L. Bushman, “The Character of Joseph Smith,” *BYU Studies*, vol. 42, nu. 2 (2003), 29–30.
2. Bushman, “The Character of Joseph Smith,” 33.
3. *Aoaoga a Peresitene o le Ekalesia: Iosefa Samita*, 553.
4. *Aoaoga: Iosefa Samita*, 553–54.
5. Bushman, “The Character of Joseph Smith,” 29.
6. *Aoaoga: Iosefa Samita*, 553.
7. *Aoaoga: Iosefa Samita*, 553.
8. *Aoaoga: Iosefa Samita*, 553.



PE O OE O SE TAGATA E TALIAINA po o SE TAGATA FOAI?

Pe ua e tu ea i se taimi e mafaufau pe *aisea* e te auauna atu ai i isi ma tausi i poloaiga? O le masina lenei o se taimi lelei lea e faia ai lena mea a o e suesue e uiga i le fusuiaina o le malo o le Atua i au lesona i le lotu. E mafai ona e fesili ia te oe lava, pe o uunaia atili au e ala i mea ou te mafai ona *taliaina* po

o mea e mafai ona ou *foai atu*? O fesili o loo i luga o le a fesoasoani e te iloa ai pe o e matele lava ina faasaga i totonu (mafaufau ia te oe lava ia) po o fafo (mafaufau i isi). E le afaina le mafaufau i faamanuiaga o le a e maua, ae afai e te iloa ai ua e matele lava ina vaavaai i totonu

nai lo le tele i le itu i fafo, ia taumafai e tepe a e i luga. Na aoao mai Peresitene Thomas S. Monson: "la manatua o lenei galuega e le o sa outou galuega po o sa'u foi. E mafai ona tatou taufai tepe a e luga ma aapa atu mo le fesoasoani mai le lagi." ("Fai Lou Tiute—E Sili Lena," *Liahona*, Nov. 2005, 58). ■

FAAAOGA PO OLE MAUMAU



Vele ese alofaga ma atiina ae au taleni. E mafai ona e faia se matafaioi autu i le faia o le lalolagi o se nofoaga ia sili atu ona lelei.

“Ou te lagona lou le agavaa e avea ma se peresitene o le vasega o Tamaitai Talavou. E mafai faapefea ona avea a'u ma se taitai e sili atu ona lelei?”

Afai e te lagona le le atoatoa pe a e mauaina se vala-auga, o loo e i ai i se au lelei. O Ieremia, Enoka, ma Iosefa Samita na talavou uma lava ma na lagona uma lava le le agavaa ina ua latou maua o latou e valaauga faaperofeta, ae na faaaogaina pea i latou e le Alii e faalauetele ai Lona malo. E pei lava ona faaaogaina e le Alii perofeta anamua e faataunuu ai mea tetele, a o e tatalo ma faalagolago ia te Ia, e mafai ona Ia faaaogaina oe.

Atonu o le mea sili e mafai ona e faia mo tagata o lau vasega o le avea ma a latou uo. Aoao o latou igoa. E mafai ona e tatalo mo i latou i aso taitasi ma atonu e mafai foi ona e anapogi mo i latou pe afai o loo latou tauivi. Mafaufau e fesili atu e uiga i o latou olaga i fafo atu o le ekalesia, ma ataata ma faatalofa atu ia te i latou pe a e vaai ia te i latou, ma nonofo faatasi ma i latou i le lotu po o le aoga. Ia mataala ma vaavaai solo mo i latou o e atonu e manaomia se alofa faaopoopo ma le lagolago.

Ma aua le fefe e fesili atu mo se fesoasoani. O le a le tuula-foaiina lava oe e le Tama Faalelagi—ua Ia tuuina atu ia te oe ni fesoasoani ma faufautua matutua. O le a latou fesoasoani ia te oe, ma e faapena foi o Ia.

E pei ona saunoa mai Peresitene Gordon B. Hinckley (1910–2008): “Tootuli i ou tulivae ma ole atu mo faamanuiaga a le Alii; ona e tulai lea ma fai le mea ua poloaiina ai oe. Ona tuu atu lea o le mataupu i aao o le Alii. O le a e iloa ai ua e faataunuuina se mea e sili atu ma lona tau” (“Mo Tina ma Tamaitai o le Ekalesia,” *Liahona*, Nov. 2003, 114).

Ia Avea o se Uo

I le avea ai o se peresitene o le vasega, sa ou matua lagonaina foi lo'u le agavaa. Ae e taua le taumafai ia maua e tamaitai talavou le lagona o le alofaina ma le faaaofia ai. Avea ma se uo e lagolago ma faalogo i ou fesoasoani pe a faia faaiuga. Fai se faataitaiga amiontu ma taumafai e ola i tulaga faatauaina o Tamaitai Talavou, ae aua e te faamoemoeina oe lava ina ia atoatoa. Pau le mea o loo faamoemoe le Tama Faalelagi e mo oe ia faataitai. Afai e te valaau atu ia te Ia, o le a Ia tuu atu ia te oe le malosi ma le taitaiga e te manaomia.

Rebecca N., 16 tausaga, New Hampshire, ISA



Auauna Atu ma le Lotomalie

Sa ou lagonaina le mea lava lea e tasi, ona sa avea au ma peresitene o le vasega a le Maea Meite. O loo mafai pea ona ou manatua le lagona sa i ai a o ou ulu atu i le ofisa o le epikopo mo le faatalanoaga. Sa mafai ona ou teena, ae sa ou iloaina e le o se tofiga mai lo'u epikopo—o se valaauga mai le Atua. O le a fesoasoani le Tama Faalelagi ia i tatou e faataunuu o tatou valaauga pe afai tatou te naunau e tuuina atu i tatou lava ia te Ia ma ia lotomaualalo.

Nicole P., 16 tausaga, Filipaina

Alofa Ia I Latou E Te Aoaoina

Ina ia avea ma se taitai e sili atu, e tatau ona e alofa moni ia i latou e te auauna atu i ai. Lafoai soo se lagona le fiafia ma o le faamagalo atu o le a manaomia. E mafai ona e tatalo e iloa lo latou taua e pei o le Atua. Tatalo ina ia lagonaina le alofa ua ia te Ia mo



oe faapea foi tagata o lau vasega. Ou te iloa mai aafiaga e mafai ona fesoasoani le alualu i Luma o le Tagata Lava Ia ia te oe e atiina ae ai uiga auau mama ma tulaga faatauaina e manao-mia e faataunu ai lou valaauga. O le a tuu atu e le Atua ia te oe le mana e te manaomia pe afai e te fesili atu mo lena fesoasoani.

Mary B., 16 tausaga, Uosigitone, ISA



Amata i le Mea o Loo e I Ai Nei

E mafai ona e avea ma se taitai sili atu ona lelei e ala i le faaaogaina o uiga auau mama e te manao ia maua. Tatalo mo le Agaga e faatasi ma oe pe a e faia faaiuga. Tatalo ina ia gauai atu i manaoga o tamaitai talavou. E tele mea e mafai ona e faia e avea ai ma se taitai e sili atu ona lelei, ae sa ou iloaina o le laasaga muamua lava i taimi uma o le talitonu e te mafai.

Savanna P., 15 tausaga, Texas, ISA

Auai i le Malumalu

Ina ua faatoa valaaulia au o se peresitene o le korama a tiakono, sa ou le mautinoa pe faapefea ona faateleina lou faaleagaga. Sa amata ona ou faia le talafaasolopito o aiga, e masani lava i aso Sa taitasi. Sa ou alu i le malumalu i taeao uma o aso Toonai. O la'u sini o le ave o igoa o alii mo papatisoga ma faamauga i le tele o taimi ou te mafai aai. Ina ua uma ona ou alu i le malumalu i vайасо taitasi, sa ou lagona le sili laitiiti atu o le faaleagaga, ma o le auala lena na sili atu ai ona lelei lau fesoasoani i la'u korama.

Josh B., 13 tausaga, Iuta, ISA

Faatino le Musumusuga

Afai ua tuuina atu e le Alii se valaauga ia te oe, ona o loo i ai se galuega e mafai ona e faia. E tatau ona tatou ole atu i le Atua, e pei ona fai mai Iakopo 1:5. E ala i le mana o le Agaga Paia, o le a faaali ia i tatou le mea e tatau ona tatou faia (tagai i le 2 Nifae 32:5). Faatasi ai ma Lana fesoasoani, e mafai ona tatou "iloa ai le moni o mea uma" (Moronae 10:5). Ona tatau lea ona tatou mulimuli i le musumusuga ua tatou maua. E i ai sau tautinoga loloto faapea talu ai ona o le Alii e taitaia i tatou, e mafai e i tatou uma ona faalaulele o tatou valaauga.

Lucy D., 17 tausaga, Falani



Fuafua ni Gaoioiga Faagaeetia

Fai soo fonotaga ma lau au peresitene ma fuafua ni gaoioiga faagaeetia e fetau ma manaoga ma mea e fafia i ai teine. Afai ua le auai se tamaitai talavou i lau vasega, ia tau atu ia te ia na e misia lava ia. O se tasi o mau na fesoasoani ia te au o Mosaea 18:9.

Karen P., 16 tausaga, Mekisiko



NA FILIFILI OE E LE ALII

"Ua valaauna oe e le Atua. E silafia oe e le Alii. Na te silafia po o ai e finagalo o la e auauna atu i tofiga uma i totonus o Lana Ekalesia. Na la filifilia oe.... O le tagata na musuia e fautuaina oe mo lenei valaauga na te lei faia ona e fafia ia te oe pe o latou manaomia se tasi e faia se galuega patino. Sa latou tatalo ma lagonaina se tali e faapea o oe le tagata e ao ona valaauna....

"Ua valaauna oe e fai ma sui o le Faaola. E avea oe ma sui o le Alii pe a e molimau atu, e avea ou lima ma Ona aao pe a e siitia ma fesoasoani atu i isi."

Peresitene Henry B. Eyring, Fesoasoani Muamua i le Au Peresitene Sili, "Tulai i Lou Valaauga," Liahona, Nov. 2002, 76.

FESILI O LE'A SOSOO MAI

"Ou te manao e valaaulia ou tausoga i le lotu, ae ou te fefe o le a feita o latou matua. E faapefea ona ou mafai ona faasoa atu la'u molimau i o'u tausoga?"

Auina mai lau tali ma, afai e manaomia, se ata manino lelei ae lei oo i le aso 15 o lanuari, 2016, i le liahonalds.org po o le i-meli i liahona@ldschurch.org.

O le faamatatalaga ma le faatagaga o loo i lalo e tatau ona aofia mai i lau i-meli po o le tusi: (1) igoa atoa, (2) aso fanau, (3) uarota po o le paranesi, (4) siteki po o le itu, (5) o lau faatagaga tusitusia, ma, afai e ititi ifo i le 18 ou tausaga, o le faatagaga tusitusia a ou matua (e talia foi le imeli) e lolomiina ai lau tali ma lou atu.

E ono faapupuuina tali mo le uumi po o le manino.



Saunia e Elder
Jörg Klebingat
O Le Fitugafulu

O Mea Sa Ou Aoaoina a o Avea o Se **TALAVOU FAATOA LILIU MAI**

Ao ou fou mai i le Eklesia, sa ou vaaia se faataitaiga maoae o le ositalulaga mai isi talavou i la'u uarota. Mai lava i lena taimi agai i luma, ua ou aoaoina le tele o lesona maoae.

Sa ou auai i le Eklesia ina ua 17 o'u tausaga. Sa faailoaina mai ia te au e ni tagata Amerika mai se nofoaga autu o le militeli i lo'u nuu i Siamani. Sa leai se uarota e tautala-Faasiamani i lau eria, o lea na ou auai i le lotu ma tagata Amerika i le nofoaga autu o le militeli i le tamai falesa a le ami mo lotu eseese.

I se tasi Aso Sa ae le'i leva lava ona ou papatiso, i le faa-iuga o sauniga, na tulai le epikopo ma faapea mai, "Pe mafai e matua o loo i ai tamaiti aoga seminare ona faamuli mai faamolemole?" Sa ia talosagaina foi au e auai faatasi ma i latou.

O le taimi lava na tuua ai na o matou ma nei aiga, le epikopo, ma au i le falesa, sa faamalamalama mai e le epikopo ua ou agavaa e auai i la latou vasega o le seminare mo le tausaga aoga o le a sosoo ai. Ae sa ou auai i le aoga Siamani i le lotoifale, lea sa amata i se itula e muamua ai nai lo le aoga a Amerika lea e auai uma le autalavou mai le nofoaga autu o le militeli. Ina ia lava lou taimi e tamoe vave ai i lalo o le mauga ina ia oo atu i la'u aoga i le taimi sao, e tatau ona latou suia la latou vasega seminare i le 6:00 i le taeao, e sili atu nai lo le itula ua vave ai nai lo le taimi na latou masani ai.

Ona fai atu lea o le epikopo e palota pe faamata e mafai ona latou faia lenei osigataulaga ina ia mafai ona ou auai i le vasega. Na vave lava, o matua uma ma tamaiti aoga uma na sii o latou lima ma fai mai ioe.





**Sa fai mai le epikopo i tagata
uma ina ia palota i le faia o le
seminare i se itula e vave ai ina
ia mafai ona ou auai. Na latou
fai mai uma ioe.**



O se taimi

maoae lena mo au.

Na aoaoina au i se lesona e uiga i le ositaulaga. O nei tamaiti aoga talavou sa naunau e ositaulaga lo latou lava mafanafana—e le na o mo se aso po o se vaiaso ae mo le tausaga aoga atoa—mo se tagata fou liliu mai semanu e le mafai ona auai i le seminaré.

Oute faafetai pea i la latou osigataulaga, i le iloaina o le taua o lena tasi le tausaga o le seminaré (suesueina o le Mataupu Faavae ma Feagaiga) mo lo'u olaga fou i le Eklesia. A aunoa ma le seminaré semanu ou te le maua le tele o fesootaiga ma le Eklesia sei vagana ai i le Aso Sa. O le seminaré i aso taitasi o se sauniuniga maoae mo se misiona. Sa aoaoina mai ia te au ni mea se tele e uiga i le amio pulea, ma, ioe, sa faamanuiaina ai au i lou malamalama e leai se gataaga o le talalelei ma tusitusiga paia. Fesili mai ia te au i fuaiupu o mau tauloto uma lava o le Mataupu Faavae ma Feagaiga mai i lena taimi, ma o le a ou iloaina uma. O nei aafiaga na fesoasoani ia te au e faalatalata atili atu ai i le Tama Faalelagi ma fesoasoani foi ia te au e feagai ma lui-tau o le avea ai ma le tagata e toatasi e tautala-Faasiamanu o le Eklesia i lo'u nuu.

Talanoa ma le Atua

Ina ua uma le aoga, ma a o lei ou alu i se misiona, sa ou faamiaeaina le tautua e auauna faamilitali. A o ou i ai i le militeli, sa ou maua ai se amioga sa ou tausia e oo mai i le aso: ina ia tatalo e le aunoa.

E mautinoa lava, o le siosiomaga i le militeli e le o taimi uma lava ma matuai faaleagaga ai—o loka, o ata, o le talanoa, a ata tifaga e matamata ai tagata i le po. Ae na

ou iloaina o le a ou alu i se misiona. Sa ou manao e tumau le malosi. Sa ou le fia pau. Ou te lei manao e tuu atu i uunaiga a tupulaga. O lea sa ou atiina ae ai se amioga o le tatalo i lo'u loto i taimi uma.

O le savali mai lea fale i lea fale, alu i luga ma lalo o mauga i le vao, taoto i pu o alope, taaalo i taalogia o le taua—po o fea lava ou te i ai, ou te fesootai lava ma le Tama Faalelagi i le tatalo i soo se taimi lava ou te mafaia ai, e faatumuina minute ma o nisi taimi o itula e fesootai ai pe talanoa ai ma le Tama Faalelagi ina ia faalatalata atu ia te Ia ma tumau ai le malosi. E tele lava, e na o lou tuuina atu lava o le faafetai.

O lenei uiga o loo i ai pea ia te au. Pe a ou aveina le taavale i se mea po o le saofai i se pasi po o le savali i se nofoaga, ua avea ma se masani mo au le i ai pea lava pea o se tatalo i lo'u loto, po o le "tatalo e le aunoa" e pei ona fai mai ai tusitusiga paia (tagai, mo se faataitaiga, 2 Nifae 32:9). O se masani lelei lena e atiina ae ao laitiiti.

Ua tatou iloa e tatau ona fai a tatou tatalo, ae e le na o le faapea o le tootuli mo sina taimi puupuu i le taeao ma le po e avea ma se mea e faafafia ai le Tama Faalelagi. O le tatalo e tatau ona liua i se fesootaiga faamaoni, loloto, ma faifai pea ma lo outou Tamā, lea, i le aluga o taimi, o le a fesoasoani e te faalatalata atili atu ai pea lava pea ia te Ia. O le atiina ae o lenei masani o le tatalo o le a fesoasoani ia te oe e feagai ai ma faaososoga uma lava o loo i ai iina i le lalolagi (tagai i le 3 Nifae 18:15, 18). O lea la, pe a e alu mai le Tulaga A i le tulaga E, po o soo se taimi lava e i ai sou taimi avanoa, mafaufau e faaititia le taimi e faaaluina i le faalogologo i musika po o le tesi ae ia sili laitiiti atu sina taimi e tatalo ai i lou loto.

Faaaoga le Togiola a lesu Keriso i Taimi Uma

A o faaauau ona e tatalo ma aoao i le talalelei, o le a e iloaina o le Togiola a Iesu Keriso o loo avanoa ia te oe i itula uma o aso uma ina ia mafai ona fesoasoani ia te oe e "maua se faamagaloga o a outou agasala" (tagai i le Mosaea 4:11–12). E mafai ona e alu atu i luma o le Tama Faalelagi e faaaoga ai lenei mana ma faamamaina moni lava i soo se taimi, ae le na o le Aso Sa, e le na o le taimi e te alu ai i le epikopo e tautau atu se mea matuia.

E finagalo le Alii mo oe ia faaaoga le Togiola a Iesu Keriso i aso taitasi ina ia mafai ona outou faamamaina ma

agavaa, lagona le Agaga, ma ia taitaiina ai i taimi uma nai lo le i ai o le femoumouuai i taimi uma. E ala i le faaaoga-inia o le Togiola i aso uma, e mafai ona e maua lenei faamanuiaga e tusa lava po o a ni mea sese sa e faia i le taimi ua tuanai. E lagona e le toatele o le autalavou o le salamo e aofia ai na o le alu lava i le epikopo ma ta'u atu ia te ia e uiga i agasala matuia. Ae e sili atu ona tele le salamo. O lona uiga o le faia o se taumafaiga faatauvaa, faifai pea, ma le agaga tatalo, i aso taitasi e (1) suesue i tusitusiga paia, aemaise lava o i latou o e aoao atu e uiga i le Togiola a Keriso, ona (2) aoao lea pe faapefea ona faaaogaina tonu i lou olaga i taimi uma o aso uma. O lona aoga lena. Ia silafia e le Tama Faalelagi i aso uma o le mea lenei e te manao ai—ina ia sili atu ona lelei i le taimi nei nai lo le mea na e i ai ananafi.

Aua nei faatagaina le fili e tuu mamaao ese oe ma le Tama Faalelagi e ala i le uunaia o oe e lagona e le o lava


Paulo, "ia tofotofo outou ia te outou" (2 Korinto 13:5). Ae o le taimi lava e aoao ai e uiga i le Togiola ma pe faapefea ona faalagolago i ai, o le a e iloa ai e mafai ona e lagonaina le alofa o le Alii e ui lava i ou sese.

Ia malamalamama po o ai oe, ma ia malamalamama po o ai Keriso ma le mea na Ia faia mo oe. Ona tuu lea o na mea e lua faatasi ina ia mafai ona e mama i taimi uma ma maua le lototele ia te oe lava ma i le Tama Faalelagi ma le Faaola. Ona, sosoo lea, o le a e maua se lagona lelei o le taua faaletagata o oe lava ia ma le lototele faaletagata lava ia.

I se taimi, o mea nei sa amata ona ou aoaoina i le avea ai o se talavou faatoa liliu mai, ma ua matuai faamanuiaina ai lo'u olaga. A o e ositaulaga, suesue, ma taumafai e tumau le latalata atu i le Tama Faalelagi, o le a Ia faamanuiaina foi oe. Aua lava nei fiu! ■

O le Togiola a lesu Keriso o loo avanoa ia te oe i itula uma o aso uma.

lou lelei, o isi tagata uma e sili atu ona lelei—e peiseai o le Togiola a le Faaola ma Lona alofa ma le faamaoniga o loo faatautau ifo i ou luma, ae e le mafai ona oo i ai. E le moni lava lena mea. E alofa le Tama Faalelagi ia te oe e pei lava ona e i ai nei, ae, o le mea moni, e tatau lava ona e alualu i luma ma taumafai *pea* e tausi polo-aiga ma faaaoga le Togiola i aso uma, *i taimi uma*. E pei ona saunoa le Apostolo o





Alualu i Luma o le Tagata Lava la i le **GAFA O LOU AIGA**

E na o maua ma lou tuagane tagata o lo'u aiga i le Ekalesia—ia o le mea lena sa ou manatu i ai a o lei amataina lau galuega o talafaasolopito o aiga.

Saunia e Raisa Marcondes

Sa ou tolopoina lava i taimi uma le faia o la'u gafa. Ae o lo'u naunau e auauna atu i se misiona na taitai atu ai au e faatutu ni sini e fesoasoani e saunia au lava ia e avea ma se faifeautalai e sili atu ona lelei. Faatasi ai ma le fesoasoani a se epikopo musuia, sa ou filifili loa e amata ona galue i le Alualu i Luma o le Tagata Lava Ia. Ina ia mafai ona ausia ni sini ma galuega faatino o galuega lelei, sa manaomia ona ou aafia i gafa. O lea na ou amata galue ai.

Ou te iloa na taiatalaina au e le Agaga, aua o se tasi po o le Aso Sa, ina ua faatoa tolu itula o galue, sa tupu se mea ofoo fogia.

O le taimi lava na ou amata ai, sa ou manatuaina o le tama o le tama o lou tama matua sa avea ma kovana o le setete o Amazona, Pasila. O lea sa ou taina ai lona suafa i totonu o se masini o le sailiga i le initoneti, ma i lou tei, sa ou maua ai se itulau o le Wikipedia e uiga i le tama o le tama o lou tama matua ma le tina o le tama o lo'u tama matua! Sa vave ona ou iloaina ai taleni ma meaalofa a i laua o loo ia te au, ma sa amata ona faatupuina lagona fiafia i totonu ia te au. Ae sa i ai pea le tele o isi mea ina ia iloaina.

I le vaavaai ai i ala o fesoootaiga i le itulau, sa ou matauina ai se tasi ua fai mai “family tree.” Sa ou kiliki i ai, ma sa ou maua ai le tele o lala o lo'u aiga ou te lei iloaina sa i ai. Ae o le mea sa sili ona ou tosina i ai o le igoa o le tuafafine o lou tama matua, o Rosalina Meireles, lea na nofo moni lava i Iuta.

Sa ou tei lava. Sa ou manatu na o maua ma lou tuagane ni tagata o le Ekalesia. Mata o i ai moni lava nisi tagata o le Ekalesia i lo'u aiga? Ina ua ou kiliki i luga o lona igoa, sa ou vaaia se sootaga i se itulau o le Facebook, lea sa ou faafesootaia ai o ia. I totonu o aso e lua sa ou maua ai se savali mai ia te ia, ma faamaonia mai ai matou te aiga ma o ia foi o se tagata o le Ekalesia.

Sa ou lagonaina le matua faafetai lava i le Tama Faalelagi mo le faatagaina o au ou te lagonaina lea olioli tele sa ou lagonaina i lena taimi.

Sa faaauau pea ona ou saili mo o'u tuaa ua maliliu, ma sa faamanuiaina au e le Tama Faalelagi i le tele o igoa o le aiga e mafai ona ou ave i le malumalu. Ae sa Ia fesoasoani foi ou te maua ai tagata o loo soifua o le aiga o e o loo faamaoni i le talalelei toefuatiaina a Iesu Keriso. Ma ou te nofo aitalafu ai i le Alualu i Luma o le Tagata Lava Ia, le galuega o talafaasolopito o aiga, ma lo'u naunau e auauna atu i se misiona. ■

E alala le tusitala i Manaus, Pasila.



Saunia e
Elder Marcus B. Nash
o le Fitugafulu

Tusitusiga Paia mo Spencer

“O tusitusiga paia ou te fiafia i ai, O taimi uma lava ou te faitau ai, le Agaga moni e tau mai”
(Tusipesa a tamaiti, 66).

Ina ua faatoa uma ona ma faaipoipo ma lo‘u toalua, na Luunaia e Peresitene Spencer W. Kimball (1895–1985) tagata o le Ekalesia e faitau tusitusiga paia i aso uma i o latou aiga. Sa ma mananao e mulimuli i le perofeta, o lea na ma filifili ai o le a ma faia faatasi o se ulugalii ona faia lea faatasi ma le ma fanau i le lumanai.

I tausaga mulimuli ane, ua faatupulaia lo matou aiga i le toalima o le fanau, e aofia ai le ma uii, o Spencer.

I se tasi taimi, ina ua ono tausaga le matua o Spencer, na ma o ese ma lo‘u toalua mo ni nai aso ma tuua ai tamaiti ma se tausi tama. Ina ua ma toe foi mai i le fale, sa ou nofo i lalo ma Spencer ma fesili atu ia te ia pe na faapefea mai mea uma a o ma ese atu.

Na ia fai mai ia te au na faigata ia te ia ona moe. Ina ua ou fesili pe aisea na te le‘i moe lelei ai, na ia mafau-fau i ai ma sa fai mai na te lei iloaina.

Mulimuli ane i lena afiafi na amata e lo matou aiga la matou masani i po uma o le faitauina faatasi o le Tusi a Mamona.

Na faafuasei lava ona ee Spencer, “O lena!” Sa ou fesili atu po o le a le mea na ia fai mai ai. “O le mafuaaga lena na le mafai ai ona ou moe lelei i le po.”

“Aisea na le mafai ai ona e moe?” Sa ou fesili atu ai.

“Matou te lei faitauina tusitusiga paia i le po a o lua o, ma ou te fiafia lava i le lagona ou te maua mai i tusitusiga paia.”

Sa aoao Spencer o le faitauina o tusitusiga paia i aso uma e aumai ai ia i tatou le faamafanafanaga, filemu, ma le taitaiga a le Agaga Paia.

E mafai ona tatou aoao e fiafia i tusitusiga paia pe a tatou faitau i aso taitasi. Pe a tatou faia, o le a taialaina i tatou e le Agaga Paia ma faamalosia e ala i lo tatou Tama Faalelagi. ■





O Se Lesona mai i Lo'u Tama

Saunia e
Elder David A. Bednar

O Le Korama a Aposetolo
e Toasefululua

Sa ou aoaoina se lesona maoae mai lo'u tama e uiga
i le pule ma le mana o le perisitua.

Sa ou ola ae i se aiga sa i ai se tina faatuatua ma se
tama ofoo fogia. O lou tama sa le o se tagata o la tatou
Ekalesia ae e sau pea i sauniga a le Ekalesia faatasi ma
lo matou aiga. Sa ia faiaoga i le au sofipolo a la matou
uarota ma fesoasoani i gaoioiga a le Sikauti.

Ao ou laitiiti sa ou fesili i lou tama i le tele o taimi i
vaiaso taitasi po o afea e papatiso ai o ia. Sa tali mai lo'u
tama i taimi uma, "Tavita, o le a ou auai i le Ekalesia pe
a ou iloa o le mea sa'o lea e fai."


I se tasi Aso Sa sa ou fesili ai i
lo'u tama po o afea e papatiso ai o
ia. Na ona ia ataata lava ma fesili mai
ia te au. "Tavita, o la outou ekalesia o loo
aoao mai o le perisitua sa aveesea mai le lalolagi
i aso anamua ma ua toefuatai mai e ala mai i avefeau
faalelagi. Afai ua i ai i la outou ekalesia le perisitua toe-
fuataiina o le Atua, aisea ua toatele naua ai alii i la outou
ekalesia e leai se eseeseaga i le faia o o latou tiute o le
perisitua nai lo alii i la'u ekalesia?"

Sa matuai nimo i lo'u mafaufau. Sa leai sau tali mo
lou tama.

Sa ou iloaina o alii o loo umia le perisitua e *tatau*
ona ese o latou aga nai lo isi alii. O e umia le perisitua
e tatau ona e le gata ina maua le pule o le perisitua ae
tatau foi ona faamaoni ma agavaa e faaaoga le mana
o le Atua.



Sa ou filifili ou te le manao lava e avea ma se faataita-
iga leaga i lo'u tama. Sa na o lou manao lava ia avea ma
se tama lelei. E manaomia e le Alii i tatou uma o ē umia
le perisitua ina ia faamamalu, amiomama, ma tama lelei
i taimi uma ma i nofoaga uma.

I ni nai tausaga mulimuli ane, *sa* papatisoina ai lo'u
tamā. Sa ou maua le avanoa e faaee ai i ona luga le Peri-
situa Arona ma le Perisitua Mekisateko. O se tasi o aa-
fiaga maoae i lou olaga o le vaai lea i lou tama ua maua
le pule ma le mana o le perisitua. ■



**O Le Tusi a Mamona, o se Meaalofa
mai le Tama Faalelagi**

Iosefa Samita—Talafaasolopito 1:29–35, 42–54, 59–60



Oti ese ata o mau nei ma kulu pe faapipii foi i ni pepa malo, se pepa mamafa, tamai tagapepea, po o ni fasilaau. Ia teu i se teutusi po o se ato, faatasi ma le faailoga o loo lisi ai mau.

Po o le Kerisimasi faatasi ai ma le au Córdobas

*O maua ma Marycielo sa na o le
tasi le ma meaalofa. E faapefea ona
mafai ona ma faasoaina?*





Saunia e Honney Thalia Cabel Losno

E faavae i se tala moni

"Aua na faia e outou i le tasi o e aupito ititi o ou uso nei, o au lea na outou faia i ai" Mataio 25:40.

Tle Po o le Kerisimasi sa na o le lua meaalofa i lalo o la matou laau laitiiti. E tasi le meaalofa mo lou uso e lua-tausaga le matua, o Marycielo, ma le isi tasi mo au. Sa le lava se tupe, o le tala lea a Mama, ma na o le pau lena o mea o le a tatou maua.

O lena po na faitau ai e Mama se tala mai le *Liahona* e uiga i se Kerisimasi e aunoa ma ni meaalofa. A o ia faitau, sa ou lagonaina le fiafia ma le toafilemu. Atonu o le mauaina na o le tasi le meaalofa e le leaga tele lava. Ona fai atu lea o Mama, "Nai lo le taalo i taaloga e pei ona tatou masani ona fai mo le Po o le Kerisimasi, ae faapefea pe afai tatou te avatua ni meaalofa i se aiga i le uarota?"

"Ae o le a le mea e mafai ona tatou tuuina atu ia te i latou?" Sa ou fesili atu ai.

"Ia, o loo i ai sina tatou vaega e faaleoleo."

Sa ou tepa atu i a matou meaalofa e lua, sosoo ai ma le ata o Iesu i luga o le puipui. "Ou te matea o Iesu o le a faasoa atu mea sa ia te Ia."

Sa matou tatalo po o fea le aiga e asia. O le tele o aiga matou te iloa e lei tele ni mea i lena tausaga. Ina ua maea le tatalo, na matou lagona e tatau ona matou asiati atu i le aiga o Córdoba. Sa i ai ni a latou tamaiti e toatolu, ma lo latou papa sa le toe faigaluega.

Sa matou o atu i le faleoloa ma faatauina se *panetón* (o se falaoa o aso

malolo), se moa tao, ma ni meaalofa laiti e tolu. Sa matou maua le fiafia i le pikina o na mea. Sa faaluina uma e mama le tupe sa ia te ia, e tusa ma le 30 tupe *Peru* (pe a ma le I.S \$10).

O le taimi lava sa uma ai, na matou tietie atu loa i le au Córdobas. Sa ou uuina le lima o Marycielo a o matou savavali atu i le faitotoa.

Na iloa mai matou e Sister Córdoba ma sau i fafo e fusi i matou. "Oka se faatei ina manaia! Susu mai i totonu! Alala i lalo, "o lana tala lea. A o matou savavali i totonu, sa ia oomi le lima o Mama ma pōpō lo'u tauau. "O Rolando ma teineiti o le a matua fiafia lava e vaai ia te outou," sa ia fai mai ia te au.

O le fola i totonu o le fale sa faia i le palapala. Sa leai se eletise, na o moligao. Sa ou faanoanoa laitiiti mo le aiga o Córdoba. Sa ou moomoo maimau pe ana mafai ona matou faia nisi mea e fesoasoani ai ia i latou. Ae sa lei foliga mai na iloa e Mama le palapla po o moligao. Sa na o lona fiafia ua faatasi ai iinei ma Sister Córdoba.

"Na matou o mai e faamanuia atu ia te outou se *feliz Navidad!*" O le

tala lea a mama. "Matou te fiafia o i tatou o ni uo." Sa ia tuuina atu meaai ma meaalofa ia Sister Córdoba, lea na tuuina mai se ataata lapoa, ma fai mai faafetai tele.

O Rolando, o Madeline, ma Raquel na tamomoe mai le isi potu e faatalofa. Na autilo mai Marycielo faataamilo i lo'u vae ma ataata. Sa ia ata ina ua faia e Rolando se foliga malie ia te ia. E lei umi ae talanoa tagata uma, faamatala tala malie, ma talie.

"E sili atu lea nai lo le taaalo i taaloga na o matou lava," sa ou mafaufau ai. Sa ou fiafia na matou o mai. E le afaina pe lei i ai ni a matou mea se tele e faasoa atu. Ma sa lei afaina pe o le fola o ni palapala. O le Kerisimasi e le o mea ua matou maua. O le uiga o le faatasia.

Ina ua matou sauni e tuua, sa toe opoina i matou e Sister Córdoba. "Faafetai tele lava," o lana tala lea. Sa gatete lona leo, ma sa ou iloa atu loimata i ona mata. Sa ou tu i luga o ou tamatamai vae ma kisi atu ia Sister Córdoba i le alafau.

"Feliz Navidad," sa ou fai atu ai. ■
E alala le tusitala i Peru.

O Le Paso o le Toefuataiga



*O le a le uiga o le
upu Toefuataiga?*



Saunia e Heidi Poelman

E faavae i se tala moni

*"Aua ua Ou faaee i luga o oe ki
ma le mana o le perisitua, lea
ua Ou toefuatai ai mea uma"*
(MF&F 132:45).

I le foi atu i le fale mai le lotu,
na manatua ai e Ana le fasi pepa
laitiiti na tuuina atu e lona faiaoga
ia te ia. "Tina, mate mai la! Ou te
tuuina atu se lauga i le Peraimeri
i le aso Sa a sau."

"Tai manaia," na fai mai ai Tina.
"I le a?"

"Ou te lauga e uiga i le Toefuataiga.
Ae ou te le mautinoa po o le a
lena mea."

"O le Toefuataiga o lona uiga ua
toe aumaia e le Atua, pe toefuatai,
mea uma e finagalo o Ia ia maua
e Lana Ekalesia," le tala lea a Tina.
"Na ala mai i le Perofeta o Iosefa
Samita, ona Ia toe aumaia malumalu,
le perisitua, papatisoga, ma le mea
alofa o le Agaga Paia. A aunoa ma
le Toefuataiga, tatou te le maua le
Ekalesia!"

Na lue atu le ulu o Ana. "Ou te
matea o lena mea e sao. Ae ou te
manatu e le mafai ona ou faamatala-
ina e pei ona e faia."

"Ei, e i ai sou manatu," na fai mai
ai Tina a o la taunuu atu i le fale.
"Sau ta o."

Na mulimuli atu Ana ia Tina i le
potu malolo. Na amata ona la faia se
paso anapo, ma o vaega sa taatitia
pea i luga o se tamai laulau.

"Mafaufau i le talalelei e pei o se
paso ua uma ona fai." Sa avae i luga
e tina se vaega. "E tele vaega o le ata
sa i le lalolagi i taimi eseese. Ae ina
ua maliu Iesu ma Apostolo, na tele
upumoni o le talalelei na leiloloa pe
na suia. O na vaega o le upumoni
na manaomia e toe aumaia."

"O lea la, o le a le mea na tupu?"
Sa fetuunai e Anna nisi o vaega o
loo salalau.

"I le tele o tausaga mulimuli ane
na valaaauina e le Atua se tama talavou
faifaatoaga e toe aumaia vaega

uma ma tuu i latou faatasi e pei lava
o le taimi a o i ai Iesu i le lalolagi.
O ai la e te manatu o le tama lena?"

"Iosefa Samita!" Le tala a Anna,
ao ataata. "Ou te manatu ua amata
ona ou malamalamana." Sa la talanoa
atili e uiga ia Iosefa Samita ma
Tina ma vaega eseese o le talalelei
na toe aumaia e le Atua e ala mai
ia te ia.

O le vaega na totoe o le vaiaso,
na tuni e Ana ma faataitai lana lauga.
Sa ia tatalo i le Tama Faalelagi ina ia
mafai ona ia lototele ma faasoa atu
lana savali i le Peraimeri.

I le Aso Sa, ina ua oo i le taimi
o le lauga a Anna, sa ia tu i luga,
manava loloa, ma uu i luga se paso
i luga o se laupapa ina ia mafai ona
iloa e tagata uma. O vaega uma sa
tuufaatasia i le paso.

"I aso la ua leva, o le tele o vaega
taua o le talalelei sa i ai i le lalolagi.
Ina ua maliu Iesu ma Ana Apostolo,
o nisi o vaega na leiloloa." Na



aveese e Ana ni vaega mai le paso ma tuu i lalo. "Ona valaaulia lea e le Tama Faalelagi ma Iesu Iosefa Samita o se perofeta e toe aumai vaega o loo misi o le talalelei. E taua lenei mea o le Toefuataiga." Sa ia piki i luga se vaega o le paso e faaali atu i le Peraimeri. I le pito i tua sa i ai upu "Mana o le Perisitua."

Ona faaali atu lea e Ana isi vaega na totoe o le paso. Sa ia faitauina le pito i tua o vaega taitasi a o lei tuuina atu i lona tulaga i le paso. "O se perofeta soifua . . . Apostolo e toasefululua . . . galuega faalemalumalu mo aiga e faavavau . . . papatisoga i le faatofuina . . . faaeegaa o lima mo le meaalofa o le Agaga Paia."

PEROFETA O LE TOEFUATAIGA

"Sa avea Iosefa Samita . . . ma meafaigaluga i aao o le Atua i le aumaia o tusitusiga paia, aoaoga faavae na leiloloa, ma le toefuataiga o le perisitua."

Elder Neil L. Andersen o le Korama a Apostolo e Toasefululua, "Iosefa Samita," *Liahona*, Nov. 2014, 28.

Na uu i luga e Anna le paso ua maea. "O lenei ua tatou maua vaega uma o le talalelei. O lona uiga e mafai ona tatou vaai i le ata tele o le auala e mafai ai ona tatou maua le fiafia ma toe nonofo ma le Tama Faalelagi i se aso. Ou te faafetai i le Toefuataiga. I le suafa o Iesu Keriso, amene." ■

E alala le tusitala i Iuta, ISA.

O Le a Toe Afio Mai Iesu Keriso!

Saunia e Erin Sanderson

Ile Kerisimasi, o tagata i le lalolagi atoa e faamanatuina le soifua mai o lo tatou Faaola, o Iesu Keriso. I se aso o le a tatou faamanatuina ai se isi aso matagofie—o le Afio Mai Faalua, pe a toe afio mai Iesu i le lalolagi! Ua aoao mai e perofeta le mea o le a tupu a o lei toe afio mai Iesu. O se tasi o na mea o Lana talalelei lea o le a talaiina atu i le lalolagi atoa.

O le mauaina o le faatuitua i le Tama Faalelagi ma Iesu Keriso e fesoasoani ia i tatou e

lagonaina le toafilemu, e tusa lava pe foliga taufaafefe mea o loo tutupu i le lalolagi. Na fetalai mai Iesu, “Ou

te tuuina atu ia te outou le manua, o lou manua ou te avatu ai ia te outou: ou te le avatu ia te outou e faapei ona avatu e le lalolagi. Aua le atuatuvalue o outou loto, aua foi tou te matatau” (Ioane 14:27).

A o e mafaufau e uiga ia Iesu i lenei Kerisimasi, ia manatua o le a Ia toe foi mai i se aso, e le o se pepe ae o le Tupu o tupu. Ona iloa ai lea e tagata uma o Ia o le Alo o le Atua ma le Faaola o le lalolagi! ■

E alala le tusitala i Iuta, ISA.



AOAO ATILI

Pe a toe foi mai lesu, o le a la nofotupu i le lalolagi mo le 1,000 tausaga. O lenei taimi o le a taua o le Meleniuma. I le taimi o le Meleniuma, o tagata o le a matuai amiotonu lava o le a le mafai ai ona faaosoosoina e Satani i latou. O le a leai se faanoanoa, ma o le a lagona e tagata o e mulimuli ia Keriso le toafilemu ma le fiafia.

TALANOAGA I LE AIGA

O se oa o se mea faapitoa lea e taua tele. Faitau losefa Samita—Mataio 1:36–37. Talanoa e uiga i le auala e fesoasoani ai le “teu faaoloa taua” o afioga a Keriso ia i tatou e saunia ai mo Lona Afio Mai Faalua. O fea tatou te maua ai Ana afioga?

Pese: “Pe a la Toe Afio Mai”

(*Tusipese a Tamaiti*, 46)

Tusitusiga Paia: Ioane 14:27

Vitio: Alu i le Biblevideos.org e matamata i “Glad Tidings of Great Joy: The Birth of Jesus Christ.”

E MAFAI ONA OU SAUNIA

Fai se tamaitusi e faamanatu ai ia te oe auala e mafai ona e saunia ai nei mo le taimi e toe afio mai ai lesu.



Oti ese ma faaputu ia kata. Sui ma nonoa se manoia i pu e lua.

MOTUGAAFA O TUSITUSIGA PAIA

O auala nei e tolu e mafai ona e malamalamā atili ai i tusitusiga paia:


1. A o lei amata ona e faitauina tusitusiga paia, tatalo i le Tama Faalelagi e fesili atu mo se fesoasoani e malamalamā lama ai.
2. Faaalu se taimi e manatunatu ai e uiga i mea e te faitauina.
3. Ta'u atu i se tasi e uiga i mea na e aoaoina ma lagonaina, ma tusi e uiga i ai i se api o talaaga.

E Mafai Ona ou Saunia
pe a Toe afio Mai lesu




E mafai ona ou tatalo i aso uma.

E mafai ona ou faitau i tusitusiga paia.



E mafai ona ou usitai i poloaiga.




E mafai ona ou mulimuli i le perofeta.

O Le Tala ile Soifua Mai o Iesu

I aso la ua leva, o se tamaitai e igoa ia Maria ma se alii e igoa ia Iosefa na fuafua e faaipoipo. O Maria ma Iosefa o ni tagata lelei o e na faia le mea e finagalo le Atua ia la faia.



I se tasi aso na sau ai se agelu ia Maria ma ta'u atu ia te ia o le a ia maua se pepe! Na tau atu e le agelu e tatau ona ia faaigoa le pepe ia Iesu. O le pepe o le a avea ma le Alo o le Atua, o le Faaola.





O Maria ma Iosefa sa tatau ona malaga atu i se nuu e taua o Peteleema e totogi ai lafoga.




Sa matuai tumu le taulaga. O lea na nonofo ai Maria ma Iosefa i le po i se nofoaga e tuu ai manu. O lena po na fanau ai le pepe o Iesu!

Na faaali mai se
fetu fou i le lagi.



O leoleo mamoe sa tausia
mamoe i fanua lata ane. Na o
mai agelu ma ta'u atu i leoleo
mamoe ua fanau mai le Faaola.
Sa o atu leoleo mamoe e saili
ma ifo i le pepe o Iesu.





I se nuu mamao, na vaaia ai e Makoi le fetu fou. Sa latou iloa o se faailoga ua fanau mai le Faaola. Sa latou mulimuli i le fetu seia oo ina latou maua Iesu. Na latou tuuina atu ia te Ia ni meaalofa ma ifo atu ia te Ia.

Ina ua o ese Makoi, na asiasi atu se agelu ia Iosefa. Sa tau atu e le agelu o loo manao se tupu leaga e faatiga ia Iesu. Na tau atu e le agelu e tatau ona o ese lo latou aiga i Aikupito ina ia saogalemu.





Sa nonofo Iosefa, Maria ma Iesu i Aikupito seia oo ina saogalemu e toe foi atu ai i Isaraelu. Na tupu ae Iesu i se nuu e taua o Nasareta. Sa ia aoao e fesoasoani, agalelei, ma le usiusitai. Sa ia aoaoina mea uma e tatau ona ia aoaoina ia avea ai ma lo tatou Faaola. Sa ia mulimuli pea i le fuafuaga a le Atua mo ia.



I le Kerisimasi, tatou te faamanatuina ai le fanau mai o Iesu Keriso. Faasino atu i ata o nei tagata, o e na avea o se vaega o le tala i le Fanau mai o Iesu.

E mafai ona tatou faapei o **Maria ma Iosefa** e ala i le faia o mea ua finagalo le Atua ia i tatou e fai.

E mafai ona tatou faapei o **leoleo mamoe** ma **Makoi** e ala i le mulimuli ia Iesu Keriso.

E mafai ona tatou faapei o **agelu** i le tauina atu i isi le tala moni o le Kerisimasi. Ma e mafai ona tatou faapei o **Iesu** e ala i le mulimuli i Lana faataitaiga! ■

MAI TUSITUSIGA PAIA

E mafai ona e faitauina le tala o le Fanau Mai o Iesu i Mataio 1:18–25; 2; Luka 1:26–38; 2:1–20.



**Saunia e Peresitene
Howard W. Hunter
(1907–95)**
Peresitene Lona Sefulufa
o le Ekalesia

O LE KERISIMASI MONI

O le Kerisimasi moni lava e oo mai ia i latou o e taliaina Keriso i o latou olaga.

Le tusi puupuu a Paulo i Kalatia, sa ia faaalia ai le popole tele i lo latou le talitonu aliali ma lo latou faagaloa o ana aoaoga e uiga ia Keriso. Na ia tusi atu ia te i latou: “Ae lelei le maelega i le mea lelei e le aunoa, aua nei gata ina o ia te outou o au. Lau fanau e, ou te toe aoao ai i ou faatiga seia tino Keriso i totonu ia te outou” (Kalatia 4:18–19). I se isi faaupuga, na faaalia e Paulo o ia o loo puapuaga i le tiga ma le popole seia “tino” Keriso i totonu o i latou. O le tasi lea ala o le faapea “ia Keriso,” e pei ona faaaogaina soo e Paulo lena faaupuga i ana tusitusiga.

E mafai ona avea Keriso o se vaega o olaga o tagata, ma pe a tupu moni lava lea tulaga, o se tagata ua “ia Keriso”—ua “tino” Keriso i totonu ia te ia. O lenei mea ua muai faamoemoe ia tatou tauaveina Keriso i o tatou loto ma avea o Ia ma faatosinaga sili i o tatou olaga. O Ia ua le na o se upumoni lautele po o se mea moni i le talafaasolopito, ae o le Faaola o tagata i soo se mea ma taimi uma lava. Pe a tatou taumafai e avea e faapei o Keriso, o le a “tino” o Ia i totonu o i



tatou; Afai tatou te tatalaina le faitotoa, o le a Ia ulufale mai; afai tatou te sailia Lana fautuaga, o le a Ia fautuaina i tatou. Mo Keriso ina ia “tino” i totonu o i tatou, e tatau ona tatou maua ai se talitonuga ia te Ia ma Lana Togiola. O sea ituaiga talitonuga ia Keriso ma le tausia o Ana poloaiga e le o ni avega mamafa i o tatou luga. O nei mea, ua saoloto ai tagata. O lenei Alii o le filemu o loo faatalitali e tuu mai le filemu i le mafaufau, lea e mafai ona tatou uai uma atu ai i lena filemu.

O le Kerisimasi moni lava e oo mai i le tagata lea na te avea Keriso i totonu o lona olaga o se mana gaoioi, ola ma le faatupulaia.

I ona manatunatuga i le vaitau o le Kerisimasi, sa tusia ai e James Wallingford laina nei:

O le kerisimasi e le o se aso po o se vaitau, ae o se tulaga o le loto ma le mafaufau.

Afai tatou te alolofa i o tatou tuaoi e pei o i tatou lava; afai tatou te matitiva i la le agaga i lo tatou mauoa ae tatou te mauoa i le alofa tunoa i lo tatou mativa; afai e le saili e ia ana lava mea, ae onosai ma agalelei; afai e fesili mai so tatou uso mo se areto ae tatou tuuina atu i tatou lava nai lo lena; afai e gafoa aso taitasi i avanoa ae faiiuina i mea ua ausia, e tusa lava po o le a le laitiiti— ona avea ai lea o aso uma ma aso o Keriso ma o le Kerisimasi e latalata mai lava pea.
(I le Charles L. Wallis, lom., Words of Life [1966], 33) . . .

Afai e te manao e maua le agaga moni o le Kerisimasi ma tofo i lona suamalie, sei ou tuuina atu lenei fautuaga ia te oe. I le taimi o le pisi o aso fiafia o lenei vaitau o le Kerisimasi, ia saili se taimi e liliu atu ai lou loto i le Atua. Atonu i itula filemu, ma i se nofoaga filemu, ma i ou tulivae—na o oe pe faatasi ma e pele—e avatu le faafetai ona o mea lelei ua oo mai ia te oe, ma fesili atu mo Lona Agaga ia mafai ona mafuta ia te oe a o e tau-mafai ma le naunautai e auauna atu ia te Ia ma tausi Ana poloaiga. O le a Ia taitai oe i Lona aao ma o le a tausia Ana folafolaga. ■

Mai le “O Le Kerisimasi Moni,” Liahona, Tes. 2005, 12–15.

MALAMALAMAAGA



Tagata o le ekalesia i Natal, Pasila.

O a mea e mafai ona tatou faia ina ia avea ai le Sapati o se mea fiafia?

"O le Sapati e aumaia ai se avanoa matagofie e faamalosia ai mafutaga faaleaiga. . . . Tatou te faia le Sapati o se aso fiafia pe a tatou aoao atu le talalelei i a tatou fanau. . . . E le gata i le taimi ma le aiga, e mafai ona e maua se aso fiafia moni i le Sapati i le faia o galuega o talafaasolopito o aiga. . . . la faia le Sapati ma se aso fiafia i le tuuina atu o se auaunaga i isi, aemaise i latou o e le o malolosi po o i latou o e ua tuuatoatasi pe lē tagolima."

Peresitene Russell M. Nelson, le Peresitene o le Korama a Aposetolo e Toasefululu, "O le Sapati o se Aso Fiafia," *Liahona*, Me 2015, 130, 131.

EIAi Foi i le Lomiga Lenei

MO TALAVOU MATUTUA

Toe Foi **Wave** Mai
i le fale mai i la'u Misiona

Ina ua ou toe foi mai i le fale, sa ou tauivi ma la'u molimau. Ae na iu lava ina sa ou folafola atu i le Tama Faalelagi o le a ou tumau i le faatuatua e tusa lava pe ou te lei mauaina ni tali.



i.44

MO LE AUTALAVOU



O mea **sa ou**
aoaoina i le avea ai
o se Talavou Liliu Mai

Vaai faalemafaufau i le auai i le Ekalesia i le 17 o tausaga ma le avea ai ma le tagata e toatasi i lou nuu e tautala i lau gagana. Faitau e uiga i le mea na aoaoina e Elder Klebingat o le Fitugafulu i lena tulaga!

MO TAMAITI

O Le Tala
i le Soifua
Mai o Iesu

Olioli i se tala tusiata e ono-itulau
o le soifua mai o le pepe o lesu!



i.74